

# JA ØGYAJPX<sub>Y</sub> JA ØMYADY<sub>A</sub>'AKY MIDI JA JUAN YJA<sub>A</sub>Y

Ja' pøn xuk'ejximp  
xuknija'wimp ja Dios Teety

**1** Jaayim ja wyinatyni pøn xuknija'wimp ja Dios ku tuki'iyi cho'ondakijxñim; Dios ja møøt tyimy'ity jøts nayi Dios ja kø'øm. <sup>2</sup>Tso'onda'agyip ja møøt y'ity. <sup>3</sup>Jøts ja' ja Dios Teety tukyik'ø'yiyi ja tsajp jøts ja naajx jøts tuki'iyi; pø ka'axi ja naxwii'ñit jeexyip cho'ondaajk ku jeexyip kya'ity ja'. <sup>4</sup>Ja' tyiktso'ondaajk ja tsinaa'yin jøts ja jujky'ajtin, jøts nayide'en xuknija'windi ja tyiiby i ja yjanchpi, midi tyik'øyip midi tyikwinaa'nbyatp ja naxwii'ñit jaa'y. <sup>5</sup>Møk ja tyikmajada'aky ja myøk'ajtin ku xyikudøø'kxaajka'am ma pøn wimbeets kugoots, jøts ka'ap ja miku' yja' myajada'aky.

<sup>6</sup>Jats idø'on jaa'y tu'ukmi pøn Dios ojts kyexyi, Juan ja xyøøw, <sup>7</sup>midi testigi'ajtpi meen jøts ja tniğajpxt jøts ja tniɱadya'akt pøn xyikujajtaajkimp xyikudøø'kxaajkimp, jøts ja øy pøn ttiyjawit tjanchjawit pøni sa jaty ja wya'añ. <sup>8</sup>Kidi ja Juanipxi ja' pøn xyikujajtaajkimp xyikudøø'kxaajkimp; nugo

testigi'ajtpi ja ja'ayi yikexy jøts ja' tniğajpxt. <sup>9</sup>Tyimy ja' idø'on wyinaty memp ja'tp ya naxwii'ñ pøn tyik'øyip tyikpaadip, pøn tyikwinmaa'nbyatp ja naxwii'ñit jaa'y.

<sup>10</sup>Ixa ja wyinaty tø yja'tni ya naxwii'ñ jøts ja ojts nipøn kyagupikyiyi pøn jaty jaadi, øy ja wyinaty kø'øm tø yjadukyik'øyiyi ja naxwii'ñit. <sup>11</sup>Kyø'øm ja' ja yjanimimp jøts kyø'ømiğ'uuktøjk paat ja ka'ap kyupøjkiyøø. <sup>12</sup>Jats winaagin pøn ja kupøjkiyøø jøts pøn ja janchja'wiyøø; ja'ats ja tiy'ajtin ja ojts tmø'øy jøts Dios Teety ja y'u'nk'atidit.

<sup>13</sup>Tiy'ajtingøjxp ja jade'en Dios y'u'nk'atyidi, ka'ap ja jade'en sa jaa'y y'u'nk y'una'jk tpaatti.

<sup>14</sup>Jøts ja' pøn xuknija'wa'am ja Dios, ojts ja jaa'yin y'atsøøni y'atstani, jøts ja ojts ñiyjeki xmoøt'ijtyindi xmoøtsinaa'yindi. Tø adøm myøk'ajtin ja nja'ijxyindi midi ja kyø'ømøk'ajtin'ajtpy ja Dios U'nk. Tu'ugyi Dios Teety ja yjanchjaakjagypyi, janch pa'ayoop, jøts tum ja tiy'ajtin janch'ajtin yajkpy. <sup>15</sup>Ja'ats ja Juan ojts tniğajpxy jøts ja yide'en wyaañ:

—Yø'oxi øts idø'on ndijpy ku ø nwa'añ: “Ja' pøn oojknim me'emp, ja' idø'on møj jøts ka'ap øts. Jøts kumi jaayim yø' wyinatyni, kidinim øts.”

<sup>16</sup>Kajaa adøm Dios kyunuu'kxin xmøø'ylijtyindi ni'lijtyi. Juuni ja tkayaky. <sup>17</sup>Tøts ja Moisés kyutujk xuknija'wa'am sa ja Dios kyutujk; ixyats ja nwindsin'ajtim Jesucristo pøn xuknija'wa'am ja Dios pya'ayo'owin jøts ja tyiy'ajtin yjanch'ajtin. <sup>18</sup>Nijuuni pøn tka'ijxñim ja Dios; yø'øts midi jam møøt y'ity, yø Dios U'nk, yø' xuknija'wa'am sa ja Dios Teety.

**Ku ja Juan Bautista tñigajpxy  
ku ja nwindson'ajtim  
Jesucristo myeenwa'añ**

<sup>19</sup>Winets ja israelit jaa'dyi midi jam kugajp'ajttip jam Jerusalén, ojts tkaxti ja teetyøjk møøt ja levijit jaa'dyi midi t'ejx'ejttip ja tsaptøjk, jøts ja t'atstiibyøktit ja Juan pøn idø'on ja'; <sup>20</sup>jøts ja ojts wa'ats tñigajpxy, yide'en ja wyaañ:

—Ka øtsip ja' midi yiktejp Cristo.

<sup>21</sup>Xjats ja tjaaktyimdyiibyøjktøø: —¿Pønts mets idø'oni? ¿Mets idø'on Dios kyugajpxy midi yiktejp Elías?

Jøts ja Juan wyaañ:

—Ka'ap ja y'øtsi.

Jøts ja tjaaktyimdyiibyøjk'adø'øtsti: —Jøts, ¿metsimts idø'on ja' midi dø'on menwamp midi ja Dios kyugajpxy'ajtpy?

Jøts ja y'adsøøy:

—Ka'.

<sup>22</sup>Winets ja yiknimaay:

—¿Pønims mets? Kuwanixi øøts ja nnijawit jøts øøts ja ndukmado'ot

pøn øø tø xkexy. ¿Sa me m'ukwa'añ ku mga'uknañigajpxyi?

<sup>23</sup>Jøts ja Juan ja t'adsøøy:

—Øts ja' midi yikmadoop y'ayuuik jam abak etjotp, ma niti kya'ity: “Yiktøwdi yiktuda'lakti ja mwinmaa'ñ jøts xkupøktit ja nwindson'ajtim” —nayide'en sam ja Isaías wyaañ, ja Dios kyugajpxy.

<sup>24</sup>Ja fariseotøjk ja wyinaty tø kyexyidi midi idø'on ja Juan jam jade'en møøt ñagyajpxyi. <sup>25</sup>Xjats idø'on ja Juan yiktiibyiky jøts ja yiknimaay:

—Pøni ka'adam me mCristo, ni mga'Elías, jøts ni Dios me mgagugajpxy'aty, ¿tits ku myiknøbety?

<sup>26</sup>Jøts ja Juan tñimaay:

—Nøø øts iiy nduktanøbejtpy; jats ya tu'uk midi ka' x'ejxkaptinim; <sup>27</sup>oojknim ja mye'ent, ja' tu'uk møj, nugo øts jawyeen nyiktuu'awa'ach. Nijuuni øts ja møøt nganamyibaat'atitit.

<sup>28</sup>Jam idø'on ja jade'en yjajty ma ja et jam txøøwi Betábara, midi tãmp xøbidsimy jam nøø agø'øm midi txøow'ajtp Jordán, ma ja Juan jam ojts yiknøbety.

**Ja Jesucristo yiktamiyoxp  
ja Dios Teety adømgøjxp**

<sup>29</sup>Xjats ku kyimjabom'ajty winets ja Juan ojts t'ixy ja nwindson'ajtim Jesús ku ja jam wyinaty ñimiñiyi, jøts ja Juan wyaañ:

—Ejxti, yø' idø'on jade'en jatwamp kubatwamp sam ja borreek u'nk yikyøxyin adøm nbojkpi køjxp, jøts yø' naxwii'ñit jaa'y tyikpøkwyat'isp.

<sup>30</sup>Yø' øts idø'on ndijpy ku ø nwa'añ: “Ja tu'uk jaa'y myiñ, ja' idø'on møj

jòts kidi òts, jòts jaayim ja'ani."

<sup>31</sup>Nika'ap òts yò y'lity nnijawì pòni pòn yò'. Tòts ø nmiñ jòts òts Israelit jaa'y nòø nduktanòbatt jòts nduknijawidit pòn ja'.

<sup>32</sup>Nayide'en ja Juan wyaañ:

—Tò òts ja Espíritu Santo n'ixy jòts ku kyida'aky jam tsajpwemp sam tsapakin, jòts ja tò kyòxke'eky yò' kyubajkp. <sup>33</sup>Ni nganjawì òts yò' pòni pòn yò'; jòts òts idò'on ja Dios Teety ojts xnøjmi midì òts nòø xukyiktump ku nyiknòbety, yide'en òts ja xnimaay: "Ku x'ext ja Espíritu Santo kyida'akt jòts y'ixa'akt jam tu'uk jaa'y kyubajkp, ja'ats idò'on ja wyinaty midì ja Espíritu Santo xmò'òyimp ku ja yiknòbatt." <sup>34</sup>Tòts ø n'ixy, jòts òts testigi jòts ku yò' Dios U'ngi.

**Ja jaa'y pòn ojts jawyeen  
tpabòkti ja Jesús yja'**

<sup>35</sup>Xjats ku kyimjabom'ajty, ixam ja Juan wyinaty køjmyi mòøt namajtsk pyabòjkpi. <sup>36</sup>Jòts ku ja Juan ojts t'ixy jòts ku jam wyinaty ñaxy ja nwindson'ajtim Jesús, winets ja wyaañ:

—Ejxti, yò' idò'on jade'en jatwamp kubatwamp sa borreek u'nk yikyøxyin adøm nbojkpi køjxp.

<sup>37</sup>Ku ja' tmadoodøø midì ja Juan pyabòjkpi'ajtpy, midì jam wyinaty namajtskti ku ja Juan jade'en wyaañ, xjats ja ojts tpanòjkxti ja nwindson'ajtim Jesús. <sup>38</sup>Winets ja nwindson'ajtim Jesús y'ejxjimbijty, jòts ojts t'ixy jòts ku jam yikpayò'øy, jòts ja ojts tnøjmi:

—¿Ti m'ixaadyip?

Jòts ja ojts t'adsowdi:

—Windsøn, ¿ma me ndsøøni?

<sup>39</sup>Jòts ja nwindson'ajtim Jesús y'adsojimbijty:

—Men x'ejxti.

Xjats ja ojts ñòjkxti jòts ja ojts t'ejxti ma chøøni, jòts ja jam ojts tmøøtkudsuu'idi. Ja dò'on ja xøøw wyinaty jawaani kyagidakni.

<sup>40</sup>Ja Andrés idò'on ja', ja Simón Pedro y'uch, midì idò'on ja jade'en tmadoodip namajtsk ku ja Juan jade'en wyaañ. Jòts nay ja' idò'on jade'en tpanòjkxtip ja nwindson'ajtim Jesús. <sup>41</sup>Jòts ja Andrés tyimñayjaty ja ojts t'ats'ixa'ay ja y'ajch Simón, jòts ja ojts t'atsnøjmi:

—Tò øøts ja Mesías nbaaty midì Dios kyejxpy, midì Cristo yiktejp.

<sup>42</sup>Xjats ja Andrés ojts twaanijkyx ja Simón ma ja nwindson'ajtim Jesús jam wyinaty, jòts ku ja ojts y'ijxyi jòts ja ojts ñii'mxyi:

—Mets Simón, ja wa'axi me m'u'nk'ajtip ja Jonás. Cefas inet ixyam mxøøw'atp.

Jade'en ja ñii'mxyi ja nwindson'ajtim. Cefas jade'en tyijpy Pedro sam ja t'ayuujk'atti.

**Ku ja Jesús twaadsøøy ja  
Felipe jòts ja Natanael**

<sup>43</sup>Jòts ku kyimjabom'ajty, jam ja nwindson'ajtim Jesús wyinaty ñòjkxwa'añ Galilea etjotp, ku ja tminabyajti ja Felipe jòts ja tnimaay:

—Møødik òts.

<sup>44</sup>Jam Betsaida ja Felipe kyugajp'aty nay jam ma ja Andrés kyugajpi mòøt ja Pedro. <sup>45</sup>Winets ja Felipe ojts ñijkyx jòts ja ojts t'ats'ixa'ay ja Natanael, jòts ja ojts t'atsnøjmi:

—Tø øøts ja jaa'y n'ixy midi ja Moisés ñigajpxpy jap nõkyjøtpy ku ja kutujk ja ojts tja'ay, jøts nayide'en midi ñigajpxtip ja Dios kyugajpxtyøjkti, ku ja ojts tjaadyandi. Ja Jesús ja' midi ja José y'u'nk'ajtpy, midi jam kugajp'ajtp Nazaret.

<sup>46</sup>Xjats ja Natanael wyaañ:

—¿Wan ndejin y'øybi jam y'ukpidsømni Nazaret?

Jøts ja Felipe y'adsøøy:

—Men xtyimy'ixy.

<sup>47</sup>Kuts ja nwindson'ajtim Jesús ojts t'ixy jøts ku ja Natanael jam ñimiñiyi, winets ja wyaañ:

—Ixya net myiñ tu'uk nmigu'uk israelit jaa'y midi øyjaa'y'ajtp, midi ka' tyaayi.

<sup>48</sup>Winets ja Natanael ja ojts yiktiyyi:

—¿Sudso'ampy me x'ijxy'aty?

Jøts nwindson'ajtim Jesús ja ojts ñii'mxyi:

—Tøyimxi me wyinaty n'ejxni ku mets yø Felipe ka'anim wyinaty m'atswayinim, ku mets ixajp iigi patki'py.

<sup>49</sup>Winets ja Natanael wyaañ:

—Windsøn, mets idø'on Dios U'nk, jøts mets idø'on mniwindsøn'ajtpy israelit jaa'y.

<sup>50</sup>Jøts nwindson'ajtim Jesús ja ojts yide'en y'adsøyi:

—¿Jatyi me xtyimyjanchjawi ja'agøjxp ku me tø nnøjmi jøts ku me tø n'ixy jap iigi patki'py? M'ejxpnim mets ja myøjpi y'øybi midi ø ndu'ump midi ka'ap yjade'eni sam ya'adin ku me tø n'ixy.

<sup>51</sup>Jøts ja nwindson'ajtim Jesús yjaaktyimwyaañ:

—Meets yam ndyimñimaapy, jøts ku x'ejxtit ja tsajp y'awa'ats, jøts ku Dios y'ankilis pyattit wyinaktit jøts øts ja xnigida'aktit, ja' kuxi øts ja naxwii'ñit jaa'y ngudani Dios Teety wyingujkp.

### Naxyøduujnidip ja jaa'y jam Galileit etjotp

**2** Kyimdigøøk xøow wyinaty tø y'ity ku jaa'y y'amajtskidi ma ja kajp txøowi Caná, jam Galileit etjotp. Ixam idø'on ja nwindson'ajtim Jesús wyinaty tyaak. <sup>2</sup>Jøts nayide'en ja nwindson'ajtim Jesús wyinaty tø yikwaamidi migaabyi mi'ukpi møøt ja pyabøjkpitøjk jøts ja nay jam ñøjkxtit. <sup>3</sup>Xjats ja vino tyimgyijxy, winets ja nwindson'ajtim Jesús ja tyaak ñimaajyøø:

—Tø tyimgyugøxidi, ka'ap vino ukteeni.

<sup>4</sup>Jøts ja nwindson'ajtim Jesús y'adsøøy:

—¿Ti øtsimts taak yø xpatp? ¿Tiku øts yø xukmadøy? Pø ka'animxi øts nja' xpaaty midi ø ndu'ump.

<sup>5</sup>Jøts ja tyaak wyaañ, yide'en ja tnimaay ja jaa'y pøn jaty jam wyinaty windsø'jkidip:

—Mdu'undip idø'on jade'en tuki'iyi pøni sa wya'añ.

<sup>6</sup>Jamts wyinaty tudujk ja tsaaduljts midi ja israelit jaa'y yiktundip ku Dios ja twindsø'øgidi jøts ja pyøkwaya'atstít. Makta'pxy uk magø'pxy enteerin ja y'uch tu'uk tu'uk, jade'en nøø ja yikta'adami. <sup>7</sup>Xjats ja nwindson'ajtim Jesús tnimaay ja jaa'y pøn jaty jam wyinaty windsø'jkidip:

—Yik'utskøxti yø tu'jts. Adamidi nøø.

Jøts ja ojts yikxon tyimyik'utsti,  
<sup>8</sup>winets nwindson'ajtim Jesús  
 tnimaay ja jaa'dyi:

—Aja'aptu'uttits inet waani, jøts  
 xaninøjkxtit midi yø xøow tø  
 tniwaamuki.

Jøts ja ojts jade'en ttundi.

<sup>9</sup>Ojts ja tja'gyapy midi ja xøow  
 tniwaamujkip jøts ja tsujxk nøø tø  
 ja vino yjajtni, nika'ap ja tnijawi  
 pø mā ja chøøn; ja'ayi ja nugo  
 tnija'widip pøn windsø'jkidip, pø  
 ja'axi ja nøø wyinaty tø tjaapti.  
 Xjats ja twaadsøøy ja jemyaa'y  
<sup>10</sup>jøts ja tnimaay:

—Tum jawyeen øy pøn t'uuky yø  
 vino y'øybi, jøts ku ja mi'ukpi ja  
 kom tø t'uknidi winets ja yu'nkpi  
 yikyakñim. Jøts mets, tø mets ja  
 møk vino ne'egi xjaakyik'awixy,  
 jøts mets yø yamnim ne'egi xyaky  
 oojknim.

<sup>11</sup>Yø'øbi milagri'ajtin id'øon  
 ja nwindson'ajtim Jesús  
 tyimyijawyeen nanky'ejxøø  
 jam Caná, jam Galileit etjotp,  
 midi yiknigaxø'jk ja myøk'ajtin,  
 winets ja pyabøjkpitøjk ja ojts  
 yjaakjanchjawi.

<sup>12</sup>Xjats ku ja jade'en y'ukjajty,  
 winets ja ojts ñijkxy mā ja kajp  
 jam txøøwi Capernaum, møøt ja  
 tyaaak, møøt ja myigu'uktøjk, jøts  
 møøt ja pyabøjkpitøjk. Jøts ja jam  
 tyaa'nidøø ñigyawinaak xøow.

**Ku ja Jesús tpawojpkijxy ja  
 too'kpitøjkti jam tsaptøjk agø'øm**

<sup>13</sup>Ja paski xøowts wyinaty  
 tyimbyatnip midi ja israelit jaa'y  
 tyundip, winets ja nwindson'ajtim  
 Jesús ojts ñijkxy jam Jerusalén.

<sup>14</sup>Jøts ja jam tsaptøjk'agi'py

tkubajtiyiii'n ja jaa'dyi pøn  
 too'ktip ja tsakaa, pøn too'ktip  
 ja borreek, pøn too'ktip ja pak,  
 jøts nayide'en pøn ja myigu'uk  
 myeeñ tyikwa'kxidip, ja' jam  
 wyinaty tsinaadyip mayim ja jam  
 tunk'atti. <sup>15</sup>Ku ja nwindson'ajtim  
 Jesús ja ojts jade'en t'ixy, xjats ja  
 tyik'øyiyiii'n tu'uk pawojp, jøts  
 ja jam tpawojpkijxy niduki'iyi ja  
 jaa'y jam tsaptøjk agø'øm, møøt ja  
 byorreek møøt ja chakaa. Jøts ja  
 meeñ yikwa'kxpidi ojts ja myeeñ  
 ja yik'ixko'odi, jøts ja myesi ja ojts  
 yiktejimbetti. <sup>16</sup>Jøts ja tnimaay ja  
 jaa'y midi paktoo'ktip:

—iYikjiwa'akti yø ya! iKidi nDeety  
 tyøjk maadyøjk xyikwa'andi!

<sup>17</sup>Winets ja pyabøjkpitøjk nay  
 jatyi tja'myajtsidøø ja nøky mā ja  
 David yide'en wyaan: “Møk øts  
 nba'ayøy ja mdøjk.”

<sup>18</sup>Xjats ja israelit jaa'y ttiibyøjktøø  
 ja nwindson'ajtim, jøts ja  
 tnimaadyøø:

—¿Ti tiy'ajtin øøts xuk'ejxp jøts  
 ku xjagyepy ja kutujk ku jade'en  
 m'adi'ich?

<sup>19</sup>Jøts nwindson'ajtim Jesús ja  
 ojts t'adsøy:

—Yikidawdi yø tsaptøjk, kidigøøk  
 xøow øts yø jadigojk nyikwa'kukit.

<sup>20</sup>Winets ja israelit jaa'y wyandøø,  
 jøts ja ojts ñii'mxyiyi:

—Wixijkxyudujk jumøjt yø tø  
 yiktunk'aty yø tsaptøjk jøts yø tø  
 y'øyi; ¿jøts me mwaa'ñ jøts ku mets  
 yø kidigøøk xøow xyikwa'k'øyt  
 jadigojk?

<sup>21</sup>Ku ja Jesús ja tsaptøjk tkajpxy,  
 pø kyø'ømne'kx ja jade'en tyijpy.

<sup>22</sup>Pø patyxi ku ja nwindson'ajtim  
 Jesús ojts yujkpyijky jadigojk

jap oo'kpi jutjõtpy, yø'øts ja pyabøjkpitøjk yja'myatstøø ku ja wyinaty jade'en tø wya'añ. Xjats ja tjantyimyjanchja'widøø ja Dios kyajpxy, jøts nayide'en tmibøjkidøø ja nwindson'ajtim y'ayuujk sa jaty ja wyinaty jade'en tø wya'añ.

**Wa'ats ja Jesús tñijawi sa jaty  
jadu'uk jadu'uk wyinmay**

<sup>23</sup>Kuts ja nwindson'ajtim Jesús jam wyinaty tyiknaxy ja paski xøøw jam Jerusalén, jøts may ja jaa'y ja jam yjanchja'wiyøø tyijja'wiyøø ku ja t'ejxti ja myilagri'ajtin midi ja tyumpy.

<sup>24</sup>Jøts ja nwindson'ajtim Jesús ka'ap ja nugo tyimñagyiyakyi, kumi wa'ats ja t'ejxkapy ja niduki'iyi sa pønjabøn. <sup>25</sup>Ka'ap ja chøkyiyi jøts ja pøn tyukmadowit sa jaty jaa'y jadu'uk jadu'uk yjaa'y'aty. Wa'ats ja kø'øm tyimñijawi sa pøngapøn y'am yjotp wyinmay.

**Ja Jesús jøts ja Nicodemo**

**3** Jamts idø'øn tu'uk fariseit jaa'y pøn txøøw'ajtp Nicodemo, jøts ja' idø'øn ja israelit jaa'y wyindson'ajtip. <sup>2</sup>Ja'ats ojts koots y'atstøk'ayø'øy ma ja nwindson'ajtim Jesús jam wyinaty, jøts ja ojts t'atsnøjmi:

—Windson, nnija'wip øøts jøts ku Dios tø mguexyi jøts øøts xyik'ixpøkt. Ka'ap me jeexyip jade'en xyiktuñ ja Dios myøk'ajtin milagri'ajtingøjxp sam ixyam xyiktuñin, ku jeexyip møøt mga'ity ja Dios.

<sup>3</sup>Xjats ja nwindson'ajtim Jesús ja tnimaay:

—Janch øts idø'øn nwa'añ, jøts ku ka' pøn tpaatt ja Dios kyutujk midi

yjaa'y ja tyanitanaapy pøni ka'ap pøn nayide'en kyaxi'iky jadigojk sam tø kye'exyin.

<sup>4</sup>Winets ja Nicodemo tyiktiiy jøts ja tnimaay ja nwindson'ajtim Jesús: —¿Sudsots ja møj jaa'y nayide'en jadigojk kyaxø'økt sam ja tø kye'exyin? ¿Pø sudso'ampy jadigojk tyøkit tyaak yjotp jøts kya'axkojmit?

<sup>5</sup>Jøts ja nwindson'ajtim Jesús ja yide'en t'adsøøy:

—Janch øts idø'øn nwa'añ, pøni ka'ap pøn jade'en kye'exy ejxim ja jaa'y kye'exyin, jøts nika'ats ja Dios myøk'ajtin myø'øyi, ka'ats pøn mibaat tyøkit ma Dios ja kyutujk ttanitani ja yjaa'y. <sup>6</sup>Ku ndeety ndaak xyikaxø'jkyim, nugo yø' xmø'øyim ja jaa'y'ajtin; jøts ku ja Dios x'u'nk'ajtyim, ja'ats ja myøk'ajtin ja y'Espiritu Santo xmø'øyim. <sup>7</sup>Kidi nigyumaap xjawi jøts ku jade'en nnøjmi: “Niduki'iyi jaa'y pyaat'atyidi ja chinaa'yin tyiktigatstit, ka'axigajtstipts ja ñamyayi jade'en.” <sup>8</sup>Pojp øy maðsoo pyøjy; wa'ats nmadøø'yim sa wyina'añ ja poj, ka'ats nnija'wa'an pøni ma chøøñ jøts pøni ma ñijkxy. Nayide'ents idø'øn ñamyayi ja'adi pøn ja Dios myøk'ajtin yikaxø'jkiyidip.

<sup>9</sup>Winets ja Nicodemo tjaaktiibyijky:

—¿Sudso yø ndejin jade'en?

<sup>10</sup>Xjats ja y'adsoji ja nwindson'ajtim Jesús:

—¿Pø møj maestrims mets ya israelit kajpkixy, jøts mets yø yjade'embi xkanimadøy?

<sup>11</sup>Janch øts idø'øn nwa'añ, jøts ku øøts ja' nnigajpxy midi øø

nnija'wip, jòts nay ja' øòts  
nidestigi'ajtpy midì øø tø n'ixy;  
jòts meets ja xkajanchjawì sà øø  
njawà'añ. <sup>12</sup>Nika' xjanchjawidì  
ku øts ja'abaat ndyimyjanigajpxy  
ti jaty yà naxwiin, ìti ja'ats mee  
mjaakjanchjawip ja tsajpjøtpyit yja'  
ku meets njadukmado't?

<sup>13</sup>Ka'axi jap pøn y'ats'øch jap  
tsajpjøtpy, øts idø'on jap tsoo'mp  
kumi øts jap'ajtp jap tsajpjøtpy; jòts  
øts ja naxwii'ñit jaa'y ngudanaapy.

<sup>14</sup>Jòts nayide'en ø nyiktu'unt sam  
ja Moisés ojts ttuñin ja tsa'a'ñ jam  
abak etjotp ku ja ojts køjxp tiyji'iky,

<sup>15</sup>jòts ja kyawindigø'odyit pøni  
pøn ø xjanchja'widip, xemikøjxp ja  
tpaattit ja kunuu'kxy jujky'ajtin ja  
kunu'u'kxy chinaa'yin.

**Pyayøøpy ja Dios ja naxwii'ñit jaa'y**

<sup>16</sup>Janch møk ja Dios tsojkin  
tjagyepy, jòts tpikta'aky ja  
pya'ayo'owin yà naxwii'ñ ku ja  
y'U'nk tkexy midì tu'umchi, jòts  
ja kyawindigø'odyit pøni pøn ja  
tjanchja'widip, jòts ja xemikøjxp ja  
kunu'u'kxy chinaa'yin ja kunuu'kxy  
jujky'ajtin tpaattit. <sup>17</sup>Kidi ja'ajip  
ja Dios y'U'nk tyaniguejpxy yà  
naxwii'ñ jòts ayo'on ja ttukpaatt  
ja naxwii'ñit jaa'y, jade'en'ampy  
ja tkexy jòts ja tyiknitso'ok'att ja  
naxwii'ñit jaa'y.

<sup>18</sup>Pøni pøn tjanchja'wip  
ja Dios U'nk, ka'ap ayo'on ja  
yiktaguwani; pønts tkajanchja'wip,  
ja' y'ayo'on kutujkp xemikøjxp  
ja'agøjxp ku tkajanchja'wiyidì  
ja Dios y'U'nk midì tu'ugyi.

<sup>19</sup>Pøni pøn tyimyjade'en'ajttip,  
tø y'ayo'on ja kyutujknidì, ku  
ja myiin yà naxwii'ñ midì ja

jaa'y øy tsuj tyikwinmaa'nbyatp,  
ka'ap ja yikupijky. Ne'egi ja  
kubel'ets'ajtin kugoots'ajtin ja  
ne'egi chojktip, ja'agøjxp ku  
ja tyumjaka'øybi ttunwa'andi.

<sup>20</sup>Niduki'iyi pøn ja tyumjaka'øybi  
ttundip, kawin'ijxyim ja tjawidì ja  
yik'øwyinmaa'nbyatpi. Niwine'enin  
ja tkamijotwa'andi ja'agøjxp jòts  
kyanigaxø'øktit ja kya'ødyu'unindì.

<sup>21</sup>Pønts ttsinaadyip ja tyiibyì  
yjanchpi, ja'ats tmijotwandip midì  
øy tsuj tyikwinmaa'nbyatp ja jaa'y,  
jòts ja tyiknigaxø'øktit ja Dios yja'  
ti jaty ja tyundip.

**Ku ja Juan Bautista jadigojk  
tkajpxpaaty ja Jesús yja'**

<sup>22</sup>Kuts idø'on ja jade'en y'ukjajty,  
xjats ja nwindson'ajtim Jesús ojts  
tmøodi ja pyabøjkpitøjk jam Judeit  
naxjotp. Ñiyjeki ja jam tyaa'nidøø  
jòts ja jam møøt yiknøbajttøø.

<sup>23</sup>Jòts ja Juan nay ixam ja wyinaty  
yiknøbatmi ixam Enón midì ja  
Salimit kajp myiwingon'ajtpy,  
ja'agøjxp ja jam yiknøbety ku ja  
nøø jam janch kom; jamts ja jaa'y  
myendi jòts ja jam y'atsnøbatti.

<sup>24</sup>Jawyeenip idø'on ja jade'en  
yjaty, ka'anim ja Juan wyinaty  
yikpikta'aky puxøjkjotpy.

<sup>25</sup>Jòts nay winet ja Juan pyabøjkpi  
winaagin tnadyamigajpxyidì møøt  
ja myigu'uk israelit jaa'dyi, ja' ja  
tnadyamigajpxyidip sà ja pøky  
wya'ach. <sup>26</sup>Nay winets ja Juan  
y'atsiyknimaay:

—Windsøn, ixam ja ixyam  
yiknøbety pøn mets jam wyinaty  
møøt xøbidsimy mǎ ja Jordángit  
nøø, ja' pøn mets ojts xnigajpxy jòts  
niduki'iyi jaa'y ja yjanchpabikyiyi.

<sup>27</sup>Xjats ja Juan ja tnimaay:

—Ka' pøn ti tniyjaty pøni ka'ap Dios myø'øyi. <sup>28</sup>Meetsxi ojts wa'ats kø'øm xtyimyadø y ku ø nwa'añ jøts ku øts ka' nCristo, jøts ku ø nja'aji pøn jawyeen yikajxp nugo. <sup>29</sup>Janch tsuj øts, janch xondakp øts, jade'en ejxim ja tø'øxmyiyø'øbyi tyik'amajtski myigu'uk; jade'en øts nnayjawi y kuts nmadø y ja Jesús y'ayuujk. <sup>30</sup>Yø' møjtokipnim jøts øts kuwani n'amutskit, kuwani n'ixnøjkxt.

**Ja' pøn tsoo'mp jap tsajpjøtpy**

<sup>31</sup>Ja' pøn tsoo'mp jap tsajpjøtpy, tum ja' tuki'iyi tnitanaapy. Jøts pøn ya naxwiiñ'ajtp, ja naxwii'niits ja ja'ajtp, jøts tum ja'ayi ja ñigajpxpy ti jaty ja ejtp. Pønts tsoo'mp jap tsajpjøtpy, ja' tuki'iyi tnitanaagyøxp, <sup>32</sup>jøts tum ja' ja ñigajpxpy midi ja tø t'ixy, midi ja tø tmadø y; jøts ka'ap ja pøn tjanchjawi midi ja ñigajpxpy. <sup>33</sup>Kuts ø y pøn tjanchjawi, ja'ats wa'ats tyikniga'axp jøts ku Dios tkajpxy ja tyi'byi yjanchpi; <sup>34</sup>Dios kyajpxy Dios y'ayuujk ja kyajpxip pøn ja Dios kajxip, kumi amuum y'Espiritu Santo ja myø'øyi. <sup>35</sup>Chøjkpy ja Dios Teety ja y'U'nk, jøts tuki'iyi tø ttigidøjkigyixy ti jaty ejtp ka'ejtp. <sup>36</sup>Pøni pøn ja Dios U'nk tjanchja'wip, xemikøjxp ja nøjxk tpaaty ja kunuu'kxy jujky'ajtin ja kunuu'kxy tsinaa'yin; pønts tkajanchja'wip, kawindem xøøw ja nøjxk tpaaty ja yjade'embu jujky'ajtin, ja Dios myø'k'ayo'on ja nøjxk kyupøjkyp.

**Ja Jesús jøts ja Samariit tø'øxy**

**4** Xjats ja fariseotøjk tnija'widøø jøts ku ja nwindson'ajtim

Jesús may pyabøjkpitøjkni, jøts may jawaani ja jaa'y tyiknøbety jøts nigidi ja Juan jade'en; <sup>2</sup>ø y idø'on nwindson'ajtim Jesús ja kø'øm tkidyimyiknøbety, ja pyabøjkpitøjkts ja tyiknøbajttip. <sup>3</sup>Xjats ku ja tniomadøø y jøts ku ja fariseotøjk tø ñijawiyi, winets ja chøø'ñ jam Judeit naxjotp, jøts ja ojts ñijkxy jam jadigojk Galileit etjotp.

<sup>4</sup>Ja Samariit et ja tyanaxp ku dø'øn ja jam ñijkxy. <sup>5</sup>Xjats ja yja'jty ma ja kajp jam tu'uk Samariit etjotp midi txøøw'ajtp Sicar, jam wingon ma ja Jacob ja y'u'nk José wyinaty tø tmø'ø y ja ñaajx. <sup>6</sup>Jamts idø'on tu'uk ja nømu'ut midi yiktejp Jacob nømu'ut. Jøts kumi jøtkøjxp ja nwindson'ajtim Jesús wyinaty ku ja yø'ø y, xjats ja y'ixaajky jam nømu'ut agø'øm. Ja dø'øn wyinaty ja xøøw kujky. <sup>7-8</sup>Winets yja'jty tu'uk ja tø'øxyøjk jam nømu'ut agø'øm pøn ku'etip kugajpip jam Samaria, jøts ja nøø ja tjuutwa'añ, xjats nwindson'ajtim Jesús ja ojts ñii'mxyi:

—Møøky øts nøø.

Jøts ja pyabøjkpitøjk, jam ja wyinaty tø ñøjkxti jam kajpjotp, jøts ja t'atsju'udyit ja kaaky ja jii'kxy.

<sup>9</sup>Xjats idø'on ja samariit tø'øxy tniimaay ja nwindson'ajtim Jesús: —¿Sudso mets nøø x'amidø y jøts m'israelitjaa'yits mets jøts øts samariit jaa'y?

(Kumi ka'ap ja israelit jaa'y tminamyayidi ja samariit jaa'y.)

<sup>10</sup>Winets ja yide'en y'adsojøø ja nwindson'ajtim:

—Kuk xjanchñijawit midi ja Dios yajkpy, uk xnijawit pøn nøø



ixa m'amidojyip, ¿ja ti jajik me xka'amidøy jøts me nmo'ot ja øybi nøø ja wa'atspi?

<sup>11</sup>Jøts ja tø'øxyøjk ja ñimaajyøø:

—Ni mdanøja'ap paat mets kya'ity, jøts køjnk yø nømu'ut. ¿Mats idø'on xpøkwa'añ ja nøø midi mdijpy øy wa'ats? <sup>12</sup>Ja ndeety'ap Jacob øøts yø nømu'ut xukmidaan mā jaa ja y'ijty kø'øm y'uuky, jøts y'u'nk y'una'jk, jøts jyiyujk chakaa nayide'en. ¿Ti mjaaktyimbyønts me ndejin?

<sup>13</sup>Jøts ja nwindson'ajtim Jesús ja t'adsøøy:

—Pøn jaty ya'at nøø t'uktip, tøødsidip ja jadigojk; <sup>14</sup>pønts t'ukp ja øybi ja wa'ats nøø midi ø nyajkpy, ka'ap tøødsi nijuuni y'ukpaajtniyit. Kumi jade'en ja nøø pyidsø'ømt jam y'anmija'wingøjxp mididi øts ja nmøøpy, sam kom nøø pyidsimyin. Ja'ats ja xemikøjxp tukpaadiyip ja jujky'ajtin jøts ja øy'ajtin.

<sup>15</sup>Winets ja tø'øxyøjk ja ñimaajyøø:

—Yø'øbi nøø øts teety xmo'op, jøts ø nga'uktøøjtsiñit nijuuni, jøts ø nga'ukmenit nøgombi ya nømu'utjøøjty.

<sup>16</sup>Jøts ja nwindson'ajtim Jesús tnimaay:

—Nøjkx mniyaa'y x'atsway jøts ya mme'ent.

<sup>17</sup>Xjats ja tø'øxyøjk y'adsoojøø:

—Ka' øts nniyaa'y.

Jøts ja nwindson'ajtim Jesús tnimaay:

—Janch tiigyajpxy idø'on mwa'añ jøts ku ka'ap mniyaa'y pøn; <sup>18</sup>kumi nimagoxk tø xyiknaxy ja yaa'dyøjk, jøts pøn ixyam møøt, ka'ats ja

xniyaa'yi. Jøts ku jade'en tø mwa'añ, janch tiigyajpxy idø'on yø'.

<sup>19</sup>Kuts ja tø'øxyøjk jade'en tmadøøy, jøts ja wyaañ:

—Mets teety, wa' mets idø'on yjawi Dios mets idø'on kyugajpxy.

<sup>20</sup>Wine'enin øø nsamariitjaa'y'aty, ya øøts ja n'aptøjk twindsø'øgidi ja Dios ixya kojpkijxy, meetsts wine'enin mee m'israelitjaa'y'aty, jade'en mee mwa'añ jøts øøts ja jam nwindso'øgit Jerusalén.

<sup>21</sup>Jøts t'adsøøy ja nwindson'ajtim Jesús, jøts ja tø'øxyøjk yiknøjmi:

—Øy xkamibøkt, wingomp idø'on jøts meets xwindso'øgidit øy madsoo ja Dios. Ka' pyaat'aty jøts kuwani mdyimye'endit ya kojpkijxy uk mnøjkxtit jam Jerusalén. <sup>22</sup>Meets samariit jaa'y,

ka' mee xnijawi pøni ti mee mwindsø'jkip; øøts, nnija'wipts

øøts mididi øø nwindso'jkip; jabi israelit jaa'yts ñikøjxp myiñ ja nitso'ok'ajtin. <sup>23</sup>Ixyamts ja xøøw

ja jumøjt tø yja'aty, jøts ku nayi Dios myøk'ajtingøjxp nay ja'

tyiy'ajtingøjxp yikwindso'øgit ja Dios Teety, pøni pøn

tjantyimwyindsø'jkidip ja Dios. Jade'en ja ttsøky jøts ja jade'en

ttu'undit pøni pøn ja windsø'jkiiyp. <sup>24</sup>Tu'ugyi tum jade'en Dios

jøts myøk'ajtin; jøts pøn ja windsø'jkiiyp, nay ja møk'ajtints

ja yiktu'undip møøt ja tyiiby yjanchpi.

<sup>25</sup>Xjats ja tø'øxyøjk wyaañ, jøts yiknimaay ja nwindson'ajtim:

—Nnija'wip øts jøts ku mye'ent ja Mesías —midi tyijpy Cristo,

midi memp yiknitsokpi—; jøts

ku ja mye'ent, ja'ats tuki'iyi  
xukmadoogøjxim.

<sup>26</sup>Jøts nwindson'ajtim Jesús ja  
tnimaay:

—Øts ja', øtsxi dø'on, ejx idø'on  
ixya nmigajpxy.

<sup>27</sup>Winets ja nwindson'ajtim  
pyabøjkpitøjx yja'ttøø, jøts ja  
ñigyumaap tja'widi ku tø'øxyøjx  
ja møøt myadya'aky. Ka'ats pøn  
ñay'a'ejxiyi jøts ja tyiktøøt ti  
chøjxpy uk ti ja tø'øxyøjx møøt  
ñadyamigajpxyi. <sup>28</sup>Xjats ja tø'øxyøjx  
jamyi tnikejky ja chiyy, jøts ja ojts  
ñijkxy jam kajpjotp. Jamts ja jaa'y  
ja ojts t'atsnøjmi:

<sup>29</sup>—Mendi jøts jaa'y tu'uk  
x'lats'ejxtit pøn ø tø xukmadø  
tuki'iyi sa jaty ø tø n'adi'ich. ¿Kidi  
ja Cristip idø'on ja ndejin, midi ja  
Dios tkajxp?

<sup>30</sup>Winets ja jaa'y choo'ndøø jam  
kajpjotp, jøts ja ojts tninøjxkti  
ja nwindson'ajtim Jesús ma ja  
jam wyinaty. <sup>31</sup>Jøts idø'on  
pyabøjkpitøjx ja ixam ñii'mxyiyi  
møk'ampy:

—Windsøn, øy iyy wine'enin  
mga'aty.

<sup>32</sup>Yide'ents ja ojts ñii'mxyidi:

—Ja øts ngaaky njiik'kxy midi øts  
inet nga'apy njøø'kxp, ka' meets ja  
xnijawi.

<sup>33</sup>Xjats ja pabøjkpitøjx agø'ømyi  
ñayiktøøbinaxwa'jkidøø, jøts ja  
ñawyaajnidøø:

—¿Wan ndejin pøngapøn ja  
kyaaky tø tyanimiñi?

<sup>34</sup>Yide'ents ja nwindson'ajtim  
Jesús ja tnimaay:

—Ja' øts idø'on ngaaky'ajtpy  
njiik'kxy'ajtpy ku øts ja nbaduujnit  
ja y'ana'amin pøn tø xkexy jøts

øts tyunk ja nyik'abajtiyt. <sup>35</sup>Pø  
yide'enxi mee mwa'añ: “Ja maktaxk  
po' kya'ity jøts pikta'aky pyidø'økt”;  
øtsts wamp jøts mee nnøjmi: Ejxti  
yø kam midi ni'ipy, tø pikta'aky  
myøjaagøjxni jøts pyidø'øknit.

<sup>36</sup>Yikmijuupy ja' pøn ttunk'ajtp  
ja pikta'aky jøts ja tyikpidi'iky;  
jøts ja pikta'aky midi yikpidi'kpy,  
ja' ja wya'añ jøts ja xemikøjxp  
tyu'unt. Jøts ja jade'en ni'amuki  
ttajotkujk'attit pøn neptip jøts pøn  
tyikpidø'ktip ja pikta'aky. <sup>37</sup>Pø  
janch tamxi dø'on ja' ku ayuujk  
wya'añ: “Wenkpi ja pikta'aky  
tnepp, jøts wenkpi ja tyikpidø'økp.”

<sup>38</sup>Jamts meets idø'on nguexy jøts  
ja pikta'aky xyikpidø'øktit ma  
ka'ap tø mne'lepti; jabi wenkpi tø  
yjatundi yjapøkti jøts meets tyunk  
ja xaxojniyi.

<sup>39</sup>Mayts idø'on ja jamit jaa'y  
tjanchja'widøø ja nwindson'ajtim  
Jesús pøn idø'on jam kugajp'ajttip  
ja'abi kajp midi jam Samaria,  
ku ja tø'øxyøjx ja wyinaty tø  
tyimñii'mxyidi tiy janch, ku ja  
wyinaty yide'en tø wya'añ: “Tø øts  
ja tuki'iyi xukmadooguixy sa jaty  
ø tø n'adi'ich, sa jaty njaa'y'aty.”

<sup>40</sup>Xjats ku dø'on ja samariit  
jaa'y jam myendøø, jøts ja møk  
tnimaadyøø ja nwindson'ajtim  
Jesús jøts ja jam myøøtaa'niyidit.  
Winets ja nwindson'ajtim Jesús jam  
tyaa'niyiñ majtsk xøøw. <sup>41</sup>Jøts ja  
jaa'y may tjaaktyimyjanchja'widøø  
ku ja tyimyadowdi sa jaty ja kø'øm  
ñii'mxyidi. <sup>42</sup>Jøts ja tnimaadyøø ja  
tø'øxyøjx:

—Ndyimyjanchja'wipnim øøts inet.  
Kidi ja'ajip øøts nugo njanchja'wip  
sa jaty mee tø mwa'añ ku øø tø

xukmadø. Pø tøxi øøts yø yam kø'øm njaaktyimyadø sa yø wya'añ. Tøts øøts nnijawi jøts ku yø janch Cristo, pøn naxwii'ñit jaa'y tyiknitsokp.

**Ku ja Jesús tyiktsøøjký  
tu'uk ja windsøn y'u'nk**

<sup>43</sup>Xjats ku kyimajtskxøøw'ajty, jøts ja nwindson'ajtim Jesús chøø'ñ jam Samariit etjotp, jøts ja ojts yjaaktyimñijkxy jam Galileit etjotp.

<sup>44</sup>Jøts idø'on ja jade'en yjajty sam ja nwindson'ajtim Jesús wyinaty kø'øm tø wya'añin, jøts ku ja Dios kyugajpxy ne'egi ka'ap yikupiky jam kyø'ømgajpkøjxp. <sup>45</sup>Kuts ja nwindson'ajtim yja'ljty jam Galileit etjotp, jøts ja jamit jaa'y, chojktip ja' ku ja jam yja'ljty, kumi tø ja wyinaty y'atsxøbaatnidi Jerusalén ku ja paski xøøw jam wyinaty tø ñaxy. Tøts ja wyinaty tuki'iyi t'ejxkøxti ti jaty jam wyinaty tø ttuñ ja nwindson'ajtim Jesús ku ja xøøw jam ñajxy.

<sup>46</sup>Xjats ja nwindson'ajtim Jesús ojts ñijkxy jadigojk jam Caná midi nay jam Galileit etjotp, mā ja wyinaty ja tsujkx nøø tø t'ukyikvinojaty. Jøts jamts idø'on tu'uk møj windsøn tyumbimi midi nayide'en windsøn, ja'ats idø'on y'u'nk jam wyinaty pøjkíp Capernaum.

<sup>47</sup>Xjats ku ja tñimadøøy jøts ku ja nwindson'ajtim Jesús jam wyinaty tø yja'aty Galilea, jøts ku ja chøøñ Judeit etjotp, winets ja ojts t'ats'ixy jøts ja møk t'atsnøjmi jøts ja tmøødit jam tyøkwindum, jøts y'u'nk ja yiktso'ogiyit pøn wyinaty tyimy'ooki'ímni. <sup>48</sup>Jøts

nwindson'ajtim Jesús tñimaay ja jaa'y:

—Ka' meets janchja'win xjagyepy. Yø'øyi meets ja'ayi m'ijxpy yø milagri'ajtin.

<sup>49</sup>Yide'ents ja ñimaajyøø ja jaa'y pøn ja windsøn tyumbi'ajtpy: —Men teety tsojk, namga'anim øts n'u'nk y'øøky.

<sup>50</sup>Winets ja nwindson'ajtim tñimaay ja jaa'y:

—Wimbejtñi, nøjxni jam mdøjkwindum. Jujky'ajtp inet ja m'u'nk.

Xjats ja tjanchja'wiyi'ñ ku nwindson'ajtim Jesús ja jade'en ñimaajyøø, jøts idø'on yjanchnijky.

<sup>51</sup>Jøts ku ja wyinaty yja'atwani jam tyøjkwindum, winets ja tyumbitøjk ja ojts pyatsøyyi, jøts ja ojts ñi'ímxyiyi: —Jujky'ajtp m'u'nk.

<sup>52</sup>Jøts ja tyiktiy ti hori dø'on ja y'u'nk wyinaty kujk tø myøkpøjk'okw'a'añ, jøts ja tñimaadyøø: —Uxø'øyip ja'ani, ja dø'on ja xøøw wyinaty waani yjopta'aky ku ja jøøn wyinajki'jxy.

<sup>53</sup>Xjats ja u'nkteety ojts tja'myech jøts ku nay ja'abi hori ja nwindson'ajtim Jesús wyinaty tø ñi'ímxyi: “Jujky'ajtp ja m'u'nk”; jøts niduki'iyi wine'enin y'u'nk ñidø'øxy y'u'nk y'una'jk ja jam møøt, jadine'en ja ojts tjanchjawidi ja nwindson'ajtim Jesús.

<sup>54</sup>Jøts idø'on jade'en mimajtsk ja milagri'ajtin kujk ttuñ ja nwindson'ajtim Jesús jam Galilea. Tø ja wyinaty chøøñ Judea.

**Ku ja Jesús tyiktsøøjký tu'uk  
køxujxpi pakxujxpi**

**5** Xjats ku dø'on jade'en y'ukjajty, jamts idø'on israelit

jaa'y wyinaty ttumidi xøøw, winets ja nwindson'ajtim Jesús wyimbijty, jøts ja ñijkxy jadigojk jam Jerusalén.

<sup>2</sup> Jam tøjkaaw tu'uk ja'abi kajp midi yiktejp Borreek Tyøjkaaw, jøts nay jam wingon tu'uk ja pili midi hebreit ayuujk yiktejp Betesda, magoxk ja tøjkaaw ja tmøodi.

<sup>3</sup> Jamts ja maabyamaa'y kyo'knidi; pøn winapti, pøn pakma'atti, pøn køxujxtip pakxujxtip. Jøts ja jam t'awejxti ja nøø kunim ja y'adø'øtst. <sup>4</sup> Atskidakpts idø'on ja ankilis jam tu'uk pili agø'øm, jøts ja t'atsyik'adi'ich ja nøø. Kuts pøn pamaa'y jawyeen ñidøki, najxpts idø'on pya'am ja', øy ja ti pa'am yjadyimyjapiky. <sup>5</sup> Jøts pamaa'y jam wyinaty tu'uk pøn wyinaty ee'pxmajktuktujk jumøjtíp ja pa'am pyaadyi. <sup>6</sup> Xjats ku nwindson'ajtim Jesús ja ojts t'ejxpaaty jøts ku ja jam kyo'kni, jøts ja t'ejxkajpy jøts ku pa'am ja wyinaty jadine'en jeky tmi'ejtni, jøts ja ojts tnøjmi:

—¿Mdsøjky tsoojkin?

<sup>7</sup> Jøts ja pamaa'y ja ojts yide'en y'adsøyi:

—Me teety, tyimñipøn øts pøn ø xnøyiktøkip jap nøøjøtpy ku yø nøø yja'ats'adi'ich. Yam ø njatøkiwyami jøts jatyi wenkpi ñødøki.

<sup>8</sup> Jøts ja nwindson'ajtim Jesús tnimaay:

—Pidø'øk, wejtsjø'øk yø mmaabajt jøts mnøjkxnit.

<sup>9</sup> Jøts nay jatyi chøøjky ja jaa'y, ojts tyikpidi'iky midi ja jam tyamaapy jøts ja ojts yø'øcho'oni. Jøts kumi poo'kxin xøøwts wyinaty, <sup>10</sup> winets ja israelit jaa'y tnimaadyøø ja jaa'y pøn wyinaty tø myøkpiky:

—Poo'kxin xøøwxi yam; jøts ka'ap pyaat'atyi xtsømwidett yø mmaabajt.

<sup>11</sup> Xjats ja t'adsøøy:

—Ja' ø tø xnøjmi pøn ø tø xyiktsø'øky: “Yikpidø'øk yø mmaabajt jøts mnøjkxnit.”

<sup>12</sup> Jøts ja yiknimaay:

—¿Pøn idø'on tø mnii'mxyi: “Yikpidø'øk yø mmaabajt jøts mnøjkxnit”?

<sup>13</sup> Jøts ja jaa'y pøn idø'on wyinaty tø chø'øky, ka'ap ja tñijawi pøni pøn idø'on ja wyinaty tø yiktsø'øgyi. Jøts janch may jaa'yts jam, jøts ja nwindson'ajtim Jesús tøym ja jam wyinaty cho'oni.

<sup>14</sup> Jøts ja nwindson'ajtim Jesús jadigojk tpaajty ja jaa'y jap tsaptøjkytpy midi ja wyinaty tø tyiktsø'øky, jøts ja tnimaay:

—Øyim yikxon xmado'ot, ejx idø'on ixa tø mdsø'øky, kidi m'ukpøkyuni jøts kidi ti mjaty ku jawaani ka'øy mdyimy'ukjajtnit.

<sup>15</sup> Winets ja ñijkxy pøn tø chø'øky, jøts ja ojts ttukmadøy ja israelit jaa'y, jøts kudam idø'on ja yja'aji ja Jesús, pøn ja wyinaty tø yiktsø'øgyi.

<sup>16</sup> Ja'agøjx idø'on ja israelit jaa'y y'ijty tpawidetti ja nwindson'ajtim Jesús, jøts ja ttuku'oogiwya'andi ku dø'on ja jade'en y'adi'ich poo'kxin xøøw. <sup>17</sup> Yide'ents nwindson'ajtim Jesús ja ñimaajyidøø:

—Yam paat øts idø'on ndeety tyuñ, paty øts idø'on nayide'en nduñ.

<sup>18</sup> Yø'øts idø'on ja israelit jaa'y masi tyuku'oogiwya'andip ja nwindson'ajtim Jesús. Kidi nugo ja kutujkipxi ja kyamøj'ijxpy ku ja poo'kxin xøøw, pø nayide'enxi ja ñabyikta'agyí sam ja Dios, ku ja wya'añ jøts ku Dios ja tyimdyeedyi.

**Jade'en ja Dios Teety ja  
kyutujk tmø'øy ja Dios U'nk**

<sup>19</sup>Winets ja nwindson'ajtim Jesús  
ja ñimaajyidøø:

—Janch øts idø'on nwa'añ  
jøts ku Dios U'nk ka' ti ttu'unt  
kyø'øm kutujkøjxp. Ja tyeety  
ja pyaduujnip yja' pøni sa ja  
kø'øm tnajtstuni. Tuki'iyi pøni  
ti tyumpy ja Dios Teety, nay  
ja'ats tyumpy ja Dios U'nk. <sup>20</sup>Pø  
yjantymchøjkpyxi ja Dios Teety  
ja y'U'nk, jøts ja tuki'iyi ttuk'ixy  
pøni ti jaty ja kø'øm tyumpy. Jøts  
yjaaktyimdyuk'ejx'adø'øtspnim  
ja' ja myøjpi ja y'øybi, midi meets  
ñigyumaap mjawidip. <sup>21</sup>Kumi  
nayide'en sam ja Dios Teety  
tyikjukkpyiky ja oo'kpi jadigojk,  
nayide'ents ja Dios U'nk tyaky ja  
juky'ajtin pøni pøn ja tyamidsøjkpy.  
<sup>22</sup>Jøts ka'ap Dios Teety tpayø'øy  
pøn, ja Dios U'nk ja tø ttaguwaní  
jøts ja' ja tø tmø'øy ja møk'ajtin jøts  
ja pyayø'ty, <sup>23</sup>ja'agøjxp nayide'en  
ja windsø'jkin yikmo'ot sam ja  
Dios Teedyin. Pøn tkamøjpiktakp  
ja Dios U'nk, nay ja Dios Teety ja  
kyamøjpiktakpy pøn tkajxp ja Dios  
U'nk.

<sup>24</sup>Tyíbyi yjanchpi øts idø'on  
nwa'añ: Pøni pøn øts ngajpxy  
n'ayuujk xyikmøjiyip sa jaty ø  
nwa'añ, jøts ku ja tjanchjawi pøn  
ø xkajxp, pyaap ja xemikøjxp  
ja kunuu'kxy'ajtin; jøts ka'ap  
ja yiktaguwanít jøts ja y'ayo'ot,  
tø ja ttanaxy ja o'jkin jøts ja  
tpaaty ja kunuu'kxy juky'ajtin  
ja kunuu'kxy tsinaa'yin. <sup>25</sup>Janch  
øts idø'on nwa'añ, jøts ku  
ixyam y'horipaaty ku ja jaa'y

tmadojídít ja Dios U'nk kyajpxy  
pøn jaty tkajanchja'widipnim;  
jøts kuts tmimado'odit, pyaattips  
ja kunuu'kxy juky'ajtin ja'adi.  
<sup>26</sup>Ja ku Dios Teety tjagyepy ja  
møk'ajtin jøts ja kø'øm tyaky ja'abi  
juky'ajtin, jøts nayi tøts møk'ajtin  
ja tmø'øy ja y'U'nk jøts ja tyakt  
nay ja'abi juky'ajtin. <sup>27</sup>Jøts tø  
ja tkutujkmø'øy jøts tiidyu'unin  
jøts payø'øyin ja ttu'unt, ja'agøjxp  
ku ja naxwiiñit jaa'dyi tkudani.  
<sup>28</sup>Kidits ya'at ñigyumaap xjawidi,  
pø ja'atpxi dø'on ja xøøw ja jumøjt  
ku ja jaa'y tmadojídít Dios U'nk  
y'ayuujk pøn windigøy ejtnidip,  
<sup>29</sup>jøts ja pyidsø'ømdit jap oo'kpi  
jutjøtpy. Pøn øy tø y'atsnaxwiiñ'aty,  
pidsø'ømdipts ja' jøts ja tpaattit  
ja kunuu'kxy juky'ajtin; pønts tø  
kyanaxwiiñ'aty øy, jukjpyøktipts  
ja nayide'en jøts ayo'on ja  
yiktaguwanídit.

**Y'ejxi tyiyi sa Jesús kyutujk tjagyepy**

<sup>30</sup>Niti nguidyimdyuñ  
ngø'ømwinmaa'ngyøjxp. Jade'en  
ø nduñ pøni sa nyik'ane'emy, jøts  
nimá kyadigøy øts ja ndiidyu'unin,  
øts ja nbayø'øyin. Jøts niti  
nguidyimdyuñ ngø'ømdsojkingøjxp,  
ja' øts idø'on ndumpy pøni sa  
ttsøky ja Dios Teety midi ø xkajxp.  
<sup>31</sup>Kuts ø kø'øm nnañtestigi'atit  
jøts ø kø'øm nnañkmyøjiwya'aniyit  
pøni sa ø njawa'añ, ka'ap yø ti  
tiy'ajtin tjagyepy. <sup>32</sup>Jaaxi ja' pøn ø  
xnitestig'ajtp, jøts øts ja xpudøki;  
jøts pøni sa ja wya'añ, nnija'wipts  
øts ja' jøts ku tiy janch ja wya'añ.  
<sup>33</sup>Meetsxi ojts xiibyiky ja Juan,  
jøts tiy janch ja' sa ja wya'añ ku  
ja y'adsøøy. <sup>34</sup>Kidits ja'ajip ø

nmøk'ajtpy øy pøn jaa'y ja tiy'ajtin tjayaky; jade'en'ampy øts idø'on jade'en nwa'añ jøts mnitso'ok'ajtin xpaattit. <sup>35</sup>Jade'en idø'on ja Juan y'lijty sam jaj yjajyin, jøts meets yjaj ja waani tø x'uktaxondakojiyi. <sup>36</sup>Njagyejpyts øts tiy'ajtin jawani ka'pxy sam øts ja Juan ojts xkanigajpxyin. Tuki'iyi ti jaty ø ndumpy, nay ja' idø'on yø' midi øts Dios Teety tø xa'ane'emy jøts øts ja ndu'unt, yø'øts tyanigaxø'kp jøts ku tyiyi yjanchi ku øts Dios Teety tø xkexy. <sup>37</sup>Nayi yajkpy ja Dios Teety tiy'ajtin nayide'en jøts ku øts ja xkexy, øy meets ja nijuuni xka'ijxñim, øy meets ja nijuuni xkamadøynim. <sup>38</sup>Jade'ents ja y'øgyajpxy ja y'øy'ayuujk ka' xja'gyukidinim, ja'agøjxp ku ja ka' xjanchjawidi pøn ja Dios Teety tø tkexy. <sup>39</sup>Janch ni'ejxi nibaadi meets Dios kyajpxy x'ixpøjkiyi, kumi jap meets ja xtyimyjapaatwa'añ ja kunuu'kxy jujky'ajtin midi xemikøjxp; jøts øts Dios kyajpxy jap xnimadya'aky, <sup>40</sup>jøts meets ka' xpabøkwa'añ ku njadukpaatwa'andi yø'øbi jujky'ajtin.

<sup>41</sup>'Ka' øts naxwii'ñit jaa'y y'agujkwindsø'jkin ngupøjkiyi. <sup>42</sup>Jøts njaaktyimñija'winip meets jøts ku meets Dios ka' xtsøky. <sup>43</sup>Ja Dios Teety ø ngudanaapy ku ø nmiñ, jøts meets xkagupiky; kuts mye'ent jadu'uk kyø'ømdsojkingøjxp, mgupøkpts meets ja ne'egi. <sup>44</sup>¿Ma meets ja janchja'win xmøøt'ajtnit, kumi mnagyupøjxip meets ja windsø'jkin xem yam, jøts ka'ap ja tu'ukpi Dios yja' y'ixajyidi jøts ja xyiktu'undit? <sup>45</sup>Jøts kidi mwa'andi jøts ku mee nni'øøn it jam Dios

Teety wyingujkp; ja Moisés ja' mee kø'øm mni'øø'niyip, pøn mee møk mjøp'ijxpy. <sup>46</sup>Kuk meets ja jeexyip xjanchjawi sa wya'añ ja Moisés, nayi tøts meets jeexyip nayide'en xjanchjawi, pø ja'axi ja Moisés ojts tja'ay jøts øts ja xnigajpxy. <sup>47</sup>Pøni ka'ats ja xjanchjawidi midi ja yjaay, ¿mats meets ja xjanchja'win it midi mee ndukmadøøpy?

### Ku ja Jesús tyikaay ja nimagoxk milbi jaa'y

**6** Xjats ku dø'on ja wyinaty jade'en tø yjaty, winets ja nwindson'ajtim Jesús ojts ñijkxy jam Galileit mejy pya'am, jam jaduktamajñ. Nay yø'øbi mejy idø'on yiktejp Tiberias. <sup>2</sup>Jøts may jaa'y ja jam ojts myøødiyi, kumi tø ja wyinaty yik'ixy ja myilagri'ajtin ku ja tyiktsø'øky ja pa'amjaa'y. <sup>3</sup>Jøts ja nwindson'ajtim Jesús pyatøjkiyii'ñ ma kojpk jam, jøts ja jam tmøøt'ixaajky ja pyabøjkpitøjk. <sup>4</sup>Pyaatwanipts wyinaty ja paski xøøw midi ja israelit jaa'y xyø'ajttip. (Ja' xøøw yja'myajtstip sam ojts y'awa'atspidsømdi jam Egipto y'etjotp.) <sup>5</sup>Jøts ku nwindsin'ajtim Jesús ojts t'ixy jøts ku may jaa'y ja pyamiñiyi, winets ja tnimaay ja pyabøjkpi Felipe:

—¿Mamts inet jadine'en njuu'yindit ja kaaky ja jii'kxy jøts yø jaa'y niduki'iyi kya'adyit?

<sup>6</sup>Jade'en'ampy ja jade'en wya'añ jøts ja t'uk'ijxy sa ja Felipe yjatyimy'ukwa'ant; jøts kumi Jesús, ñija'wipts ja kø'øm pøni sa dø'on ja ttu'unt. <sup>7</sup>Xjats ja Felipe ja y'adsojøø:

—Ku tsapkaaky majtsk magø'pxy denario juyin, niwine'en ja

kyidyimñibaadit oyik pøn  
wine'enin yiin waan tyaja'adiyit.

<sup>8</sup>Winets ja pyabøjkpi jadu'uk  
wyaañ pøn Andrés'ajtp, ja Simón  
Pedro y'uch:

<sup>9</sup>—Ixɣadam tu'uk mutsk mixyu'nk,  
magoxk cebadi tsapkaaky tmøodi  
jøts ajkxu'nk majtsk. ¿Ti windem yø  
mayjaa'y yø ndapaajtnam?

<sup>10</sup>Xjats ja nwindson'ajtim Jesús  
wyaañ:

—Nøjmidi niduki'iyi yø jaa'y jøts  
wan t'ixa'akti.

Janch miyjojt idø'n jam ja et, jøts  
ja yaa'dyøjk nimagoxk milin y'ixaktøø.  
Nika'ap ja tøøxyøjk yikmachø  
møøt ja y'u'nk y'unaj'jk. <sup>11</sup>Winets ja  
nwindson'ajtim Jesús tnixajiyi'iñ ja  
tsapkaaky, jøts ku ja ojts jawyeen  
ttukmøjawi ttukunu'kxyjawi ja  
Dios Teety, jøts ja ojts tmøøñim ja  
pyabøjkpitøjk. Ja'ats ja ojts tyikwa'kxti,  
jøts ja ojts tmo'odi niduki'iyi ja  
jaa'y pøn jam wyinaty tø y'ixa'akti.  
Nayide'en ja ojts tyikwa'kxti ja ajkx,  
jøts ja ojts tmøøgyøxti wine'enin ja  
køøom ttsokti. <sup>12</sup>Jøts ku y'abajtidøø  
kyujxidøø, jøts ja nwindson'ajtim Jesús  
tnimaay ja pyabøjkpitøjk:

—Pøkmukti tuki'iyi yø abu'xk  
midi jaty tø wyindañ, jøts kidi nugo  
ti wyindigø.

<sup>13</sup>Winets ja tpøkmuktøø, jøts ja  
makmajtsk kach ujts t'abøjkidyøø  
ja kaaky abu'xkuna'jk, midi  
wyinaty tø wyindañ ja magoxkpit  
cebadi tsapkaaky. <sup>14</sup>Xjats ja jaa'y  
wyandøø ku ja t'ejxtøø jøts ku  
ja nwindson'ajtim Jesús jade'en  
wyinaty tø ttuñ ja milagri'ajtin:

—Janch yø' tam idø'n Dios  
kyugajpxy'ajtpy pøn yiktejp  
me'emp ya naxwiñ.

<sup>15</sup>Jøts kumi yja'wiyii'nñts ja  
nwindson'ajtim Jesús, jøts ku  
ja jaa'y ja wyinaty aguwan  
yiknøjkxwa'añi, jøts ja  
yiktøkiwya'añi møj windson,  
winets ja ojts nadyu'uk yjiwa'aky  
jøts ja ojts ñijkxy jam kojpkøjxp.

**Ku ja Jesús ojts yø'øy  
jam mejwyingøjxp**

<sup>16</sup>Xjats ku ja et wyinaty tø  
kyoodsni, winets ja nwindson'ajtim  
Jesús pyabøjkpitøjk kyidaktøø  
jam mejy agø'øm. <sup>17</sup>Jamts ja  
ojts tyøkidi barkijotp, jøts ja ojts  
ttanaxwa'andi ja mejy, jam idø'n  
ja nyøjkxti Capernaum. Jøts janch  
xaachkootsni dø'n, jøts ka'anims  
wyinaty ja nwindson'ajtim Jesús  
wymbejtni. <sup>18</sup>Winets janch  
møk pyøjpina'axwa'knøø, janch  
jadi'iñi ja nøø pyidø'kni. <sup>19</sup>Jøts  
ku dø'n ja jam wyinaty ñaxti,  
magoxk uk tudujk mil xajkin tø  
yø'øñidi, winets ja t'ejxpattøø  
ja nwindson'ajtim Jesús jøts  
ku jam wingon ja barki tminiñ.  
Yø'øpy ja nøø wingøjxp, jøts ja  
yjantyimchø'jkidøø. <sup>20</sup>Yide'ents ja  
ñimaajyidøø:

—iØts idø'n, kidi mdsø'øgidi!

<sup>21</sup>Xjats ja yjotkukidøø, jøts ja ejtni  
xonni tyiktøjkidøø jap barkijøtpy,  
jøts ja pojn ojts yja'atti ma dø'n ja  
wyinaty ñøjkxti.

**Ku ja Jesús ja mayjaa'y ojts y'ixa'ayi**

<sup>22</sup>Jøts ku kyimjabom'ajty, jøts ja  
jaa'y pøn jam wyinaty tø tyandi  
jam mejy'am, jøts ja ojts tñijawidi  
jøts kudam ja nwindson'ajtim  
pyabøjkpitøjk wyinaty tø cho'onidi,  
jøts ku ja barki ja wyinaty tø

ttanøjkxti midi jam wyinaty tu'ugyi, jøts ku nwindson'ajtim Jesús ja nika'ap tmøodidyøø. <sup>23</sup>Jøtsnim ojts yja'atti wenkpi barki midi jam tso'ondip ma ja kajp jam txøowi Tiberias, jam wingon ma ja jaaly jam wyinaty ja tsapkaaky tø yikmo'odi, ku ja nwindson'ajtim wyinaty jawyeen tø ttukmøjawi tø ttukunuu'kxyjawi ja Dios Teety. <sup>24</sup>Xjats ku ja jaaly t'ejxtøø jøts ku ja nwindson'ajtim Jesús jam ka'ap pøn, jøts ni ja pyabøjkpitøjk jam kya'etti, winets ja ttatøjkidøø ja barki midi jam wyinaty tø yja'atti, jøts ja ojts ñøjkxti jøts ja t'ats'ixa'awa'andi jam Capernaum.

#### Ja Jesús amuum xyikjujky'ajtimp

<sup>25</sup>Jøts ku ja ojts yja'atti jam mejy agø'øm, jøts ja ojts tpaatti ja nwindson'ajtim Jesús, jøts ttiibyøjktøø:

—Windsøn, ¿windii mja'aty ya?

<sup>26</sup>Jøts nwindson'ajtim Jesús ja ñimaajyidøø:

—Janch øts idø'on nwa'añ, jøts ku meets ja'agøjxp x'ixa'ay ku mee ku'uxyi ojts mgay, jøts nigidi meets xja'gyukidi tigøjxp øts ojts ja milagri'ajtin nduñ. <sup>27</sup>Køjxp najxp kaaky jii'kxy y'lity, jøts kidi ja'abi xnidundi. Ja' ne'legi mnidu'undip midi xemikøjxp jajkp midi mmo'ojidip ja kunuu'kxy jujky'ajtin. Yø'øbi kaaky yø'øbi jii'kxy øts idø'on nyajkpy, pø øtsxi ja naxwii'ñit jaa'dyi ngudanaapy.

<sup>28</sup>Winets ja jaaly tyiktøødøø jøts ja tnimaadyøø ja nwindson'ajtim:

—¿Tits øøts idø'on ndu'ump jøts ja yiktu'unt pøni midi dø'on ja Dios chøjkpy jøts øøts ja ndu'unt?

<sup>29</sup>Jøts nwindson'ajtim Jesús ja y'adsoojidøø:

—Midi mdu'undip, ja' Dios chøjkpy jøts ja xjanchjawidit pøn ja tø tkexy.

<sup>30</sup>Jøts ja tjaaktyimdyiibyøjktøø, yide'en tnimaadyøø ja nwindson'ajtim Jesús:

—¿Ti ejxa'ants mbikta'akp midi øø n'ejxp jøts myikjanchjawit? ¿Ti dø'on mdu'ump? ¿Ti dø'on myik'øyip? <sup>31</sup>Ojtsxi adøm ja n'aptøjk tjøø'kxti ja jii'kxy jam abak etjotp sam ja Dios kyajpxy wya'añin ku ja ñimy: “Ojts Dios ja tsapkaaky ja tyukayidi midi tso'omp tsajpjøtpy.”

<sup>32</sup>Winets ja nwindson'ajtim Jesús ja ojts yide'en y'adsøyidi:

—Janch øts idø'on nwa'añ ku mee nnøjmi: Jøts kidi ja Moisésip ja', kidi ja'ajip ja ojts myø'øyidi ja tsapkaaky midi tso'omp jap tsajpjøtpy, pø ja Dios Teetyxi ja' pøn tyajkp tyimya'abi tsapkaaky midi tso'omp tsajpjøtpy. <sup>33</sup>Ja tsapkaaky midi Dios yajkpy, ja' idø'on tø kyida'aky jap tsajpjøtpy. Ja'ats yajkpy ja kunuu'kxy jujky'ajtin pøn jaty ya naxwiiñ'ajttip, pøn ya yjanchja'widip.

<sup>34</sup>Winets ja tnimaadyøø ja nwindson'ajtim:

—Teety, møøy'ejtik øøts yø'øbi tsapkaaky.

<sup>35</sup>Jøts nwindson'ajtim Jesús ja ojts ñii'mxyidi:

—Øts idø'on ja' sam ja tsapkaaky midi tmøøpy ja jaaly ja kunuu'kxy jujky'ajtin. Pøni pøn ø xnimemp, pøn ø xpabøkp, nijuuni yuuj xøøw ja tka'ext; pøni pøn ø xjanchja'wip, nijuuni tøødsi ja



tkagupøkt. <sup>36</sup>Jade'ents sam tø nnøjmidi, ka' mee xjanchjawī øy mee tø xja'ixy. <sup>37</sup>Niduki'iyi øts ja xnimendi pøn øts ja Dios Teety xagødøjkp; jøts ja'adi pøn øts idø'on jade'en xnimendip, ka' øts ja mibaat ngajxpidsimy. <sup>38</sup>Kaja'ajip øts jap tsajpjøtpty tø nnidsøøn jøts øts ja ngø'ømwinmaa'ñ nyiktu'unt, pø ja' Dios Teetyxi øts ja yja' nduujnip pøn ø xkajxp. <sup>39</sup>Jøts ja' idø'on ja chøjkpy jøts ø ni tu'ugin nga'ejxigø'øty pøn jaty øts ja tø xagødøki, jøts øts ja nyikjujkyøktit ku wyinaty ja naxwii'ñit kyøjxnit. <sup>40</sup>Jøts nay ja' ja chøjkpy jøts niduki'iyi tpaattit ja juky'ajtin midī xemikøjxp pøni pøn t'ejxip tñija'widip, pønts tpabøktip ja Dios U'nk, jøts øts ja ñiyikjujkyøktip ku naxwii'ñit kyøxt.

<sup>41</sup>Winets ja israelit jaa'y tyabagajpxpinaxwa'akti ja nwindson'ajtim Jesús ku dø'on ja wyaañ: "Øts idø'on ja', ja tsapkaaky midī kidakp jap tsajpjøtpty." <sup>42</sup>Jøts wyandøø:

—¿Kidi ja Jesúsip yø' pøn José myajnk'ajtpy? Pø nñija'wimts adøm tyeety tyaaq yø'. ¿Sudso yø jade'en wya'añ jøts ku yø tsajpjøtpty kyida'aky?

<sup>43</sup>Xjats ja nwindson'ajtim Jesús ja tnimaay:

—Majstututti yø pagajpxk.

<sup>44</sup>Ka'ap øts pøn nugo ajawī xtyimñimiñ pøni ka'ap øts Dios Teety ja kø'øm xagødøki pøn ø xkajxp; jøts øts ja jaa'y nyikjujkyøkt ku wyinaty ja naxwii'ñit kyixy. <sup>45</sup>Yide'en ja Dios kyugajpxy ñøky wya'andi: "Dios ja niduki'iyi yik'ixpøkidip." Jade'ents

øts ja xnimendi pøn jaty ja Dios Teety y'ixpøjkin tmadojidip, pøn jaty ja tñija'widip.

<sup>46</sup>Ka'axi pøn t'ixy ja Dios Teety; pø ja'ayixi ja nadyu'ugyi t'ejxp pøn nay jam tso'omp mā Dios. <sup>47</sup>Jøts tyiiby øts idø'on nwa'añ jøts mee nnøjmi, pøni pøn ø xjanchja'wip, ja'ats idø'on tpatp ja tsinaa'yin midī xemikøjxp. <sup>48</sup>Øts idø'on ja' sam ja tsapkaaky. Øts nyajkpy ja kunuu'kxy tsinaa'yin ja kunuu'kxy juky'ajtin. <sup>49</sup>Ojtsxi ja m'aptøjk tkaydi ja tsapkaaky jam abak etjotp, jøts ja jade'enbaat y'o'jkøjxtøø niduki'iyi; <sup>50</sup>ja tsapkaakys midī ø ndijpy ja tsajpjøtpty kidakp, jøts ku ja pøn tka'adyit, ka'ats ja y'anmija'win wyindigø'ødyit. <sup>51</sup>Øts idø'on ja kø'øm yø'øbi tsapkaaky midī tø kyida'aky jap tsajpjøtpty; jøts ku pøn tka'aty yø'øbi tsapkaaky, xemikøjxp ja yjujky'att. Ja'abi tsapkaaky øts idø'on ñamyayi nyakp, ku øts ja nne'kx ku øts ja nni'jpy ndagømøøyt ja naxwii'ñit jaa'y jøts tpaattit ja nitso'ok'ajtin.

<sup>52</sup>Winets ja israelit jaa'y agø'ømyi tkajpxy'ajtpinibøjkidyøø, jøts ja ñawya'añidi:

—¿Sudso ñe'kx sudso ñi'jpy yø xmøøwya'añin jøts ja nga'ayin njøø'kxin tsapkaagyin?

<sup>53</sup>Winets ja nwindson'ajtim Jesús ja ojts ñi'mxyidi:

—Øts idø'on wamp, pøni ka' øts nne'kx xjøø'kxidi nni'jpy x'uukti, ka'ats ja nitsoojkin xpaattit. <sup>54</sup>Pøni pøn nne'kx xjøø'kxip nni'jpy x'uukip, ja'ats ja kunuu'kx juky'ajtin tpaattip; øts nyikjujkyøktip ja' ku naxwii'ñit kyøxt. <sup>55</sup>Kumi jade'en'ampy

ja mək'ajtin xjagyaptit ɔts nne'kxkəjxp nni'jpkəjxp. <sup>56</sup>Pəni pən ɔts nne'kx xjə'kxip nni'jpy x'luukip, xemikəjxp ɔts nmə'ott n'ett. <sup>57</sup>Ja Dios Teety pən ɔ xkajxp, ja' tmə'ot'ajtp ja jujky'ajtin, ja'agəjxp ɔts njujky'aty; jəts nayide'en pən ɔts nne'kx nni'jpy xjə'kxip, nay ɔts kəjxpxi y'etti. <sup>58</sup>Ja'abi tsapkaaky ɔts idə'on nnigajpxpy midi kidəkp jap tsajpjətpy. Ka'ap yə nāyide'eni sam ja tsapkaaky midi meets ja m'aptəjk ojts tkaydi, jədsyim ja ojts niduki'iyi yjadyimy'oookti; pənts tkaapy yə'əbi tsapkaaky midi ɔ ndijpy, pyaatpts ja jujky'ajtin ja' xemikəjxp.

<sup>59</sup>Jam idə'on ja nwindson'ajtim Jesús yə yjade'embixpəjkin tyajky ma ja ja'a'y nāmyukyidi tsaptəjkjətp, jam Capernaumit kajpkəjxp.

**Yə'at ayuujk xuknija'wimp ja ɔchina'a'yin midi xemikəjxp**

<sup>60</sup>Kuts ja pyabəjkpitəjk jade'en tmadowdi ja xpəjkin pən jam wyinaty tpawidejtipp ja nwindson'ajtim Jesús, jəts ja wyandə:

—Ku yə jade'en wya'añ, janch tsep yə' jəts yə yikupəkt; ɛpən yə jade'en tijy ukməjpikta'akip?

<sup>61</sup>Xjats ja nwindson'ajtim Jesús tja'wiyii'n, jəts ku ja jade'en tjanch'ayoji ku ja wyinaty jade'en tə wya'añ, winets ja tyiktiy:

—ɛYə' m'ayoojidip? <sup>62</sup>ɛSa mdejtitt winets jəts ku ɔ nbatəjkinit nay jap ma ɔts jap ijty ndsə'əni? <sup>63</sup>Ja anmija'win ja' idə'on jujky'ajtp; ɛti yə ne'kx?, ka'ap yə ti wya'añ. Jəts ti jaty ɔ tə ngajpxy, yə' idə'on ja Dios tyiy'ajtin'ajtpy, jəts yə' idə'on

yikujky'ajtp xemikəjxp. <sup>64</sup>Jəts ja meets ixa winaagin pən yə tkajanchja'wip.

Tə də'on ja nwindson'ajtim Jesús ja wyinaty tnija'wiini pən jaty ja'adi pən tkajanchja'widip, jəts ja' pən ja kəyakiyip. <sup>65</sup>Jəts ja yide'en yjaakwaañ:

—Ja'agəjxp meets jade'en nnəjmi jəts ku ɔ ka'ap pən nugo ajawi xnimiñ, pəni ka'ap Dios Teety ja kə'əm xagidəki.

<sup>66</sup>Winets may ja'a'y myajtstuujtiniyi ja nwindson'ajtim Jesús, ka'ap ja t'ukmə'otwidejtnidi. <sup>67</sup>Xjats ja nwindson'ajtim Jesús ojts tyiktiy jəts ojts tnəjmi ja nīmakmajtskpi ja'a'y pən ja pyabəjkpi'ajtpy:

—ɛMnəjkwamip meets nayide'en?

<sup>68</sup>Jəts ja Simón Pedro ja ojts yide'en y'adsəyi:

—ɛPənims ɔə teety njaaktyimniinəjkxp? Tum ja'ats me mgajpxpy midi xemikəjxp yikujky'ajtp. <sup>69</sup>Təts ɔəts yə njanchja'wiini jəts nnija'wip ɔəts jəts ku me Cristo, ja Dios U'nk, midi jujky midi kunuu'kxy.

<sup>70</sup>Winets ja nwindson'ajtim Jesús t'adsəy:

—ɛTi kidi mee tə nwi'ixy nīmakmajtsk? Ixats mee nidu'ugin miku'aty.

<sup>71</sup>Ku də'on ja jade'en wya'añ ja nwindson'ajtim Jesús, ja Judas Iscariote də'on ja jade'en tyijpy pən ja Simón myajnkipp, pə ja Judasxi ja wyinaty kəyakwajnip, ɔy idə'on ja nīmakmajtsk mə'ot yjaka'pxy ja pyabəjkpitəjk.

**Ka'ap ja Jesús ja myigu'uk yjanchjawiyi**

**7** Xjats ku də'on ja jade'en wyinaty tə y'ukjaty, jəts

ja nwindson'ajtim Jesús jam ja wyinaty wyidity Galileit etjotp. Judeit etjotp idø'on kyawidetwa'añ ku ja ja'it jaa'y jam wyinaty yik'ookwa'añiyi. <sup>2</sup>Jøts kumi ja xøowts wyinaty tyimbyatpy midì ja israelit jaa'y tyundip ku ja tyik'øiyidi ja waxnaky, nayide'en sam ojts y'letti y'apteety jam abak etjotp, <sup>3</sup>winets idø'on ja nwindson'ajtim Jesús ja myigu'uktøjk ñimaajiyiøø:

—Ka'ap ya mda'ant; jam mnøjkxt Judea, jøts ja mbabøjkpøtk nayide'en jam m'ejxmiyit sa jaty mduñ. <sup>4</sup>Ku pøn ttsøky jøts yiknijawit, ka'ap ja ti amaa'tsk ttuñ. Ejx mets yø jade'en xuñ. Tunts mets yø jade'en øy maðsoo, jøts mets yø øy pøn xuk'ext.

<sup>5</sup>Niwine'eninxi dø'on ja myigu'ukti ja kyajanchjawi.

<sup>6</sup>Xjats ja nwindson'ajtim Jesús ja tnimaay:

—Ka'anim øts ndiempi tpaaty jøts ø nnøjkxt; jøts meets, øy meets øy juuni mnøjkxt. <sup>7</sup>Ka' meets ya pøn mmi'ekiyi; øts, yikmi'ajkip øts ja'agøjxp ku øts ja tuki'iyi nnigajpxy sa jaty kya'øyjaa'y'atti. <sup>8</sup>Nøjkxts mee m'atsxøbaaty; ka'ap ø nnøjkxt, kumi ka'anim øts njuky'ajtim pyaat'atynim.

<sup>9</sup>Kuts ja jade'en wyaañ, jøts ja jami Galilea tyaañ.

**Ku ja Jesús ojts ñijkxy xø'ajtpi**

<sup>10</sup>Xjats ku ja myigu'uk wyinaty tø choondi, jøts ja nwindson'ajtim Jesús nayide'en ñijkxy ma wyinaty jam ja xøow, øy idø'on ja ka'ap yjadyimñanky'ijxyi jam mayjaa'yjotp. Yu'uch idø'on ja

wyidity. <sup>11</sup>Jøts idø'on ja israelit jaa'y ja yjadyimy'ixa'ayi ku ja xøow tyuñi, yide'en idø'on ja wya'andi:

—¿Ma net ja jaa'y midì Jesús nadyejip?

<sup>12</sup>Jøts jam mayjaa'yjotp jam ja may pøn ja nimadyajkiyip. Pømbi jam nømp: “Øy jaa'lyxi ja!”; jøts jadu'uk wyamidi: “Ka'ap ja y'øyjaa'yi, nugo jaa'y ja twin'iiñ.”

<sup>13</sup>Jøts ka'ap pøn nugo ajawi møk tnmadya'akti ja'agøjxp ku ja israelit jaa'y wyindsøn jamdi, ja' ja chø'jkidip.

<sup>14</sup>Kujkwa'kxnip ja xøow wyinaty ku ja nwindson'ajtim Jesús tyøjkiyiñ jam tsaptøjkjotp, jøts ja jam yik'ixpøjk'okwaañ. <sup>15</sup>Jøts idø'on ja israelit jaa'y ja ñigyumaap tyimyjawidi, yide'en ja wya'andi:

—¿Sudso yø jadine'en tjaty, jøts ka'ats y'ixpikiyi?

<sup>16</sup>Xjats ja nwindson'ajtim Jesús t'adsøoy:

—Yø ixpøjkin ka' øts yø nja'aji, ja' yø' yja' pøn ø xkajxp. <sup>17</sup>Pøni jam pøngapøn, pøn jade'en ja tsojkin tjagyajp jøts tpadunwa'añ sa Dios ttsøkyin, ñijawipts ja' pøni kidi jamip øts n'ixpøjkin chøøn ma Dios, uk kidi ngø'øm ja' øts jade'en ngajpxy. <sup>18</sup>Pøn kyø'øm ja' nugo tkajpxp, jade'en'ampy ja jade'en ttuñ jøts ja jaa'y ja yikmøjtøkiyit; pøni pøn tsojpk jøts tyikmøjtøkit ja Dios Teety yja' midì ja tø tkexy, tiy janch ja wya'añ, ka'ap ja tyaayi.

<sup>19</sup>¿Ti kidi ja yjanchi jøts ku meets ja Moisés ojts mmø'øyi ja kutujk? Jøts ka'ats niwine'enin xpadundi ja kutujk. ¿Tigøjxp ku xyik'ookwa'andi øts?

<sup>20</sup>Jøts ja mayjaa'y ja y'adsoojiyi:

—Pø tø mets miku' mdatøkiyi;  
 ¿pøn idø'øn myik'ookwajnip?

<sup>21</sup>Jøts ja nwindson'ajtim Jesús ja  
 tnimaay:

—Tyimya' idø'øn ku tuk'ojkyi  
 ojts jade'en n'adi'ich yam  
 yjapoo'kxinxøwi, ja'ats mee  
 mga'øyja'wip. <sup>22</sup>Ojts meets ja Moisés  
 mdanigutujk'atyi jøts meets mutsk  
 una'jk ja chuujku'nk xjøptsuktuujtit  
 midi yiktejp circuncisión (øy ja  
 tyeety'aptøjk ja tjayikts'o'onda'aky,  
 pø nigidi ja'ajipxi ja kø'øm  
 tyikts'o'ondakp), ¿tigøjxp meets  
 ja mutsk mixyuna'jk xuujni ja  
 circuncisión wan tjapoo'kxinxøwi?

<sup>23</sup>Jabi mduujnipts meets ja mutsk  
 mixyuna'jk ja circuncisión øy ja  
 poo'kxinxøwi, ¿ti kuts øts ja  
 xami'ambiky ku øts ja jaa'y amuum  
 tø nyiktsø'øky ku poo'kxin xøw?

<sup>24</sup>Kidi meets øy sagasa mbayø'ø  
 pøni sa øy tigati x'ejxti. Ku  
 mbayø'øwya'andit, yikxon xu'undit  
 tiy'ajtingøjxp.

**Ku ja Jesús tñigajpxy pøn ja kajxip**

<sup>25</sup>Xjats winaagin pøn wyinaty  
 tø choondi jam Jerusalén, jøts  
 ñay'amidoojiñaxwa'jkidøø:

—¿Kidi ja'ajip yø' midi yik'ixaapy,  
 midi yik'ookwandip? <sup>26</sup>Íxats yø  
 kyajpxy mayjaa'y agujky, mats yø  
 pøn sa kyani'ama'añiyi. ¿Wan ndejin  
 kudunktøjk tjantyimyjanchjawidi  
 yø'øbi jaa'y jøts ku yø Cristo? <sup>27</sup>Jabi  
 wa'atsxi adøm yø nnija'wam ma yø  
 chøøñ; kuts ja Cristo mye'ent, ka'ats  
 ja yiknijawit pøni ma ja choont.

<sup>28</sup>Ja'ayi ja nwindson'ajtim Jesús  
 ja jade'en ojts tmadøy, pø ixamxi  
 ja wyinaty tsaptøjkjotp yik'ixpiky,  
 xjats ja møk wyaañ:

—iAaa wa'ats tam meets  
 x'ijxy'aty, jøts mnija'wip tam  
 meets yø' pøni ma ø ndsøøñ! Kidits  
 ngø'ømwinmaa'ngyøjxpipxi ø nmiñ,  
 ja' ø xkajxp jøts øts ja ngudanit  
 midi dø'øn tyimyjanch'ajtp, midi  
 mee mga'ijxy'ajtpy. <sup>29</sup>Wa'ats øts ja  
 n'ijxy'aty kumi jam ø ndsøøñ, ja'ats  
 ø xkajxp.

<sup>30</sup>Winets ja ojts  
 tjadyimya'ukmatswa'andi jøts ja  
 ttsu'umdit; nika'apts ja ojts pøn  
 ñixajiyi kumi ka'aním ja wyinaty  
 xyøga'pxy. <sup>31</sup>Jamts ja maydi pøn ja  
 janchja'wiyøø, pøn wandip:

—Ku ja mye'ent ja Cristo,  
 ¿ti milagri'ajtin ja jawaani  
 yjaaktyimdyu'unt, ti ti yø jaa'y yam  
 kyatumpy?

**Ku ja fariseotøjk t'ana'amdi ja  
 chaptøjk jøts ja Jesús yikmatst**

<sup>32</sup>Xjats ja fariseotøjk tmadowdi  
 sa jaty ja nwindson'ajtim Jesús  
 ja jaa'y ñimadya'agyiyi; winets ja  
 t'ana'amdøø ja tsaptajk pøn tump  
 jap tsaptøjkjotpy, jøts tyimyikmatst  
 ja nwindson'ajtim. Ja teetywindsøn  
 idø'øn ja jade'en møøt y'adø'øtsti.

<sup>33</sup>Winets ja nwindson'ajtim Jesús  
 wyaañ:

—Tyimyjawaani meets yam  
 njaakwindsøøni, jøts øts ja  
 n'awimbejtyinit pøn ø tø xkexy.

<sup>34</sup>Xjadyimya'ixa'ap meets, ka'ats  
 mee ma xpaatt. ¿Ja ti ja meets jap  
 mnøjkxt mats jap n'ett?

<sup>35</sup>Xjats ja israelit jaa'y agø'ømyi  
 ñayiktøøbinaxwa'jkidøø:

—¿Ma dø'øn yø ñjøkxwa'añ, sudso  
 dø'øn yø wya'añ jøts ku adøm yø  
 nga'ukpaajtna'ant nima? ¿Wan yø  
 ndejin jam tñinøjkxwa'añ ja israelit

jaa'y pøn jadi'iñi tø yø'øwya'kxnidi, møøt tø ñamyidøjkniyidi ja griegit jaa'y? ¿Ja' ndejín yik'ixpøkwapmy? <sup>36</sup>¿Ti dø'øn yø jade'en tyijpy ku yø jade'en tø xnima'ayin ku wya'añ: “Xjadyimyja'ixa'ap meets, ka'ats mee ma xpaatt, ja ti ja meets jap mnøjkxt mats jap n'ett”?

**Ja kunuu'kxy juky'ajtin  
midi ja Jesús yajkpy**

<sup>37</sup>Ja yjadu'ukpi xøøw midi ja xøøw tyamigugøjxinip, ja' idø'øn ja tyimy'ukmøjnajxnip, winets ja nwindson'ajtim Jesús wya'kukiyii'ñ, jøts ja møk'ampy wya'añ:

—Pøni pøn ja kunuu'kxy juky'ajtin ttsojpk jade'en sam ndøøjtsant, wants ø xnimiñ jøts ø nmo'ot. <sup>38</sup>Pøni pøn ø xjanchja'widip, jade'ents ja yjattit sam wya'añ ja nøky jøts ku ja jam y'anmija'winjotp jade'en myu'ut ja nøø midi yik'juky'ajtp xemikøjxp.

<sup>39</sup>Jade'en idø'øn ja nwindson'ajtim Jesús tjatijy, pøni pøn ja janchja'wiyip, ja'ats ja Espíritu Santo pyaattip; ka'anim idø'øn ja Espíritu Santo wyinaty myiñ, kumi ka'anim ja nwindson'ajtim Jesús wyinaty tmimada'kixy ja ayo'on jøts chajpatt.

**Ku ja jaa'y ojts ñawyanwa'kxniyidi  
ja nwindson'ajtim Jesús køjxp**

<sup>40</sup>Xjats jam mayjaa'y agujkpy winaagin wyandøø, ku ja jade'en ojts tmadowdi:

—Tyimyjanchja'adam idø'øn yø jaa'y ja Dios kyugajpxy midi idø'øn yik'awejxp.

<sup>41</sup>Jøts jadu'uk wyamidi:

—Ja Cristo yø'.

Jøts wyenkpi wyamidi:

—¿Sudso ndejín ja Cristo jam kyaxø'økt Galilea? <sup>42</sup>Yide'ents jap nøkyijxpy jaabyety wya'añ jøts ku ja rey David ja' y'apjaa'y Cristo'atp, jøts ku ja jam choont Belén, nay jam ma ja David y'ljty kyugajpi.

<sup>43</sup>Xjats idø'øn ja jaa'y jade'en ñawyanwa'kxniyidi ja nwindson'ajtim Jesús køjxp. <sup>44</sup>Jam winaagin pøn ja tjadyimy'ukmatswandøø, nika'apts jade'en pøn y'adiijch.

**Ku ja windsøndøjk ojts  
tkajanchjawidi ja Jesús y'ayuujk**

<sup>45</sup>Jøts ja tsaptajktøjk ojts wyimbejtnidi ñøjkxnidi ma ja fariseotøjk jam wyinaty møøt ja teetywindsøndøjkti, ja'ats ja ojts ñii'mxyidi:

—¿Tigøjxp ku tø xkayikmendi?

<sup>46</sup>Jøts ja tsaptajktøjk y'adsowdi: —iKa'anim ma pøn jade'en kyajpxy sam yø jaa'y kyajpxyin!

<sup>47</sup>Winets ja fariseotøjk ja ñimaajyidøø:

—¿Meebaat nayide'en tø myikwin'øø'nidi? <sup>48</sup>¿Ti tø adøm winaagin ja nwindson t'ukjanchjawidi, uk tø ja yjawi tu'ugin ja fariseit t'ukpabøkti? <sup>49</sup>Yø mayjaa'dyi pøn tkamøja'widip ja kutujkin, yø' kawindiy'ajttip ku ja tpabøkti.

<sup>50</sup>Ja Nicodemo pøn ja nwindson'ajtim Jesús ojts koots ñinijxxyi, nay ja fariseit ja', ja'ats ja myigu'uk ojts tnøjmi:

<sup>51</sup>—Jade'en sam adøm ja ngutujk tyikutujkyim, ka' pyaat'aty jøts adøm jaa'y ja ayo'on ndyimdyanigajpxkojin ku

ja ka'anim nmadø'oyindi jawyeen pøni ti dø'on ja tyumpy.

<sup>52</sup>Jøts ja ojts yide'en yik'adsøy:

—¿Nayi Galileit jaa'y mets?

Íxpøk waani ja Dios kyajpxy jøts xnijawit jøts ku ni tu'uknim ja Dios kyugajpxy jam kyayiknijawinim Galilea.

**Ja ka'ødyø'øxy**

<sup>53</sup>Jøts ojts ñøjkxnidi ma jaty pøn tyøjk.

**8** Jøts ja nwindson'ajtim Jesús jam ja ojts ñijkxy Olivos kojpkøjxp, <sup>2</sup>xjats ku yjajtaajky kyimjabom, winets ja ojts ñijkxy jam tsaptøjkjotp. Jøts ja jam øy pøn ñimejniyøø, winets ja y'ixaajky jøts ja yik'ixpøjktøjkii'ñ.

<sup>3</sup>Jøts ja kajpxwejpitøjkti møøt ja fariseotøjkti, ja' ojts twaamendi tu'uk ja tø'øxyøjk pøn ja myigu'uk ñiyaa'y myøøt'ajtip. Jøts idø'on ja jam ojts yikpikta'aky mayjaa'y agujkp pøn jaty jam wyinatyi, <sup>4</sup>jøts ja tnimaadyi ja nwindson'ajtim Jesús:

—Windsøn, jap ya'at tø'øxyøjk tø tyimyikubaadi ku ja myigu'uk ñiyaa'y tmøøt'ajti. <sup>5</sup>Yikutujkpy ja Moisés kyutujk jøts adøm yø'øbi tø'øxyøjk nga'tspa'oo'kint. ¿Sa me m'ukwa'añ?

<sup>6</sup>Jade'en'ampy idø'on ja ojts jade'en wya'andi jøts ja tkajpxy'ejxwa'andi, jøts ja jade'en tigati ttukpøky'atwa'andi. Winets ja nwindson'ajtim Jesús wyindaajky, jøts ja ojts ja kyøtsa'jx ttajaabyinaxwa'jky ja naajx. <sup>7</sup>Jøts kumi yiktiibyøjk'adøtsp ja', winets ja kyookukiyii'ñ jøts ja tnimaay:

—Pøni jam pøn kapøkmyøøt, wan ja jawyeen tkonji'iky ja tsaajøts ttaka'atst yø tø'øxyøjk.

<sup>8</sup>Jøts ja nayide'eñim ñaxkoogojmi, ja naajx ja yjay'adichpy. <sup>9</sup>Jøts ku ja ojts jade'en tmadowdi, jøts ja yjanchnabyøkyjawiyidøø, jøts ja ojts wya'kpidsonnidi nidu'uk jaty. Ja møjaa'dyøjk jawyeen pidsømnidøø; xjats ku ja wyinaty tø pyidsømgøxti, jøts ja nwindson'ajtim Jesús nadyu'uk tyaañ møøt ja tø'øxyøjk. <sup>10</sup>Winets ja nwindson'ajtim Jesús kyookukiyii'ñ jøts ojts t'ixy ku ka' pøn, ja tø'øxyøjkyi jap wyinaty, jøts ja tnimaay:

—¿Ma net ja'adi pøn mni'øø'niyidip? ¿Ka' pøn sa tø mduniyi?

<sup>11</sup>Jøts ja ñimaajyøø:

—Ka' windsøn'ajtim pøn.

Jøts nwindson'ajtim Jesús ja tnimaay:

—Ni øts mets sa ngatu'unt. Nøjxni, kidi m'ukpojkituni.

**Ja Jesús xyikujajimp xyikudøø'kximp**

<sup>12</sup>Xjats ja nwindson'ajtim Jesús ojts jadigojk tmigajpxy ja mayjaa'y, jøts ja tnimaay:

—Øts tu'uk tu'uk ja naxwii'ñit jaa'y nyikujajtaajkip nyikudøø'kxaajkip; pøni pønts ø xjotmay'ajtp, pøni pøn øts ja nja' xpabøjk, ja'ats idø'on yikmo'op ja wejin ja kajin jøts ja tyukpaadit ja kunuu'kxy jujky'ajtin, nijuuni ja wimbeets kugoots kyajattit.

<sup>13</sup>Winets ja fariseotøjk ja ñimaajyøø:

—Kø'øm mets jam øy mnanktyiidyøkiki, ka'ap yø ma tyuñ.

<sup>14</sup>Jøts ja nwindson'ajtim Jesús ja t'adsøøy:

—Jade'en sa ø nwa'añ, tump yø' øy ø kø'øm nnanktyiidyøkiki. Øts ja nnija'wip ma ø ndsøøn jøts ma ø nnøjkxt. Meets, ka' xnijawidi pøni ma ø ndsøøn uk pøni ma ø nnøjkxt. <sup>15</sup>Jade'en meets øy ti xpayø'øy sam ja naxwiiñ'ajtim ja kyutujkin. Ka'ap øts øy pøn ti ndabayø'øy; <sup>16</sup>jøts kuts nbayø'ty øts, tiy øts ja ndiidyu'unin nbikta'akt, kumi ka' ø nadyu'uk ndiidyu'unt, nayide'en øts ja møøt ndiidyu'unt ja nDeety pøn ø xkajxp. <sup>17</sup>Jade'en jap kyøxja'ayi jap nøkyjøtpy midi mee mgutujk'ajtpy, ku ja testigi'ajtpi namajtsk tum jade'en wya'andi, ja'ats idø'on yja' yikjanchjawidip. <sup>18</sup>Jade'ents øts yam kø'øm nañidestigi'ajtip, jøts jadu'uk ja nDeety pøn ø xkajxp, ja' ø xnidestigi'ajtp.

<sup>19</sup>Winets ja nwindson'ajtim yiktiibyijky:

—¿Ma dø'on ja mDeety?

Jøts ja nwindson'ajtim Jesús t'adsøøy:

—Meets, ka' mee xnijawi, jøts ni ja nDeety mee xkanija'wiyi; ku øts jeexyip xnijawidi, mnayinija'widipts meets jeexyip ja nDeety.

<sup>20</sup>Jade'en idø'on ja nwindson'ajtim Jesús wyañ ku ja ixam wyinaty yik'ixpiky jam tsaptøjkjotp, ma ja limunsi meeñ wyinaty ja ñigajuun. Nika'apts ja ojts pøn myachi, kumi ka'aním ja wyinaty xyøga'pxy.

**Nømp ja Jesús: “Ka'ap meets jap mibaat mnijxxy pøni ma ø nnijxxy”**

<sup>21</sup>Jøts idø'on ja nwindson'ajtim Jesús tnimaagyojmi ja mayjaa'y:

—Nøjkxnip øts, øy mee xja'ixa'at mi'ookpts meets yø mbøky; jap ma ø nnijxxy, ka'ap meets jap mibaat mnøjkxt.

<sup>22</sup>Winets ja israelit jaa'y wyandøø:

—¿Wan yø ndejin

ñankpya'ookwa'aniyi, patyts yø wya'añ ku adøm jap nganøjkxin ma yø ñijxxy?

<sup>23</sup>Jøts nwindson'ajtim Jesús ja ñimaajyidøø:

—Meets, ya mee mdsøøn, ya mee mgaxi'iky; øts, jam ø køjxp ndsøøn. Ya mee mnaxwiiñ'aty, øts ka'. <sup>24</sup>Paty meets idø'on nnøjmi jøts ku mbøky xmi'ooktit; ku ka' xjanchjawidi pøni pøn øts, mmi'ooktipyimts idø'on ja mbøky jade'en.

<sup>25</sup>Winets ja nwindson'ajtim Jesús yiktiibyijky:

—¿Pøn mets idø'on?

Jøts nwindson'ajtim Jesús t'adsøøy:

—Jaayim øts yø nnigajpxy ity ku nyik'ixpøjktojkiyiñ. <sup>26</sup>May øts ja winmaa'ñ njagyepy midi ø ngajpxwampy, jøts mee nbayø'øwya'añ nayide'en. Tiy'ajtingøjxp ja kyajpxy pøn ø xkajxp, jøts pøni sa ø nnøjmi ja naxwii'ñit jaa'y, jade'en øts idø'on ja tø nmadøy jøts ku ja jade'en wya'añ.

<sup>27</sup>Ka'apts ja tja'gyukidi jøts kudam ja ja' yiknigajpxy ja Dios Teety. <sup>28</sup>Ja'agøjxp ja ojts ñii'mxyidi:

—Ku meets jam kruskøjxp xpikta'akt, jaanimts meets x'ejxkapt jøts ku øts idø'on ja wyinaty sa tø nwa'añ, jøts ku ka' ja ngø'ømwinmaa'n nyiktuñ; ja'ayi øts idø'on ngajpxpy midi øts ja nDeety tø xuknijawi. <sup>29</sup>Pøn øts xkajxp, møøt øts ja n'ity; ka' øts ja nDeety nadyu'uk xmajststu'uty, pø tum ja'axi ø ndumpy midi ja tyajotkujk'ajtpy.

<sup>30</sup>Ku ja nwindson'ajtim Jesús jade'en ojts wya'añ, winets may jaa'y ja ojts yjanchjawi.

**Ka' nduknaxa'amp, jaa ja Dios yja' jøts ja miku' yja'**

<sup>31</sup>Xjats ja nwindson'ajtim Jesús tnimaay ja israelit jaa'y pøn ja wyinaty tø yjanchjawi:

—Pøni mnadyamiyojxidip tu'ugyi sa ixa nnøjmidi, meetspits idø'on tiy xjantyimbyabøjkpi'atp; <sup>32</sup>winets ja tyiiby yjanchpi xnijawidit, jøts ja myik'awa'atspidsømidip.

<sup>33</sup>Jøts ja ojts yide'en t'adsowdi:

—Ja Abrahamxi øøts ndeety'amøjip, jøts ka'anims øy pøn windi xyiktuñ nugo ajawi. ¿Sudsots me mnimy jøts ku øø n'awa'atspidsø'ømt?

<sup>34</sup>Jøts ja nwindson'ajtim Jesús ja tnimaay:

—Janch øts idø'on nwa'añ ku mee nnøjmi, niduki'iyi pøni pøn pøkyundip, ja pøky ja ñamyayi yja'bøjknip. Pøkpyatki'py ja ñamyayi y'ejtnidi. <sup>35</sup>Tu'uk ja tumbi pøn yikøj'ømit'ajtnip, ka'ap ja nayide'en ja kutujk tjagyepy sam ja jaa'y ja y'u'nk y'una'jk tjagyepyin. <sup>36</sup>Jade'ents øts ja Dios Teety x'U'nk'aty jøts ku mee

nyik'awa'atspidsø'ømt, xemikøjxpts ja jade'en. <sup>37</sup>Øy meets ja Abraham xja'aadsi xjakojpki, xyik'ookwampts meets nayide'en winaagin, ja'agøjxp ku meets ø n'ayuujk xkagupøjki pøni sa njawa'añ. <sup>38</sup>Pø ja'ats ø ngajpxpy midi øts nDeety tø xukjaty; jøts ku meets, pø ja'axi mee nayide'en mbadumpy midi meets mdeety mdani'ana'amip.

<sup>39</sup>Jøts ja ojts yik'adsøy:

—Ja Abraham øø ndeety'amøjip.

Yide'ents ja nwindson'ajtim Jesús ja ojts ñii'mxyidi:

—Ku meets jeexyip ja Abraham mjanch'u'nk'atyiyi mjanch'una'jk'atyiyi, nayide'en meets jeexyip mjaa'y'aty sam ja ojts yjaa'y'atyin. <sup>40</sup>Ni jade'ents, o meets ja tyiiby yjanchpi tø njadukmadøy sam øts Dios Teety ja tø xjaduknijawin, ne'legi xyik'ookwamp meets. iNi ja Abraham ojts jade'en kya'adi'ich sam meedsin! <sup>41</sup>Nayide'en mee m'adi'ich sam ja mdeety y'adi'ichin.

Winets ja wyandøø, jøts ja nwindson'ajtim Jesús yiknimaay:

—Ka'ats øøts jadi'iñi ngaxi'iky; ja Dios øø tu'ugyi nDios Teety'ajtpy.

<sup>42</sup>Winets ja nwindson'ajtim Jesús ja tnimaay:

—Ku jeexyip ja Dios Teety xDios Teetyjawidi, txsojpk meets jeexyip, pø jamxi ø ndsøøn ma ja Dios jam ku øts ixyam nyaa'aty. Kidi ngø'ømwinmaa'ñipxi ø nmimimpy, pø ja Diosxi ø xkajxp. <sup>43</sup>¿Tiku wine'enin mguidyimyja'gyukidi sa ø njawa'añ? Ka' xtyimyadoowajnididi ja ngajpxy ja n'ayuujk. <sup>44</sup>Ja miku' ja' mee mdeety'ajtpy; ja' mee mgøj'ømit'ajtip jøts



ja' mdunwāndip ti jaty ja  
 ñanktyunwajnip. Tso'onda'agyip  
 ja miku' yikjaa'y'oo'knibøjkini.  
 Nijuuni ja tkayiktuñ ja tyiibi  
 ja yjanchpi, jøts nijuuni tiy  
 janch kyakajpxy. Ku ja tyaay'aty,  
 jade'eñi ja kyajpxy sayim idø'on  
 ja myiku'atyin, ja'agøjxp ku  
 yjantyimdyaa'i, jøts ja' idø'on  
 tniwindsøn'ajtp ja taay'ajtk ja  
 win'øø'nk. <sup>45</sup>Kuts øts yam tiy  
 janch njawa'añ, ka'ats meets ø  
 xmibiky. <sup>46</sup>¿Pøn jam winaagin  
 ukwa'anwāmp jøts ku øts pøky  
 nmøødi? Kuts tiy janch nwa'añ,  
 ¿tigøjxp ku ø ka' xjanchjawidi?  
<sup>47</sup>Pøn Dios ja'ajtip, myadoowajnip  
 ja' ja Dios y'ayuujk; jøts kumi ka'ats  
 meets Dios mja'aty, patyts meets ja  
 ka' xpatmadoowajni ja y'ayuujk.

**Jaayim ja Cristo ku ja  
 Abraham yja'ajty**

<sup>48</sup>Xjats ja israelit jaa'y ja ojts  
 ñii'mxyiyi:

—Tyimdyiyimxi øøts idø'on  
 njadyimyjawa'añ ku øø nnimy jøts  
 ku me msamariitjaa'yi, jøts ku ja  
 miku' tø mdatøkiyi.

<sup>49</sup>Jøts ja nwindson'ajtim Jesús ja  
 ojts yide'en t'adsøy:

—Niwine'enin øts miku' xkadatøki.  
 Ja' øts ja'ayi ndumpy jøts øts  
 Dios Teety nwindso'øgi, ja' mee  
 xkadamø'ejxp. <sup>50</sup>Ka'øtsip ngø'ømja'  
 n'ixaapy, øyi ja yjajaa'aji pøn øts  
 nja' x'ixaajyip. Ja'ats tpayø'opy  
 pøn ødyump ka'ødyump. <sup>51</sup>Jøts  
 janch øts idø'on nwa'añ, pøni pøn  
 tmøjpiktakp sa ø nwa'añ, nijuuni ja  
 kya'ooktit kyawindigø'odyit.

<sup>52</sup>Winets ja israelit jaa'y ja  
 ja'adsoojiyøø:

—Tønimts øøts inet yam  
 ndyimyjanchjawinim jøts ku ja  
 miku' tø mjanchtatøkiyi. Sa ja  
 Abraham tø y'øøky møøt niduki'iyi  
 ja Dios kyugajpxty, jøts me  
 mwa'añ: “Pøni pøn tmøjpiktakp  
 sa ø nwa'añ, nijuuni ja kya'ooktit  
 kyawindigø'odyit.” <sup>53</sup>¿Ti me  
 ndejin mjaaktyimdyajinajpxy  
 jøts ku ka' myajada'aky øøts ja  
 ndeety'amøj Abraham? Sa ja y'ø'jky  
 jøts sa nayide'en y'oo'ktøø ja Dios  
 kyugajpxy, ¿pønsts mets idø'on  
 mdsaañadyijyi?

<sup>54</sup>Jøts ja nwindson'ajtim Jesús ja  
 t'adsøy:

—Ku ø kø'øm  
 nnankmyøjtøkiwya'anit, ka' ma  
 tyuñ øts ja ngø'ømja'. Ja Dios  
 Teetyts ja' ø xyikmøjtøjkp mid  
 mdejttip jøts ku ja' xDiosidi.  
<sup>55</sup>Meets, ka' meets ja xnijawidi.  
 Øts, wa'ats øts ja nnijawi, jøts  
 ku ø nwa'ant jøts ku øts ja ka'ap  
 nnijawi, janchtyimdyaa'y øts idø'on  
 wyinaty nayide'en sam meedsin.  
 Njanchtyimñija'wipts øts ja' jøts  
 nmimadøopy øts ja' pøni sa ja  
 wya'añ. <sup>56</sup>Jøts ja Abraham, pøn  
 meets idø'on m'aadsidip mgugojidip,  
 xaxondaajk øts ja' ku tnijaw'aty  
 kuts nmenwa'añ ya naxwiin; x'ejx  
 øts ja' jøts janch øy tsuj ja ñayjawi.

<sup>57</sup>Winets ja israelit jaa'y  
 tnimaadyøø ja nwindson'ajtim Jesús:  
 —Ni kyaja'atynim ja mjumøjt  
 wixixkmyajk, ¿jøts mjanch'uknimy  
 jøts ku ja Abraham tø x'ixy?

<sup>58</sup>Xjats ja nwindson'ajtim Jesús  
 t'adsøy:

—Tiy janch idø'on nwa'añ, jøts  
 ku øts jaayim wyinatyni ku ja  
 Abraham kyaxi'jky.

<sup>59</sup>Winets ja tnixajidi ja tsaaj jøts ja ttaka'atswa'andi ja nwindson'ajtim Jesús; nayu'jtsi ja', jøts ja ojts pyidsømni jam tsaptøjkjotp, jam ja mayjaa'y ja ttanajxy, jøts ja ojts jade'en cho'oni.

Ku ja Jesús ojts tyikwin'ejxwa'kxy  
ja winap jaa'y

**9** Xjats ku ja nwindson'ajtim Jesús jam wyinaty ñaxy, winets ja ojts t'ixy tu'uk ja yaa'dyøjk pøn wyinaty winap, jade'en ja tyimgye'exy. <sup>2</sup>Jøts ja nwindson'ajtim Jesús ja pyabøjkpitøjk ñimaajiyøø:  
—Windsøn, ¿sudso yø jaa'y jade'en winap tø kye'exy? ¿Jade'en idø'øn n'ukwa'anint, ja tyeety idø'øn ndejin jantyimbyøkmøøtti, uk kyø'ømbøky idø'øn yø jade'en tuujnip?

<sup>3</sup>Winets ja nwindson'ajtim Jesús ja ñimaajiyøø:

—Kidi kyø'ømbøkyip yø jade'en kyuwanjajtip, jøts nigidi ka'ap tyeety yø tpøkyi; jade'en'ampy idø'øn yø jade'en yjaty, jøts yø' ñikøjxp yiktuk'ejxtit øy pøn midi ja Dios tyu'ump. <sup>4</sup>Wants øts ja tyunk tjaaktyimdyuujni jaa'ktsojknim; jotmøñ ø n'ukugoodsiñit kuts ja wyinaty ja tyunk ngatungøjxi pøn ø xkajxp. <sup>5</sup>Pøni wine'enin ø njaaktsøøni ya naxwiiñ, njaaktyimdyu'umbyimts øts jade'en sam ja jaj kyujajy kyudii'kxy. Jade'en øts ja naxwii'ñit jaa'y ñamyayi nyikujajtaagidit nyikudøø'kxaagidit.

<sup>6</sup>Kuts idø'øn ja jade'en wyan'abajtyiñ ja nwindson'ajtim Jesús, jøts ja ojts chujy

tyiknaxkida'aky jam naxkøjxp, jøts ja naajx ja yii'nim ojts ttamimo'otsyø'øyi ja chujy. Mo'ontsu'nk tyik'øyiñ, ja'ats ja ojts yiktawinjaaxy ja winap jaa'y. <sup>7</sup>Jøts ja tnimaay:

—Nøjkx m'atsnawyimbuji jam nømu'tjotp midi yiktejp Siloé —jade'en idø'øn ja Siloé y'ayukpidsimy: ja' pøn tø yikexy.

Xjats ja winap jaa'y jam ojts ñijkxy jøts ja ojts ñawyimbuji, jøts ku dø'øn ja ojts wyimbijty, win'ejxnip ja'. <sup>8</sup>Winets ja jaa'dyi pøn ja jam myigujøønip myigudøjkp, jøts ja'adi pøn jaty ja wyinaty tø y'ijxyiyi jøts ku ja wyinapi, ja'ats idø'øn wandøø:

—¿Kidi ja'ajip yø' pøn ja y'ijty xumi'ixakp, pøn ja y'ijty xumilimuns'amidoop?

<sup>9</sup>Jam winaagin wyandi:

—Janch ja' yø'.

Winaagin ja wyamidi:

—Ka'ap ja yø'øji, jantyimñayide'en tam tyimy'ixy.

Kø'ømts ja jaa'y yide'en wyaañ pøn wyinaty tø wyin'ejxwa'kxy:

—Pø øtsimpts ja'.

<sup>10</sup>Winets ja yiktii'byijky:

—¿Sudsomts yø mween tø yjaty, pø mwini'ejxnipst yjawi?

<sup>11</sup>Jøts ja t'adsøoy:

—Yø jaa'y midi Jesús txøøw'ajtp, yø' mo'onts tø tyik'øyi jøts øts ja tø xawinjaaxy, yide'en ø xnimaay: “Nøjkx m'atsnawyimbuji jam nøø'agø'øm midi yiktejp Siloé.” Xjats ø tø njanchnijky jøts kuts ø tø nnawyimbuji, jøts øts yø nween tø y'ejxwa'kxy.

<sup>12</sup>Jøts ja ojts tjaaktyiktøwdi:

—¿Ma net ja jaa'y?

Jøts ja tnimaay:

—Ka' nnijawi.

**Ku ja fariseotøjk tyiktøwdi ja winap jaa'y sudso wyin'ejxwa'kxy**

<sup>13</sup>Winets ja ojts twaanøjkxti ma ja fariseotøjk jamdi. <sup>14</sup>Tyimbyoo'kxin xøowts idø'on wyinaty ku ja nwindson'ajtim Jesús tyik'ø'yiyiñ ja mo'onts midi wyinaty tø ttuktatsø'øky ja winap jaa'y, <sup>15</sup>paty ja fariseotøjk jam ttiibyøjkojmidi ja jaa'y sudso'ampy idø'on ja wyeen ja wa'ats y'ejxni. Jøts ja y'adsojimbijty ja':

—Mo'onts øts ja tø xawinjaaxy, xjats ø tø nwimbuju, paty øts ixyam wa'ats n'ejxni.

<sup>16</sup>Winets winaagin ja fariseotøjk wyandøø:

—Ja jaa'y pøn jade'en tø y'adi'ich, ka' inet Dios ja tja'aji, kumi ka'ap ja twindsø'øgi ja poo'kxin xøow.

Jøts winaagin wyaamidi:

—¿Sudso milagri'ajtin ja ndejin jade'en ttu'unt, pøni janch pojkpitumbi jaa'y tam ja wyinaty?

Jøts agø'ømyi jade'en ñawyanwa'kxniyidi ku kyanagyupikyidi, <sup>17</sup>jøts ja jadigojk tyiktøogojmidi ja jaa'y pøn wyinaty winap uk'ejt:

—¿Jøts mets, sa mets idø'on mwa'añ, pøn idø'on yjawi ja jaa'y midi tø myikwin'ejxwa'kxyiyi?

Jøts ja wyaañ:

—Øts wamp, Dios ja' kyugajpxy.

<sup>18</sup>Jøts ja israelit jaa'dyi ka'ap idø'on ja tjanchjawiwya'andi ku dø'on ja jaa'y y'ijty wyinapi, jøts ku ja tø wyin'ejxwa'kxni. Yiknajtswaa'wiyibaat ja tyeety ja tyaak, <sup>19</sup>jøts ja ojts tnøjmidi:

—¿Meets idø'on ya'at mmajnk? Janch winap idø'on yø tø kyaxi'iky, pø mnømdipxi. ¿Sudso'ampyts yø wa'ats wyin'ejxni?

<sup>20</sup>Winets ja u'nkteety y'adsoodøø:

—Sudsomts øøts yø n'u'nk nganijawit, pø winapxi dø'on yjanchke'exy. <sup>21</sup>Ni øø nganijawi sudso'ampy yø tø wyin'ejxwa'kxy, jøts nija' øø nganijawi pøni pøn yø tø yiktsojxxiyi yø wyeen. Yiktøwdi jade'en kø'øm; pø møjaa'ñixi yø', wan kø'øm mdukmadøyidi.

<sup>22</sup>Jade'en'ampy idø'on ja tyeety tyaak ojts jade'en wya'andi, tsø'jkidip ja', pø tøxi ja israelit jaa'y wyindsøndi wyinaty tkajpxy'ajtnidi, ku ja abiky yikpikta'aktit pøni pøn wamp jøts ku ja nwindson'ajtim Jesús Cristo'aty, midi ja Dios tkajxp. <sup>23</sup>Paty ja møjaa'y wyandøø: “Yiktøwdi kø'øm, pø møjaa'ñixi yø', wan kø'øm tnigajpxy.”

<sup>24</sup>Winets ja israelit jaa'y twaadsowdi jadigojk ja jaa'y pøn idø'on y'ijty winap, jøts ja ojts tnøjmidi:

—Tukmadook øøts tiy janch sam Dios t'lijxyin; jade'en øøts yø nnijawi jøts ku yø pyojkpitumbijaa'yi pøn tø myiktsø'øgyi.

<sup>25</sup>Jøts ja t'adsøøy:

—Ka'ap øts yø nnijawi pøni pøn yø', pøni pojkpitumbi jaa'y uk kapojkpitumbi jaa'y yø'. Yø'øyi øts nnija'wip jøts ku øts y'ijty nwinapi, ixyam wa'ats ixyam nwin'ejxni.

<sup>26</sup>Jøts ja tyiktøogojmidi:

—¿Sa ja tø mduñi? ¿Sa ja tø ttuñ jøts ku ja tø myikwin'ejxwa'kxyiyi?

<sup>27</sup>Jøts ja yide'en t'adsøøy:

—Tø meets ja njadukmadøy jøts meets ja ka' xmøjpkikta'aky; ¿winaak

ojk nnigajpxt? ¿Uk ja' mdsoktip jøts ja yja' xpabøkwajni?

<sup>28</sup>Winets ja y'amyiknimaay chaachyiknimaay, yide'en ja wya'andi:

—Yø jaa'y me mbabijky, øøts ja Moisés øøts yja' nbabøjkip.

<sup>29</sup>Nnija'wipxi øøts ja' ku ja Moisés ojts myigajpxyi ja Dios; yø jaa'y, nguidyimñija'wip øøts yø' pøni ma yø chøøñ.

<sup>30</sup>Jøts ja t'adsøoy, yide'en ja tnimaay:

—iYø' idø'øn tiy janch nima'at yikja'wip, ku meets yø xkanijawi pøni ma yø chøøñ, jøts tøts øts yø xyikwin'ejxwa'kxy! <sup>31</sup>Wa'atsxi yiknijawi jøts ku Dios ka' ja' tmadøy pøn pojkipitumbijaa'y'ajttip; ja'ayi ja myadooijp yja' pøn ja windsø'jkiiyip, pøn ja padu'unxiyip ja yja'. <sup>32</sup>Ka'axi yjawi ma pøn nmadøynim ku tu'uk ja winap jaa'y ja jaa'y tyikwin'ejxwa'kxy midi winap tyingya'jx. <sup>33</sup>Ku yø jeexyip Dios tkaja'aji, niti yø jeexyip tkatuñ.

<sup>34</sup>Xjats ja yiknimaay:

—Jøts mets, ku mets pøkyjøtpy tø mgue'exy, ¿jøts mets idø'øn jade'en xyik'ixpøkwa'añ?

Jøts ja jap ojts yik'ixkajxpidsimy.

**Pøn tkanija'widip ja Dios yja'**

<sup>35</sup>Jøts ja nwindson'ajtim Jesús tnmadøoy jøts ku ja winap jaa'y jap wyinaty jade'en tø yikajxpidsimy; jøts ja ojts tminabyaadyi, winets ja ojts tnøjmi:

—¿Mmøja'wip mjanchja'wip Dios U'nk?

<sup>36</sup>Jøts ja ojts ñii'mxyi:

—Windsøn'ajtim, tukmadook øts pøn ja', wan ø tmøjawi tjanchjawi.

<sup>37</sup>Jøts ja nwindson'ajtim Jesús ja t'adsøoy:

—Tø mets ja x'ejxni; pø øtsxi dø'øn ja', ixya kø'øm møøt mmadya'aky.

<sup>38</sup>Winets ja jaa'y ñagyuxendyaajkøø, jøts ja twinguxanaay ja nwindson'ajtim Jesús, jøts ja tnimaay:

—Windsøn'ajtim, nmøja'wip njanchja'wip mets.

<sup>39</sup>Jøts ja nwindson'ajtim Jesús wyaañ:

—Ja' øts ya naxwiiñ tø nnimiñ jøts ja payø'øyin tyunit tiy'ajtingøjxp; pøni pønts wimbeets kugoots, win'ejxwa'kxtipts ja' jøts ja t'ejxtit tnijawidit; pønts tja'ejxtip tjanija'widip jøts tkamibøkti, ja'ats tandip wimbeets kugoots ejxim winap jaa'yin.

<sup>40</sup>Winets winaagin ja fariseotøjkti pøn jaty jam wyinaty, ku ja jade'en tmadowdi, winets ja ojts tnøjmidi ja nwindson'ajtim Jesús:

—¿Uk wan øøts idø'øn nayide'en nwimbeedsi?

<sup>41</sup>Jøts ja nwindson'ajtim Jesús t'adsøoy:

—Ku meets jeexyip mwimbeedsi kugoodsi, ka' meets jeexyip myiktapøky'ejxti ja mbøky. Kumi mnømdip jøts ku x'ejxti xnijawidi, mdaja'atidipts meets ja mbøky.

**Jade'en ja Jesús n'ukpiktaajkint ejxim tu'uk ja øybi kurajt n'ejxint**

**10** 'Janch øts idø'øn nwa'añ, pøn jap katøjkip ma ja borreek ja kyemy'aaw, pøn abiky'ampy tøjkip, ja maa'tspi dø'øn ja'. <sup>2</sup>Jøts ja jiyujk'ejxpi, ja' jap najxp ma ja kemy'aaw jap. <sup>3</sup>Ja yiktøjk'awatspi, ja' ja

yik'awajtsxiyip ja tøjkaaw jøts ja tyøki, jøts wa'ats ja byorreek ja yukmadøyi. Xyømøøpy ja tu'uk jaty jøts ja tyikpidsimy jap kemyjøtpy.

<sup>4</sup>Kuts ja tøj tyikpidsømguixy tuki'iyi ja yjyujk jøts ja jaween twinway, payø'øyip ja' kumi wa'ats ja yukmadøyi. <sup>5</sup>Ka'apts ja nugo ajawi tpanøjxkti ja wyenkpi; ne'egi yjaa'kyimkyajkidip ja', kumi ka'ap ja tyukmadowdi ja wenkjaay.

<sup>6</sup>Ja'agøjxp ja nwindson'ajtim Jesús ojts jade'en tmimadya'aky ja jaa'y, jøts ja ttuktamimadowiwy'añ sa ja yja' yjaa'y'atti, ka'apts ja ojts tmadoodowdi pøni ti dø'on ja jade'en yjatijpy ku ja jade'en ñii'mxyidi.

**Jade'en ja Jesús n'ukpiktaajkint  
ejxim tu'uk øybi borreek'ejxpi**

<sup>7</sup>Winets ja nwindson'ajtim Jesús jadigojk tñimaagyojmi ja jaa'y:

—Janch øts idø'on nwa'añ: Jøts ku øts idø'on jade'en ñamyayi nnabyikta'agyí sam tøjkaawin, ma ñaxtit øts ja nja', sam ja borreek ja tyøjkaaw t'ayø'øyidi. <sup>8</sup>Jøts ja win'øø'mbi pøn tøj y'atsmendi jøts wy'a'andi ku Dios tøj kyexyi, jade'en idø'on yjamendi ejxim ja maa'tspín; øts njaa'y, ka'ap ja ñagyiyajkidi nugo ajawi. <sup>9</sup>Øts idø'on jade'en sam ja tøjkaaw; pøni pønts jap tøjkidip, ja'ats idø'on nitso'ok'attip. Jøts øts ja ndanitanit ja nja', ejxim ja borreek u'nk yiknitani jap kyemyjøtpy.

<sup>10</sup>Ja'ayi ja maa'tspi ñimimpy jøts ja myeech, jøts ja yikjaa'y'øøky jøts ja yikudigø; øts, ja' ø ñimimpy jøts meets øy yikxon xpattit ja kunuu'kxin ja juky'ajtin. <sup>11</sup>Jade'en

øts idø'on sam ja jaa'y pøn øy borreek'ejxp. Ku dø'on ja øy t'ixy ja byorreek, øy sa tmiwanjaty ja kø'øm, nugo ku byorreek ja kya'øøky. <sup>12</sup>Pøni pøn mijuy tump, ja'ayi ku ja t'ixy jøts ku ja myiñ ja awa'añ miy'uk, jøts ja japyi tñike'eky ja byorreek jøts kyakni, kumi ka'ap ja tyimya'aji midí ja jiyujk ñi'ejxpi'ajtpy, jøts nika'ats ja tkø'ømja'aji. Xjats ja miy'uk tmajtsni ja borreek, jøts ja jadi'iñi tyik'ayø'øbyaky. <sup>13</sup>Jade'en'ampy ja'abi jaa'y kye'eky kumi mijuy ja tyuñ, patyts ja ka'ap tkwenti ja borreek.

<sup>14-15</sup>Øts idø'on øy jiyujk'ejxpi'ajtp. Sam øts ja Dios Teety xnijawin jøts wa'ats øts ja nnijawi; nayide'ents øts idø'on ja njaa'y wa'ats nnijawi, jøts øts ja nayide'en wa'ats xnija'wimiyidi. Øts yø nguwanjatip. <sup>16</sup>Jøts jap øts ja borreek abiky njaakmøødi midí kajap'ajtp ya kemyjøjty; nyikme'empts øts jaa ja nayide'en. Jøts xmimado'odip øts ja', jøts tu'ugyi ja ñi'ejxpi yjagyajpniiyt.

<sup>17</sup>Ja'agøjxp øts ja Dios Teety xtsøky kuts ngu'oogidit yø'ødi, jukpyøkpts øts jadigojk. <sup>18</sup>Nipøn ø mibaat xkayik'øøky, kø'øm øts ja nnaajtsjawit jøts ø nnagyøyakit ngø'ømsojkingøjxp. Tiy'ajtingøjxpts øts nnagyøyakiyit, jøts nay tiy'ajtingøjxpts øts njukpyøkt jadigojk. Tøxi øts ja Dios Teety jade'en x'ane'emy.

<sup>19</sup>Xjats ku ja israelit jaa'y jade'en ojts tmadowdi ja kajpxy ja ayuujk, jøts kø'ømyi ñawyanwa'kxkojmiyidi.

<sup>20</sup>May ja jamdi pøn wandip:

—¿Tiku yø xtsaamyøjpikta'akti, pø miku'ts yø tøj tyatøkiyi, pø loki jajtpts yø'?

<sup>21</sup> Jøts wyenkpi wyamidi:

—Ka'ap jeexyip pøn jade'en kyajpxy, ku jeexyip pøn ja miku' tø tyatøkiyi. ¿Ti ma ja miku' tø t'ukyikwin'ejxwa'kxy ja winap jaa'y?

**Ku ja israelit jaa'y ojts  
twindsowdi ja Jesús**

<sup>22</sup> Yu'aats nep'aats idø'on wyinaty pyatpy, jamts idø'on Jerusalén ja xøow wyinaty tyuñi, ku ja yikja'myech yikxøduñ ja tsaptøjk.

<sup>23</sup> Jøts idø'on ja nwindsøn'ajtim Jesús jap wyinaty wyidity tsaptøjkjotpy, ma ja tøjkaaw jap midi yiktejp Salomón ja Tyøjkwimbo'kx. <sup>24</sup> Jøts ja israelit jaa'y ja ojts ñawya'k'lawidityyi, jøts ja yiknimaay:

—¿Ejtp øøts idø'on jade'en xyik'etwa'añ maapy tajp? Pøni mets tam idø'on janch Cristo midi Dios tkajxp, icyamyiø øøts xtyimdyukmado'ot.

<sup>25</sup> Jøts ja nwindsøn'ajtim Jesús ja t'adsøøy:

—Tø mee njadukmadø, jøts meets ja ka' xmibiky. Tuki'iyi ti jaty ø ndumpy, ti jaty ø xanigutujk'ajtp ja Dios Teety, yøøts ja wa'ats tyimyjayiknigaxø'kp; <sup>26</sup> meets, ka' meets xjanchjawi, kumi ka' mee mnayja'aji midi ø nja'ajtpy, sam aamyi tø nnøjmidi. <sup>27</sup> Jade'en øts ja nja' xyukmadø sam ja borreek ja ñi'ejxpi tyukmadøyin, jøts wa'ats øts ja nnijawidi. Xpaduujnidipts øts nja' ja'adi. <sup>28</sup> Øts ja nmøødyip ja kunuu'kxy jujky'ajtin midi xemikøjxp, jøts nijuuni nøjkk kyawindigøydi, jøts nipøn øts ja xkapøjkxit ku øts ja ngøjø'ømit'atti.

<sup>29</sup> Ja Dios Teety øts ja xagødøjkip, ja' tu'uk møj, ka' pøn jade'en, pønts ja mibaat uk kønaxip jøts ja yikpøjkxit. <sup>30</sup> Øts møøt Dios Teety tu'lugyi øøts.

<sup>31</sup> Winets ja israelit jaa'y jadigojk tkonjøøktøø ja tsaa, jøts ja ttaka'atswa'añdi. <sup>32</sup> Xjats ja nwindsøn'ajtim Jesús ja tnimaay:

—Tø mee kawinaak ojk ja mwingujky nduujni ja ødyu'unin Dios Teety myøk'ajtingøjxp. ¿Ja'ats meets yam xagubatwamp ku meets yam xka'atswa'añ?

<sup>33</sup> Winets ja israelit jaa'y y'adsoodøø, jøts ja nwindsøn'ajtim yiknimaay:

—Kidi ja'ajip mets yam myiktaguga'adsiwamp, ku mets ja ødyu'unin tø xjadyimyjabikta'aky, pø ja'axi yam myiktagubatwamp ku ja Dios kajaa xtyimyigajpxigøy. Pø nugo jaa'yxi mets, jøts jade'en mnabyikta'agyi sam Dios.

<sup>34</sup> Jøts ja nwindsøn'ajtim Jesús tnimaay:

—Jade'en meets ja mgutujk jap yja'ayi jøts ku Dios yide'en wyaañ: “mDios meets.” <sup>35</sup> Janch yiknija'wip jøts ku Dios kyajpxy jap yide'en wya'añ, ka'ap ja pøn tkagupiky; ja' ja Dios ojts diostij ja jaa'y pøn ja ojts tyiknaxy ja kyajpxy ja myadya'aky. <sup>36</sup> Jøts kuts øts Dios tø xwiwich abiky, jøts øts ja ya tø xkexy naxwiñ, ¿sudsøts meets jade'en mwa'añ jøts ku øts ja tø nmigajpxigøy, ku tø nwa'añ jøts ku ø nDios U'ngi? <sup>37</sup> Pøni ka' øts ja' nduñ midi ja Dios Teety tyumpy, kidits mee xjanchjawi. <sup>38</sup> Kuts øts ja nduñ, øy mee xjagajanchjawi janchja'widik øts ja ndunk, jøts

jade'en xnijawidit jøts ku øts ja Dios Teety xmøøt'ity, jøts øts ja nayide'en nmøøt'ejtmi.

<sup>39</sup>Winets ja jadigojk tjadyimyjatsumwandøø, kajkts ja nwindson'ajtim Jesús.

<sup>40</sup>Jøts ja ojts wyimbejtnimi ñøjkxniimi jam xøøbidsimy'ampy, mā ja møj nøø midi yiktejp Jordán, jøts ja jam tyaañ mā ja Juan y'ijty yiknøbety. <sup>41</sup>Janch namay ja jaa'y ja ojts t'ats'ejxti jam, jøts ja wya'andi:

—Tyimdyiy tyimyjanch tam idø'øn, øy idø'øn ja Juan Bautista ojts tkatuñ ja milagri'ajtin, ka'pxts ja y'ayuujk pyidsimy sa tnmadyaajky ya'atpi jaa'y.

<sup>42</sup>Jøts ja'abi etjotp janch namay ja jaa'y ojts tmibøkti ja nwindson'ajtim Jesús.

#### Ku ja Lázaro y'ø'jky

**11** Ja dø'øn tu'uk ja jaa'y, yaa'dyøjk, midi pøjkip. Lázaro ja xyøøw, jam ja Betania kyugajpi, nay jam mā ja María jøts ja y'uch Marta jam kyugajpidi. <sup>2</sup>Yø María dø'øn ja' pøn yø Lázaro chø'øjip, ja pamaa'y, ja'ats idø'øn ojts ja aceite pa'akxuu'kpi tpiktaajkxiyi ja nwindson'ajtim Jesús tyeky, jøts ja wyaay ja ojts ttuktati'ich jadigojk. <sup>3</sup>Ja'ats idø'øn møøt ja y'uch tkajpxy ñigajxidøø ja nwindson'ajtim Jesús:

—Windsøn'ajtim, janch pøjkip ja mmigu'uk.

<sup>4</sup>Xjats ku ja nwindson'ajtim Jesús ja jade'en tmadøøy, winets ja wyaañ:

—Ka'ap yø pa'am myajada'akt jøts ja tyimyik'ookt; jade'en'ampy

idø'øn ja jade'en yjaty jøts ja Dios myøk'ajtin wyingaxø'økt, jøts yø'øbi pa'amgøjxp yiktuk'ejxtit ja jaa'y jøts ku ja Dios U'nk nayide'en tmøøt'aty ja møk'ajtin.

<sup>5</sup>Øy ja nwindson'ajtim Jesús tjanchjaba'ayøy ja jaa'dyi, ja Marta, ja María, jøts ja Lázaro, <sup>6</sup>ku ja yiktukmadøøy jøts ku ja Lázaro pøjkniyi, jøts ja jam majtsk xøøw yjaaktyimdy'a'aniyii'ñ mā dø'øn ja jam wyinaty. <sup>7</sup>Winetnimts ja tniimaay ja pyabøjkpitøjk:

—Wan jam tjaa'myindi jadigojk jam Judeit naxjotp.

<sup>8</sup>Jøts ja pyabøjkpitøjk ja ñiimaajyiyøø:

—Windsøn, pø jamts ja israelit jaa'y jawaani mgaka'ats'o'jkøø; ¿jøts nay jam mnøjkxwaa'ñ jadigojk?

<sup>9</sup>Jøts ja nwindson'ajtim Jesús wyaañ:

—Ka' pøn sa xu'unt ku ka' kya'pxñim. Niti tsø'øgi ngamøøt'aty sam nwidejtin xinaxy, awa'ats ja nøø' ja tuu' ja' ku tyuk'ejxpaaty ja ya'it naxwii'ñit jaj; <sup>10</sup>kuts ja koots'ajtin yja'aty, janchjøptsø'øgi jøpjawi nwidejtint, pø ja jajxi xka'ejtxa'am.

<sup>11</sup>Jøts ja nwindson'ajtim Jesús wyaañ:

—Maanip ja nmigu'uk Lázaro; n'atsyuxpts øts inet ja'.

<sup>12</sup>Winets ja pyabøjkpitøjk ja ñiimaajyiyøø:

—Windsøn'ajtim, pøni tø tam idø'øn ja mya'oo'kni, pø møk'pøkwanip idø'øn ja'.

<sup>13</sup>Jade'en'ampyts ja nwindson'ajtim Jesús ja tijy, jøts ku ja Lázaro wyinaty tø y'oo'kni, jøts ja pyabøjkpitøjk jade'en ja wya'andi,

jade'en ja tijj wya'añ jøts ku ja nugo mya'ay. <sup>14</sup>Xjats ja ojts wa'ats tyukmadøyidi ja nwindson'ajtim Jesús:

—Tø ja Lázaro y'oo'kni. <sup>15</sup>Ne'egi xondakp øts jade'en jøts ku ø tø ngajam'aty, tyimy'øy'ajtp ne'egi jade'en jøts mee xjanchjawit. Wants tjaa'myindi jøts n'ats'ejxint.

<sup>16</sup>Winets ja Tomás, pøn yiktejp xeeñ'u'nk, ja'ats tnimaay ja myibabøjkpitøjk:

—Wan adøm nayide'en tjaa'myindi, jøts yø nmøøt'oo'kint.

**Ja Jesús tyuk'awimbejtíp  
ja jaa'y ja juky'ajtin jøts  
ja' juky'ajtin'ajtp kø'øm**

<sup>17</sup>Jøts ku ja nwindson'ajtim Jesús jam yja'lty, jøts ja tpaajty ja Lázaro, jøts ku ja wyinaty myaktaxk xøøwip tø ñajxøjkiñi.

<sup>18</sup>Wingon ja Betaniit kajp tyañ ma ja Jerusalén jam, majtsk kilometro jagujkpin ja yjagami.

<sup>19</sup>Jøts namay ja israelit jaa'y jam wyinaty tø y'atstøjk'ayø'ødyi ma ja Marta jam møøt ja María, jøts ja tkajpxjot'amøjkidi ja'agøjxp ku ja myigu'uk ja wyinaty tø y'ookni.

<sup>20</sup>Xjats ku ja Marta tnimadøøy jøts ku ja nwindson'ajtim Jesús jam wyinaty yja'atwa'añ, winets ja chø'jñ jøts ja tjøpkubajtiyii'ñ; jøts ja María jap ja tyøjkjotpy tyañ. <sup>21</sup>Jøts ja Marta tnimaay ja nwindson'ajtim Jesús:

—Windsøn'ajtim, kuk jeexyip tø mya'aty, ka'abik øts jeexyip ja nmigu'uk tø y'øøky. <sup>22</sup>Jade'ents ø nnijawi jøts ku mets ja Dios Teety mmo'ojit pøni ti mets ja m'amidøøpy.

<sup>23</sup>Winets ja nwindson'ajtim Jesús ja ojts ñii'mxyi:

—Juky'atp ja mmigu'uk jadigojk.

<sup>24</sup>Xjats ja Marta wyaañ, jøts ja tnimaay:

—Janch jade'en, nnija'wip øts jøts ku ja jadigojk t'awimbetit ja juky'ajtin, ku ja pyidsø'ømt jadigojk ma oo'kpi, jaanims ja'abi xøøwnim ku Dios tyika'pxt.

<sup>25</sup>Winets ja nwindson'ajtim Jesús ja tnimaay:

—Øts idø'on ja' pøn ttuk'awimbejtíp ja jaa'y ja juky'ajtin, jøts øts juky'ajtin'ajtp kø'øm. Pøni pøn ø xjanchja'wip, øy ja yja'øøky, juky'ajt kunaxpts ja ejtp. <sup>26</sup>Jøts pøni pøn ja jaakjuky'ajttip jøts pøni xjanchja'widip øts, ka'ats ja y'anmija'win nøjxk wyindigøy. ¿Mjanchja'widip?

<sup>27</sup>Jøts ja tnimaay:

—Windsøn'ajtim, njanchja'wip øts. Ndyimyjanchja'wip øts ku me mCristo, ja Dios U'nk, midi'iyip idø'on y'ity ya naxwiiñ menwamp.

**Ku ja Jesús ojts twinya'axy  
ja Lázaro ku tø y'øøky**

<sup>28</sup>Xjats ku ja Marta jade'en y'ukwaañ, winets ja ojts t'atsyajxi ja chø' María, jøts ja ojts amaa'tsk tnøjmi:

—Ixa ja windsøn ya, jøts ixap mwaadsøyi.

<sup>29</sup>Ja'ayi ja jade'en tmadøøy, jøts ja María jatyi pyidi'jky jøts ja ojts t'ats'ixy ja nwindson'ajtim Jesús.

<sup>30</sup>Ka'aním ja nwindson'ajtim Jesús wyinaty kyajptøki; nay ixjamnim ja wyinaty ma ja Marta ja møøt tø ñabyaadyi. <sup>31</sup>Jøts ku ja t'ejxtøø ku



ja María pyidi'jky ku ja wyinaty putyi tɔ pyidsimy, jɔts ja israelit jaa'dyi midi jam wyinaty tɔjkjotp tkajpxjot'aməkidiɓ ja ku'oogi, xjats ja tpadso'ondøø, jade'en ja wyinmaydi jam ja tijy yaxpi ñijkxy ma ja oo'kpi jam wyinaty tɔ ñaxøki.

<sup>32</sup>Winets ja María, ku ja yjal'jty ma ja nwindson'ajtim Jesús jam wyinaty, jɔts ja ojts ñagyuxendya'agyi nwindson'ajtim tyekyjø'm, jɔts ja tnimaay:

—Windsøn'ajtim, kuk jeexyɩp tɔ mya'aty ka' øts jeexyɩp ja nmigu'uk tɔ y'øøky.

<sup>33</sup>Xjats ku ja nwindson'ajtim Jesús ojts t'ixy jɔts ku ya'axy ja María jɔts ja israelit jaa'y nayide'endi midi ja María jam wyinaty tɔ pyadsøøñiyi, winets ja nwindson'ajtim ja jotmay ojts pyaadyiyi jɔts ja ojts tyimchaachjawɩ. <sup>34</sup>Winets ja tyiktiyy:

—¿Ma tɔ xyiknaxøkidi?

Jɔts ja yiknimaay:

—Windsøn'ajtim, men x'ats'ixy.

<sup>35</sup>Xjats ja nwindson'ajtim Jesús yjanchyajxy. <sup>36</sup>Jɔts ja israelit jaa'y winet wyandøø:

—Ejxti yjantyimchøjkpy tam yø tɔ y'ity.

<sup>37</sup>Jɔts ja jade'en winaagin wyandøø:

—Pø yø'øxi ja winap jaa'y tɔ tyikwin'ejxwa'kxy, ¿sudso yø niwine'enin sã tɔ tkatuñ ja Lázaro jɔts ja jeexyɩp tɔ kya'øøky?

**Ku ja Lázaro yjujkyiky jadigojk**

<sup>38</sup>Jɔts ja nwindson'ajtim Jesús ojts ja jotmay jadigojk tyatøkiyi, jɔts ja ñijkxy ma ja oo'kpi jam

wyinaty tɔ ñaxøki. Tɔjk'aawin ja tsaa jam, jɔts nawi tsaa ja tɔ yjaaktyimyikta'agi'y. <sup>39</sup>Jɔts ja nwindson'ajtim Jesús wyaan:

—Jigø'ødi yø tsaa.

Winets ja Marta, midi ja oo'kpi y'uchip, ja'ats ja ojts ñii'mxyi:

—Windsøn'ajtim, pø

janchxuu'knip inet yø', pø myaktaxk xøøwipts yø y'oo'kni.

<sup>40</sup>Jɔts ja nwindson'ajtim Jesús ñimaajyøø:

—¿Ti kidi ø tɔ nnigajpxy jɔts pøni ku xjanchjawɩ, winets x'ejxit ja Dios myøk'ajtin?

<sup>41</sup>Winets ja tjigiidiyi ja tsaa.

Jɔts ja nwindson'ajtim Jesús jam tsajpwemp ojts pyat'ixy, jɔts ja wyaan:

—Dios Teety, dioskujuyip ku øts ja n'ayuujk tɔ xmadøjyɩ.

<sup>42</sup>Nnija'wip øts jɔts ku mets ejtp ja nja' xmadøjyɩ, jɔts ja' øts jade'en xyikwamp jɔts yø jaa'y ja øy'ajtin tpaattit pøn jaty ixaadi, jɔts tjanchjawidit jɔts ku mets xkexy.

<sup>43</sup>Xjats ku ja jade'en

wyan'abajtyiñ, jɔts ja møk wyaan: —iLázaro, pidsøm jap!

<sup>44</sup>Jɔts ja oo'kpi pyidsiimy køpity pakpity, jɔts ja wyeen y'aaw twinwets'aty ja wet. Winets ja nwindson'ajtim tnimaay ja jaa'dyi: —Køkajti pakajti jɔts xmajstuttit, wan tñijkxy.

**Ku ja jaa'y tkajpxy'ajttøø  
jɔts yikmatst ja Jesús**

<sup>45</sup>Ja'agøjxpts ja israelit jaa'y namay tjanchja'widøø ja nwindson'ajtim Jesús midi ja María jam wyinaty myøøt, jɔts ja' ojts t'ejxti ku ja

nwindsøn'ajtim Jesús jade'en ttuuñ. <sup>46</sup>Winaagin tñinøkxtø jøts ja ojts t'ats'ejxti ja fariseotøjk, jøts ja ojts ttamimadya'akti sa ja nwindsøn'ajtim Jesús wyinaty tø y'adi'ich. <sup>47</sup>Winets ja fariseotøjk jøts ja teetywindsøndøjk møøt ñamyujkidi ja kutujk adsinaabyidi, jøts ja ojts ñømdi:

—¿Sudso ndaabyajtindit? Janch kawine'en yø jaa'y milagr'ajtin tjantyuni jøts ja eja'an tpikta'aky. <sup>48</sup>Ku yø jade'eñi n'ixmajtsindit, janch niduki'iyi jaa'y yø yjanchja'winiyit, jøts ja romit kudunktøjk myenidit, jøts ja tyikudigøøñidit adøm yø ndsaptøjk jøts adøm yø ngajp.

<sup>49</sup>Nay ja'abi jaa'y txøøw'ajtp Caifás, pøn wyinaty teetywindsøn'ajtp ja'abi jumøjt, ja'ats ja ojts ñii'myxidi:

—Mguidyimñija'wip mee ti, <sup>50</sup>ni xkanijawidi kudam adøm njayik'ødyunwa'añindi ku tu'ugyi ja jaa'y tku'oogit ja ñaajx ja kyajp, jøts kidi tuki'iyi kyudigøøgyøxt wine'en ja naajx ja kajp.

<sup>51</sup>Kidi kyø'ømwinmaa'ñipts ja Caifás yiktumpy ku ja jade'en wya'añ: jade'en'ampy idøøn ja', kumi ja' wyinaty teetywindsøn'ajtp ja'abi jumøjt, xjats ja Dios ja ojts yikwa'añi jøts ku ja nwindsøn'ajtim Jesús y'ookt tkudanit ja israelit kajp ja israelit naajx; <sup>52</sup>jøts kidi tyimy ja kajp tyimy ja naajx, ja'ayip nayide'en jøts ja niduki'iyi ja Dios y'u'nk y'una'jk tyikyø'omyukwängøjxi pøn wyinaty tø yø'øwya'kxnidi. <sup>53</sup>Winet ets ja israelit kudunktøjk tñiwinmaa'yidøø jøts ja nwindsøn'ajtim Jesús tyimy'ookt.

<sup>54</sup>Ja'agøjxp ja nwindsøn'ajtim y'ijty ka' nugo ajawi y'ukwidejtni jam may israelit jaa'yjotp, ojts ja jam cho'oni Judeit etjotp, jøts ja ojts ñijkxy ma jam wingon ja abak et midi nugo tsayjoojt. Jam ja ñijkxy ma ja kajp txøøwi Efraín, jamts ja ojts tmøøtsøøni ja pyabøjkpitøjk.

<sup>55</sup>Tyimdyøts jøts tpatnit ja paski xøøw midi ja israelit jaa'y tyundip, jøts idø'øn ja mayjaa'y yjantyimñøjkxti Jerusalén, jøts ja jam ttunwa'andi tpadunwa'andi ja kostrumbri, jøts pyøky ja wya'atstít ku ka'aním ja paski xøøw tpaaty.

<sup>56</sup>Jøts ja nwindsøn'ajtim Jesús jam yjanchyik'ixa'ay ku ja jap tsaptøjkjotptyi, jøts ja xem yam ñawya'añidi:

—¿Sa mee m'ukwa'añ? ¿Me'emp ja yjawi xøbatpi uk ka'?

<sup>57</sup>Jøts ja fariseotøjk, jøts ja teetywindsøndøjk, tø ja wyinaty tni'ana'amdi jøts ku pøn t'ext tñijawit ja nwindsøn'ajtim Jesús jøts ja jaty tñigajpxt, winets ja nwindsøn'ajtim Jesús yikmatst jøts ja yiktsu'umt.

### Ku ja Jesús ojts yiktagujaaxy ja pa'akxuu'kpi

**12** Xjats ku wyinaty ja paski xøøw tkapaatynim jadudujk xøøw, winets ja nwindsøn'ajtim Jesús ojts ñijkxy jam Betania ma kyugajpi ja Lázaro, pøn ja wyinaty tø tyikjujkyiky jadigojk. <sup>2</sup>Jamts ja a'ux y'øyiyiiñ jøts ja nwindsøn'ajtim Jesús ja yiktawindsø'øgi; ja Marta ja jam ojts wyingi'iyi, jøts ja Lázaro ja tmøøtkay møøt pøn jaty jamdi.

<sup>3</sup>Winets ja María tyikmiiñ kujkwa'kxy lyitrin ja aceite midi pa'akxuu'kp, jøts janch tsowi ja', ja'ats ja ojts ttaja'jxiyi ja nwindson'ajtim Jesús tyeky, jøts ja ñayjawaaya'i ttuktatiijch. Amuum ja tøjkjoojt pya'akxuu'kpøjkijxy. <sup>4</sup>Jøts ja Judas Iscariote, midi ja Simón myajnkíp, midi ja nwindson'ajtim Jesús pyabøjkpí'ajtpy, jøts midi ja wyinaty køy'akwajnip, ja'ats jade'en waan:

<sup>5</sup>—¿Tiku yø pa'akxuu'kpi ne'egi tø kyayiktøøky? Tígøøk magø'pxy denariin jeexyíp tsov'aty, jøts ayoobi jaa'y ja jeexyíp yiktabudøki.

<sup>6</sup>Kaja'agøjxpíp ja Judas jade'en wya'añ ku ja tpa'ayøy ja ayoobi jaa'y, pø ja meeñxi ja ne'egi pya'ayøøpy. Ja winmaa'ñ ja yikyø'opy ku ja myeech, jøts kumi jam ja wyinaty tkøjøløm'aty ja meeñ'abøjk'ii'ñ midi'ibi ja myibabøjkpítøjk myøøt'ajttíp, jøts ja amaa'tsk tyukpiky tyukøñ ja meeñ midi yik'ejttíp. <sup>7</sup>Jøts ja nwindson'ajtim Jesús tnimaay:

—Majtstu'ut, ja' yø íxa tø tpikta'aky midi tump ku ø nnaxøjkiñit. <sup>8</sup>Ja'atpyim ayoobi jaa'y, øy juuni jaty xmay'attit xpudøkidit; jøts øts, ka' meets ja xumiwin'ejxkunaxt.

**Ku ja Lázaro yikajpxy'aty  
ku tyik'ookwa'andi**

<sup>9</sup>Jøts ja israelit jaa'y may tnimadowdi ku ja nwindson'ajtim Jesús jam wyinaty Betania, jøts ja ojts tninøjkxti, kidi ja nwindson'ajtim Jesús nadyu'uk yik'ejxwamp, nayide'en ja t'ejxwa'andi ja Lázaro pøn ja

nwindson'ajtim Jesús wyinaty tø tyikjujkyiky. <sup>10</sup>Winets ja teetywindsøndøjk tkajpxy'ajtti jøts ja nayide'en tyimyik'ooktit ja Lázaro, <sup>11</sup>kumi ja' ñamyayi ja pøky tjagyajp ku ja israelit jaa'y ñawya'kxyidi, jøts ja may pyuwajtsniyidi jøts ja tjanchja'wiñidi ja nwindson'ajtim Jesús.

**Ku ja Jesús kyajtpøjkijyiii'ñ  
jam Jerusalén**

<sup>12</sup>Xjats idø'on ja jaa'dyi may ja jam wyinaty tø yja'atti Jerusalén, jøts ja xyøbaatwa'andi ku ja paski xøøw; jøts ku kyimjabom'ajty, jats ja ojts tñijawidi jøts ku ja nwindson'ajtim Jesús jam wyinaty yja'atwa'añ ja'abi kajpkøjxp. <sup>13</sup>Winets ja tiixy ja ojts tpooiti, jøts ja ojts ttapatsowdi ja nwindson'ajtim Jesús, yide'en ja wyandøø:

—iMøj Dios kyunuu'kxin! iØy wa'ats yø' midi íxyam Dios Teety kyejxpy, midi israelit jaa'y wyindsøníp!

<sup>14</sup>Jøts ja nwindson'ajtim Jesús tpaajty tu'uk ja buur jøts ja ojts ttawa'atspety, tyimbyatpy idø'on jade'en sam jap jaabyety nøkyijxpy:

<sup>15</sup>Meets Siøn kajpjotpit, kidi mjotmay'ookti;

ejx, pø íxats myiñ ja mwindsøn, yikxon buuru'nk ttaku'xni.

<sup>16</sup>Ka'ap ja pyabøjkpítøjk ja jatyí tja'gyukidøø yø'øbi winmaa'ñ, østi jaanim ku ja nwindson'ajtim Jesús wyinaty tø chajpajtni. Jaanimts yø tja'myajtstøø jøts kudam yø tñigajpxy ja nwindson'ajtim ku ja jap jade'en yja'ayi, jøts

tyimjade'ents ja wyinaty tɔ yjaty kyubety.

<sup>17</sup>Jɔts ja jaa'dyi midi ja nwindson'ajtim Jesús jam wyinaty mɔɔt, ku ja tyaxpidsiimy ja Lázaro jap oo'kpi jutjɔtpy, ku ja wyinaty tɔ tyikjujkyiky jadigojk, ja'ats idɔ'on jam tnmadyaktip sa jaty ti jaty ja wyinaty tɔ t'ejxti. <sup>18</sup>Patyts idɔ'on ja jaa'y ojts tpatowdi ja nwindson'ajtim Jesús, kumi tɔ ja wyinaty tnijawidi ja milagri'ajtin midi ja nwindson'ajtim wyinaty tɔ ttuñ. <sup>19</sup>Xjats ja fariseotɔjk agɔ'omyi ñawyajnidɔɔ:

—Tɔxi ixa xja'ejxti sa yɔ yjawi ñityu'unint. Ejxti, ejx niduki'iyi jaa'y pyanijkxyiyi.

### Ku ja griegit jaa'y t'ejxwa'andi ja Jesús

<sup>20</sup>Jɔts ja jaa'dyi midi jam wyinaty tɔ ñɔjkxti xɔbatpi Jerusalén, jam ja winaagindi pɔn griegit jaa'dyi. <sup>21</sup>Ja'ats jam tnmimendi ja Felipe pɔn kugajpip Betsaida jam Galileit etjotp, jɔts ja ojts tnɔjmidi mɔkta'aky:

—Ja Jesús ɔɔ teety n'ejxwampy.

<sup>22</sup>Xjats ja Felipe ojts tnmijnkxy ja Andrés jɔts ja ttukmadɔɔy; winets ja namajtsk tnmɔjkxti ja nwindson'ajtim Jesús, jɔts ja ojts ttukmadowdi. <sup>23</sup>Jɔts ja nwindson'ajtim Jesús ja ojts ñii'mxyidi:

—Tɔ tpaaty ku nxɔga'pxy ma ɔts yikxon nyikwinjawit nyikwindsɔ'ogit, pɔ Dios Teety ɔ xkajx jɔts ja naxwii'ñit jaa'dyi ngudanaapy. <sup>24</sup>Tiy janch ɔ nwa'añ ku mee nnɔjmi, jɔts ku tu'uk ja ariinbajk kyaka'ay naxjɔtpy

jadi'iñi ja ñaxy; pɔni midi'its ka'ap naxjɔtpy, ne'egi may ja wyimbijty ku ja wyindigoy. <sup>25</sup>Nayide'en idɔ'on meetsmi. Pɔn kasajatyim nay'ejxip, pɔn nabya'ayojip, ka'ap ja mibaat ja nitso'ok'ajtin tpaaty; pɔnts kanabya'ayojip, wan tjaty sa yjaty ɔts kɔjxp, ja'ats idɔ'on tpaatp ja nitso'ok'ajtin. <sup>26</sup>Pɔni pɔn ɔts xpabɔjkp'atwamp, wan ya tmiñ jɔts ɔ xmɔɔtwidettit xmɔɔtsɔonidit. Yikajxa'akpts idɔ'on ja' jam Dios wyingujkp.

### Ku ja Jesús tnigajpxy ja y'o'jkin

<sup>27</sup>Janch tɔ ɔts ixyam ndyimyjotmaadyɔki; ɔjɔts ti sa ɔ nwa'ant? ɔJa ti ja ɔ nwa'ant: “Dios Teety, ka' ɔts jade'en xyikjatt xyikubatt sa ɔts ixyam njatwa'añ ngubatwa'añ”? Pɔ ka'axi ɔts ja' tɔ nnimiñ jɔts ɔts jade'en ngajatt. <sup>28</sup>Metsts Dios Teety tu'ugyi ja mja' majada'akp.

Winets yikmadɔɔy ja ayuujk jɔts ku jap yjawi tsajpjɔtpy wya'añ:

—Tɔ ɔts ja jade'en nduñ, jɔts ndunwampy ɔts ja jade'en jadigojk.

<sup>29</sup>Jɔts ja jaa'y midi jam wyinaty amidoodujktip, yide'en ja wya'andi jɔts ku ja y'anaawi midi jade'en wyinaty tɔ wyina'añ, jɔts pɔmbi wamidip:

—Ja ankilis yɔ tɔ myigajpxyi.

<sup>30</sup>Winets ja ñimaajyidi ja nwindson'ajtim Jesús:

—Ka' ɔts kɔjxpip yɔ ayuujk jade'en tɔ yikmadɔɔy, meets kɔjxp yɔ jade'en wya'añ. <sup>31</sup>Ixyats idɔ'on tɔ tyimya'aty ja xɔɔw ja jumɔjt ku ya'atpi naxwii'ñit jaa'y yiktiidyu'undit, jɔts ku nayide'en yikpawopt ja miku' midi ya naxwiiñ

tnigubajk'ajtp ja kya'øybi. <sup>32</sup>Jøts ku øts jam nøjkx nyikpikta'aky jam kruskøjxp, ñijawidip ja øy pøn jøts øts xjanchjawidit.

<sup>33</sup>Ja'ats idø'øn ja jade'en yjatijpy sudso ja wyinaty y'ookwa'añ.

<sup>34</sup>Xjats ja mayjaa'y ja yide'en y'adsoojøø:

—Tø øø nnimadøy ku pøngapøn tkajpxy øøts ja ngutujk, jøts ku ja Cristo yujky'att xemikøjxp. ¿Sudsots me mwa'añ jøts ku mets myikpikta'akt jam kruskøjxp? ¿Pøn idø'øn ja' midi tsoo'mp tsajpjøtpy, midi ja naxwii'ñit jaa'y tkudanaapy?

<sup>35</sup>Winets ja nwindsøn'ajtim Jesús ja tnimaay:

—Mjaakujajidip mjaakudøø'kxidip meets ja jaj, tyimdyøts jøts ja kya'uk'ejtnit. Jaakyiktundits ejx yjaakja'atynim, jøts kidi kube'ets kugoots mjatti; ja jaa'y pøn jade'en jajttip, ka'ap ja tnijawidi pø sa ja yjattit kyubattit.

<sup>36</sup>Janchja'widik øts nja', pø øtsxi dø'øn ñamyayi jade'en sam ja jaj, jøts jaaktyimñayamnims øts x'ejxti xnijawidi jøts mee njaakja'bøkt.

Ja'ayi ku ja nwindsøn'ajtim Jesús ojts jade'en y'ukwani, jøts ja cho'onaa jøts ja jadi'iñi yø'odyigøøñi.

**Ya'at tnigajpxp tigøjxp ja israelit jaa'y ojts tkajanchjawidi ja Jesús**

<sup>37</sup>Øy idø'øn ja nwindsøn'ajtim Jesús wyinaty kawine'en tø tjatuñ ja milagri'ajtin jam mayjaa'y wyingujkp, jøts ni jade'en ja kyayikjanchjawi. <sup>38</sup>Ja ti jats ja jade'en kyajatt sa wyinaty tø wya'añ ja Dios kyugajpxy Isaías, ku ja yide'en tjaadyaañ:

Dios Teety, ¿pøn adøm ja ngajpxy ja n'ayuujk tø x'lukupøjky'a'am?

Øy ja Dios Teety ja myøk'ajtin tø tnanky'ijxyi, ka'ap ja pøn tmøjpikta'aky.

<sup>39</sup>Jøts idø'øn ja jade'en ka'ap tjanchjawidi, nayide'ents ja Isaías wyinaty tjaadyaami:

<sup>40</sup>Dios ja jade'en tuujnidip, jøts ja jade'en wimbeets kugoots yik'ityidi, jøts ja ka' tkupøkti, jøts ja wyeen ja tkada'ejxtit øy ja wa'ats tyimyja'ejxti, jøts ja nika' ja ja'gyukin tjagyaptit, jøts ja nika' ñabyøkjawiyidit øy øts ja wine'en njayikpøkwy'a'atswa'andi.

<sup>41</sup>Jade'en'ampy ja Isaías jade'en wyaañ, kumi tø ja wyinaty jekyip Dios Teety tyuk'ijxyi jøts ku jade'en ja Jesús ja y'øy'ajtin xuk'ejxint, jøts ja ojts jade'en patki'lyi tnigajpxy.

<sup>42</sup>Jøts øy idø'øn ja yjajade'eni, may ja israelit jaa'y tjanchja'widøø ja nwindsøn'ajtim Jesús, østi windsøndøjk paat winaagin tjanchja'widøø; ja'ayi ku ja pøn ka' ttukmadowdi, ja'agøjxp ku ja ttsø'ogidi ja fariseotøjk jøts ja ka'ap tyukmajststu'udit ja tyunk. <sup>43</sup>Ja jaa'y yja' ja ne'egi yikmøjtøjkidip, jøts ka'ap Dios yja'.

**Ja Jesús y'ayuujk payø'øyiyip ja jaa'y pyøky**

<sup>44</sup>Jøts ja nwindsøn'ajtim Jesús møk wyaañ:

—Ja' pøn ø xjanchja'wip, kidi øtsip ja tu'ugyi xjanchja'wip, nayide'en ja ñamyayi tjanchjawi ja Dios Teety midi ø xkajxp. <sup>45</sup>Jøts

pøn øts ixa x'ejxp xnija'wip, nayide'ents ja t'ixy tnijawī pøn ø xkajxp. <sup>46</sup>Jøts ku øts ñamyayi jade'en sam ja jaj, ja' ø tø nnimiñ ya ñaxwiiñ pøni pøn ø xjanchja'widip, jøts kidi øts ja wimbeets kugoots nyiktandi. <sup>47</sup>Pøni pøn ø xmadojip ja n'ayuujk jøts ka' tmøjpikta'aky, kidi øtsip ja ndabayø'øpy ja pyøky; kaja'ajip ø tø nnimiñ jøts øts ja ñaxwii'ñit jaa'y ndabayø'øyit ja pyøky, pø ja'axi ø nnimimpy jøts øts ja nyikniitso'ok'attit. <sup>48</sup>Pøni pønts øts nja' xkatsojkip jøts ka' tmøjpikta'aky sa ø nwa'añ, jats ja' pøn ja ttabayø'øyip ja pyøky, nayø'øyi ja nøjlx kø'øm ni'øøniyip sa jaty ø tø nwa'añ, ku kyøxt ja ñaxwii'ñit. <sup>49</sup>Kidi ja'ajip ø ngajpxpy sa ø kø'øm nwinmay; ja' midī ø xkajxp, ja Dios Teety, ja' øts yø xanigutujk'ajtp jøts øts jade'en ngajpxt, jøts øts jade'en nyik'ixpøkt. <sup>50</sup>Jøts wa'ats ø nnijawi, jøts ku ja' wya'añ ja Dios Teety y'ana'amin sudso yikpaatt ja jujky'ajtin xemikøjxp. Jade'ents idø'on, pøni sa jaty ø tø nwa'añ, jade'en øts idø'on ja tø ngajpxnaxy sam øts ja Dios Teety ja tø xanigutujk'aty.

**Ku ja Jesús pakpujy ja pyabøjkipitøjk**

**13** Tyimdyø jøts ja paski xøøw tpatnit, jøts ja nwindson'ajtim Jesús wa'ats ja tnija'wiñi jøts ku tø kya'pxy ja hori jøts ku ja tmatjstu'utt ja ñaxwiiñ'ajtin, jøts ja Dios Teety ja tniñøjkxnit. Ejtp ja tpa'ayøøy ja pyabøjkipitøjk, xjats ja jade'en tpiakta'aky møk ja ejxa'an, jøts ja tñanky'ijxyi mabaat ja pa'ayo'owin ja tjagyepy.

<sup>2-4</sup>Jøts ja Simón myajnk, ja Judas Iscariote, tø ja miku' ja wyinaty tyatøkiyi, jøts ja tyukwinmaa'ñ'atyī sudso ja tka'ødyu'unt ja nwindson'ajtim Jesús. Wa'ats ja tnijawī ja nwindson'ajtim Jesús jøts ku ja nay jam ñijkxy ma ja Dios Teety ja tø yiktsøøñi, jøts ku ja amuum tø kyutujkmø'øyi. Xjats ku dø'on ja jam wyinaty y'a'ux'atti, winets ja tyanaagyukiyi'ñ jam kyaadyaajk jøp'am, jøts ja twejtstaajky ja wyet, jøts poop wet ja ojts ñadyatenwøø'niyi. <sup>5</sup>Xjats ja nøø t'ada'amiyi'ñ jam købuj'i'ñjotp, jøts ja pyabøjkipitøjk ja ttapakpujpinaxwa'jky, jøts ja nay jatyī ttuktati'ich ja poop wet midī ja jam wyinaty tyenwøø'najtpy.

<sup>6</sup>Jøts ku ja wyinaty tpakpujwa'añ ja Simón Pedro, winets ja ojts ñii'mxyi:

—Windsøn'ajtim, ¿mets ne'egi ndeky xpujip?

<sup>7</sup>Jøts ja nwindson'ajtim Jesús ja t'adsøøy:

—Ka' mets yø ixyam xja'gyuki, mja'gyukipnims mets yø nøjlx.

<sup>8</sup>Jøts yide'en ja ñii'mxyi ja Pedro: —Ka' me mibaat ndeky xpujit.

Winets ja nwindson'ajtim Jesús ja tnimaay:

—Pøni ka' øts yø mdeky nbujy, ka'ats me n'ukmigu'ukwanit.

<sup>9</sup>Winets ja Simón Pedro wya'añ, jøts ja nwindson'ajtim Jesús yiknøjmi:

—Winets ø windsøn'ajtim amuum xpujiyit ja ngø' ngubajki; jøts ka' nugo ja ndeky.

<sup>10</sup>Jøts ja nwindson'ajtim Jesús ja tnimaay:

—Øy ku ja'ayi tyeky tpujt pøn tse'abajtipnim, kumi wa'ats

ja amuum. Nayide'ents meets m'anmija'win wya'adsí øy kidyimñiduki'iyi.

<sup>11</sup>Jade'en'ampy ja wyaañ ku ja ñimy: “Øy ka' niduki'iyi mdyimwya'adsídi”, ja'agøjxp ku ja wa'ats tnijawi pøn ja wyinaty køyakwajnip.

<sup>12</sup>Xjats ku ja jade'en y'abajtiyíi'ñ tpujkøjxiyi ja pyabøjkipitøjtk tyeky, winets ja ñadyanijajni ja wyet jadigojk, jøts nay jam y'ixaajky mā ja mesi jøts ja tnimaay ja pyabøjkipitøjtk:

—¿Mnija'widip tigøjxp jade'en tø ndundi? <sup>13</sup>Meets, xmaestri'ajtp meets, xwindsøn'ajtin'ajtp meets, janch tiigyajpxy kumi janch jade'en.

<sup>14</sup>Pøni øts tamts maestri, jøts pøni øts tamts windsøn'ajtim, tøts ja mdeky nbujidi, nayide'ents meets idø'øn xuumit xem yam. <sup>15</sup>Tø nduk'ejxti jawyeen, jøts nayide'en xu'undit sam ø tø ndunjøpi. <sup>16</sup>Jøts janch øts idø'øn nwa'añ, jøts ku ka' pøn tumbi tjinaxy ja wyindsøn; uk ja jaa'y pøn kexy yø'øpy, ka'ap ja tjinaxy pøn ja kajxip. <sup>17</sup>Jøts pøni mja'gyukidip yø'øbi winmaa'ñ jøts jade'en xu'undit, jotkujkts x'ejxtit.

<sup>18</sup>Jøts kidi niduki'iyip meets jade'en ndijy; nnija'wip øts ja' pøn jaty ø tø nwi'ixy. Kuwanits jade'en yjatt sam jap jaabyety nøkyijxpy: “Jats ja tu'uk tø x'ukmidsepøjkní pøn ø møøt ngay n'uuky.”

<sup>19</sup>Patki'iyi øts ya'at yam nnigajpxy jøts ku jade'en nøjlx yjaty, jøts xiyyawidit xjanchjawidit jøts pøni pøn øts. <sup>20</sup>Janch øts idø'øn nwa'añ, jøts ku øts ja xkupiky pøni pøn ø xkupøjkip ja ngudanaabyi; jøts pøni pønts øts jade'en xkupøjkp, ñayi

kyupijkypts ja nayide'en pøn ø xkajxp.

### Ku ja Jesús tnigajpxy sa ja Judas kyøyakiyit

<sup>21</sup>Xjats ku ja wyinaty jade'en tø wya'añ, jøts ja tyimchaachjotmaadyøjkiyíi'ñ, jøts ja ojts yixxon wa'ats tnigajpxy:

—Tiy janch mee nnøjmi, jøts ku meets ja nidu'ugin pøn ø xka'ødyunwamp.

<sup>22</sup>Winets ja pabøjkipitøjtk xem yam ñawyin'ejxjø'jkidøø, jadi'iñi tkamidaabyaatti pøni pøn idø'øn yiktejp. <sup>23</sup>Winets ja tu'uk, midi ja nwindsøn'ajtim Jesús janchminamyaajyip, jam ja wyinaty pyukø'øm tmøøt'a'ux'aty. <sup>24</sup>Ja'ats ja Simón Pedro amaa'tsk ñimaay jøts tyiktø'øt pøn idø'øn yiktejp. <sup>25</sup>Winets ja wingon tpuwa'adsiyíi'ñ ja nwindsøn'ajtim Jesús, jøts ja tnimaay:

—Windsøn'ajtim, ¿pøn idø'øn midijpy?

<sup>26</sup>Jøts ja nwindsøn'ajtim Jesús ja ojts yide'en y'adsøyi:

—Wan øts tsapkaaky tukpidasi t'uknimuji, jøts pøni pøn øts inet ja nmøøpy, ja'ats idø'øn ja wyinaty.

Xjats ja ojts jade'en tñimuji ja tsapkaaky, jøts ja ojts tmø'øy ja Judas Iscariote midi ja Simón myajnkíp. <sup>27</sup>Jøts ku ja Judas ja'ayi t'axajiyíi'ñ ja tsapkaaky, jøts ja miku' ja ojts tyatøkiyi. Winets ja nwindsøn'ajtim Jesús ja tnimaay:

—Jatyí dø'øn xungojt midi mdunwampy.

<sup>28</sup>Jøts nipøn ja tkamadooguki tigøjxp idø'øn ja nwindsøn'ajtim Jesús jade'en tnimaay ja

Judas. <sup>29</sup>Ja Judasts idø'on wyinaty tkøjø'omit'ajtp ja meeñ abøjk'ii'ñ, jøts winaagin jade'en wyinmaydi pø ja'ajik idø'on tijy ja nwindson'ajtim Jesús tyijpy, jøts ja Judas t'atsju'uty ti jaty tsojkíp ti jaty tunwamp ku ja xøow, uk tmo'ot tigati ja ayooði jaaly. <sup>30</sup>Xjats ku ja Judas wyinaty tø tkaagyixy ja chapkaaky, jøts ja ojts chøøñ. Koodsni wyinaty.

### Ja jemy ana'amin

<sup>31</sup>Xjats ku ja Judas wyinaty jade'en tø chøøñ, winets ja nwindson'ajtim Jesús wyaañ: —Yamnimts inet tiy yik'ext yiknijawit ja nmøk'ajtin, jøts nay ja Dios Teetyts myøk'ajtin nanky'ejxip. <sup>32</sup>Jøts kumi nanky'ejxip øts ja Dios Teety myøk'ajtin, nayide'ents ja tnanky'ejxmiyit øts ja nmøk'ajtin, jøts tsojk ja jade'en ttu'unt. <sup>33</sup>Ka' meets u'nk jeky n'ukmøøtsinaañit. Nayide'en meets yam ndukmadoowa'añ sam adøm ja nmigu'uk israelit jaa'y nnimaadyøø, jøts ku ja jap ka'ap ñøjkxtit ma ø nnijkxy øy øts wine'en xja'ixa'ay. <sup>34</sup>Ixyamts nmo'odi ja jemy ana'amin: jøts ku xem yam mnami'yø'atidit mnamiyuyj'atidit. Nayide'en sam mee njanchøkyin, nayide'ents idø'on mnachokidit xem yam. <sup>35</sup>Pøni mdundip jade'en, tyumnijawidipts jade'en øy pøn jøts ku mee ø xpabøjkpi'aty.

### Ku ja Jesús ojts tnigajpxy jøts ku Pedro kyanigajpxiyit

<sup>36</sup>Xjats ja Simón Pedro tyiktiiy ja nwindson'ajtim Jesús:

—Windsøn'ajtim, čma dø'on mnøjkxwa'añ?

Jøts nwindson'ajtim Jesús ja y'adsoojoø:

—Jap ma ø nnijkxy, ka'ap ø mibaat ixyam jap xpanøjkxt; xpanøjkxp øts, ja' ku jaanim.

<sup>37</sup>Winets ja Pedro wyaañ, jøts ja nwindson'ajtim Jesús yiknøjmi:

—čTigøjxpimts windsøn'ajtim ku øts ka' ixyam ndsoont? Ixyats øts, øy me ngu'oogit.

<sup>38</sup>Jøts ja nwindson'ajtim Jesús t'adsøøy:

—čJanch idø'on mwa'añ jøts ku ø xku'oogiwyā'añ? Øts wamp, ka'anim wyinaty tsapni'aaw y'aya'axy ku mets wyinaty tigøøjk ojk tø xkagupiky ku me x'ijxy'aty.

### Jesús køjpx ja Dios Teety yikpaatt yik'ext

**14** 'Kidi mmaydi mdajti, ajot'atti Dios Teety, jøts ajot'ajttik øts nayide'en. <sup>2</sup>Ma chøøni ja Dios Teety may tsinaadyaajk ja jap tmøødi; ku jeexyip ka' yjade'eni, tø meets ja jeexyip ndukmadooni. Jøts wants ø tniykxy jøts øts ja n'a'ejxit ma mdsøønidit. <sup>3</sup>Jøts kuts øts wyinaty tø nnijkxy, jøts kuts øts ja wyinaty tø n'a'ejxi ja tsinaadyaajk, winets ø nme'ent jadigojk jøts mee nmøødiñit, jøts nay jap mjujky'attit ma øts idø'on jap ndsinaawya'añ. <sup>4</sup>Mnija'widixi pøni ma ø nnijkxy, jøts mnija'widixi ja tuu'. <sup>5</sup>Winets ja Tomas tnimaay ja nwindson'ajtim: —Ka'ap øø windsøn'ajtim ja nnijawi pøni ma me mnøjkxwa'añ; čsudso'ampy øøts ja tuu' nnijawit?



<sup>6</sup>Jòts ja nwindson'ajtim Jesús ja t'adsøø:

—Tum øts amuum ja tuu', ja tyiibi yjanchpi øts nayide'en, jòts ja kunuu'kxy jujky'ajtin nyajkpy. Øts køjxp ja Dios Teety yikpaatt yik'ext. <sup>7</sup>Kuk øts jeexyip xnijawidi pøni pøn øts, nayi mnija'wipts meets jeexyip nayide'en ja Dios Teety; jòts tøts idø'øn ja ixa xjanija'wiñidi, mja'ejxtipts idø'øn ja'.

<sup>8</sup>Winets ja nwindson'ajtim ñimaajyøø ja Felipe:

—Windsøn'ajtim, ja'ayi ku øø xtyimdyuk'ext ja Dios Teety, wan øø t'ijxy.

<sup>9</sup>Jòts ja nwindson'ajtim Jesús ja yide'en t'adsøø:

—Windi'ixyip mee Felipe nmīnabyaajtniyidi, ¿jòts ni jade'embaat me xka'ijxy'ajtni? Pøni pøn ø x'ejxp, ñayi y'ijxy ja nayide'en ja Dios Teety; jòts, ¿sudso'ampyts me x'amidøø jòts mee nduk'ext ja Dios Teety? <sup>10</sup>¿Ka' xmibiky ku øts Dios Teety møøt n'ity, jòts ku øts ja nayide'en xmøøt'ejtmi? Tuki'iyi sã jaty nnøjmidi, kidi ngø'ømwinmaa'ñjotpyip øts yø njuuty. Ja Dios Teety midi ø xmøøt'ejtp, ja' kø'øm tyunk tump. <sup>11</sup>Jòts janchja'wik øts jòts ku øts Dios Teety møøt n'ity, jòts ku øts ja nayide'en xmøøt'ejtmi; uk pøni ka'ats, øyts øts ja'ayi xajanchjawit, pø m'ijxpyxi ti jaty ø ndumpy. <sup>12</sup>Jòts tiy janch mee nnøjmi, pøni pøn ø xjanchja'wip, ñayi yjatp ñayi tyu'ump ja nayide'en ti jaty ø njajtpy, ti jaty ø ndumpy, jòts ja tyikne'egidit tyikaja'adit ja'agøjxpts

kuts ja Dios Teety nmøøt n'ett.

<sup>13</sup>Jòts tuki'iyi pøni ti jaty mee m'amidøøpy ku ø xkajpxpaattit, øtsts ja kø'øm jade'en ndu'ump, jòts øts jade'en nyikwingaxø'jkit ja Dios Teety myøk'ajtin y'øy'ajtin.

<sup>14</sup>Ndu'ump øts jade'en pøni ti jaty mee m'amidøøpy jòts ku øts xakajpxtit.

### Ku ja Jesús wya'añ jòts ku ja Espiritu Santo tkaxt

<sup>15</sup>Pøni xtsojpk tam meets, paduujnidik meets ja n'ana'amin.

<sup>16-17</sup>Jòts nnøjmiø øts ja Dios Teety jòts ja mdanigaxidit tu'uk pøn mbudøkiyidip, pøn myikjot'amøkpøkiyidip, pøn ja tyiibi yjanchpi myøøt'ajtpy. Jòts ja'ats meets møøt m'ett kunaxt. May jaa'y ja kyagupøkit ja'agøjxp ku ka' t'ejxti tnijawidi. Jòts meets, tø meets ja xnijawi, pø ixaxi ja xmøødidi, jòts ja'ats mee møøt m'ett. <sup>18</sup>Ka' mee nadyu'uk nyiktañ, nniwimbett meets jadigojk.

<sup>19</sup>Wingonip ja xøøw ku ø ka' mā n'ukyik'ejxnit; jòts meets, x'ejxp meets; kumi jujky øts, mjujky'atpts meets. <sup>20</sup>Jaanimts xja'gyukidit jòts ku øts ja Dios Teety møøt n'ity, jòts meets xmøøt'ejtmi, jòts mee nayide'en nmøøt'ejtmi. <sup>21</sup>Pøn tø tnijawi jòts pøni xpaduujniyip øts ja n'ana'amin, jade'en ja tyiknigüe'exy jòts ku øts ja xjanchøky. Jòts ja'ats ja Dios Teety chokp pøni pøn ø xtsojpk, jòts ndsokp øts ja nayide'en, jòts ja'ats ø x'ejxp, ja'ats ø xnijawip ku nnanky'ejxit øts nja'.

<sup>22</sup>Winets ja yjadu'ukpi Judas ja ñimaajyøø (nigidi Iscariotibi wamp midi ja Jesús køyapk):

—Windsøn'ajtim, ÷tigøjxp ku øøts ja ja'ayi n'ext ku mnanky'ejxit, jøts nika'ap niduki'iyi ja naxwii'ñit jaa'y?

<sup>23</sup> Jøts nwindsøn'ajtim Jesús y'adsøøy:

—Pøn ø xtsojqp, pyadumpy ja' sa ø nwa'añ, jøts ja'ats idø'øn tsokip ja Dios Teety; jøts ja'ats ø nnime'emp møøt ja Dios Teety, jøts øøts ja xemikøjxp nmøøt'ett. <sup>24</sup> Jøts pøn ø xkatsojqp, ka'ap ja tmøjpikta'aky sa ø nwa'añ. Yø kajpxy yø ayuujk ixa xmadowdi, ka'øtsip yø' nja'; ja' yø' yja' midi ø xkajxp, ja Dios Teety.

<sup>25</sup> Ndukmadoogøjxtip yam tuki'iyi, njaaktyimyøøtsinaadyipnim yam; <sup>26</sup> ja Espiritu Santots midi ja Dios Teety mdanigaxiyidip jøts øts ja xkudanit, ja' idø'øn mbudøkiyidip, ja' idø'øn mgajpxjot'amøjkiyidip jøts ja mdukjajtkøxidit tuki'iyi, jøts nay ja' mdukja'myajtskøxyidip tuki'iyi sa jaty mee tø nnøjmi.

<sup>27</sup> Jotkujk nnawya'kxa'andit. Nyajkpy øts ja øy'ajtin tsuj'ajtin. Ka'ap øts jade'en nyaky sam øy pønin nugo wya'añ. Kidits mmaydi mdajti, ka' mee mdsø'øgit. <sup>28</sup> Tøxi xmadowdi ku ø nnimy jøts ku ø nnijkxy, jøts ku ø nme'ent jadigojk jøts mee nmøøtsøønit. Kuk meets jeexyip xjanchøky, mjanchxondakp meets jeexyip ku tø xnijawidi jøts ku nninijkxy ja Dios Teety; kumi ja' idø'øn jawaani møj jøts nigidi øts. <sup>29</sup> Patki'jyi ya'at jade'en ndukmadowdi jøts ku wyinaty jade'en yjaty jøts xjanchjawidit.

<sup>30</sup> Ka' mee møøt jeky n'ukmøøtnagyajpxniyit; ja'agøjxp ku ja wyingøñ ja Satanás pøn yikutujkp ya naxwiiñ. Øy øts

nmøk'ajtin ja xjagamimajadaajkiyi, <sup>31</sup> jatpts jade'en jøts jade'en tñijawit ja naxwii'ñit jaa'y jøts ku ø ndsøky ja Dios Teety, jøts ku øts ja nbaduñ sa øts ja tø x'ane'emy. Tanidits jøts wan ya ttsøø'ñindi.

Ja uvi tsa'am kipy

**15** 'Jade'en øts idø'øn ñamyayi sam uvi tsa'am ñiguipy, jøts ja Dios Teety jade'en sam ja jaa'y midi ja uvi kipy t'ejx'ejtp. <sup>2</sup> Jøts ja tyikwinajki ja y'awaj ja y'axeeñ midi katøømip; jøts midi tøømyip, yikxon ja tyikwa'ach twibøøty twibiky ma ja jam t'ijxy sa yjatwa'añ, jøts ja jawaani may yjaaktyimdyøømit. <sup>3</sup> Nayide'ents meets idø'ønmi; tø mee mwatsni, ja ixpøjkin mee tø myikwa'achi midi mee tø nmø'øy. <sup>4</sup> Kidi mee xmajtstutni, kumi ka'ap mee nmajtstu'uty. Ka'axi kipy awaj tyøømi jadi'iñi ku ja kya'ity ja ñiguipy; nayide'ents meets idø'ønmi, ÷ti mee nadyu'uk mnityu'ump ku mee wyinaty ja nja' tø x'ixmajtsniyi?

<sup>5</sup> Øts idø'øn jade'en sam ja ujts ñiguipyin, jøts meets jade'en sam ja' y'awaj y'axeeñin. Pøni pønts ø xkamajtstutp, jøts ku øts ja nayide'en ka' nmajtstu'uty, ja'ats idø'øn ja yja' møj wingaxø'økp; jøts ka' mee ti nadyu'uk mayi ku ø nga'ett. <sup>6</sup> Pøni pønts ja nja' xkaminamyajjiyiyip, ja'ats jade'en yik'ixjibep sam ja kipy awaj midi ka'øy, jøts kuts ja tyø'øtst jøts ja jønjøtpy yikpikta'akt, japtis ja tyø'øty.

<sup>7</sup> Pøni ka' mee xmajtstu'uty, pøni ka' meets ja n'ixpøjkin

xja'dyigøjyidi, amidowdits pøni ti mdsojktip jøts meets ja myikmo'ot.

<sup>8</sup>Ku yikxon xpadundi ja Dios Teety yja' sa ttsøkyin, jade'en'ampyts ja y'øy'ajtin myøk'ajtin yikpa'ixy, jøts nayide'en idø'on yiknijawit ku meets idø'on xjanchpabøjkipi'aty.

<sup>9</sup>Jade'en mee ndsøky sam øts Dios Teety xtsøkyin; tun'ejtik meets yø nja' ku meets ja tsojkin ndami'ity. <sup>10</sup>Pøni xpaduujnidip øts ja n'ana'amin, jade'en'ampyts mee møøt m'ettit øts ja ndsojkin, nayide'en ñamyayi sa øts ja nDeety y'ana'amin nbaduujniyi, jade'ents øts idø'on ja chojkin nmøøt n'ity.

<sup>11</sup>Jade'en'ampy meets jade'en nnøjmi, jøts mjotkujk'attit nayide'en sam øts, jøts ejtni xoni x'ejxtit. <sup>12</sup>Ya'at øts idø'on n'ana'amin'ajtpy: øy yikxon xem yam mnamyayidit mnachokidit, nayide'en sam øts ja tsojkin nbikta'aky sa mee ndsøky.

<sup>13</sup>Jade'en idø'on ja tsojkin møj yikjagyepy pøn amuum nayojxip, jøts ja myigu'uktøjtkudani jøts jujky'ajtin ja tpaattit.

<sup>14</sup>Meets idø'on nmigu'uk'ajtpy pøni mdundip jade'en sa ixa n'ana'amdi. <sup>15</sup>Ka' mee ndiij jøts ku mee mdumbi, kumi ka'ap ja tumbi tnijawi pøni ti jaty tyumpy ja wyindsøn. Nmigu'uktijpyts meets yam, ja'agøjxp ku tuki'iyi tø nduknija'wigyøxti sa jaty øts ja Dios Teety tø xnøjmi.

<sup>16</sup>Kameedsipxi tø xpikta'aky; pø øtsxi mee kø'øm tø nwi'ixy, jøts mee tø ndanipiky jøts nøjxk ja mdunk yikxon xyikwingaxø'økti, jøts wan tmøji wan tkaja'aji. Jade'ents ja Dios Teety mmo'ojidit

pøni ti jaty m'amidoodip ku ø xkajxpaaattit amumjoojt. <sup>17</sup>Yø' idø'on nda'ana'amdip, jøts xem yam mnabya'ayowidit jøts ja tsojkin xjagyaptit.

**Ku ja ka'øyjaa'dyi tkatsokti ja Jesús møøt ja pyabøjkipitøjtk**

<sup>18</sup>Pøni mmi'ajkiyidip ja' pøn ya ñaxwiiñ, mnija'widipxi jøts ku øts ja jawyeen nayide'en tø xuñ. <sup>19</sup>Ku meets jeexyip nayide'en m'adi'ich sam pøn ya ñaxwiiñ wyinmaydi, nayide'ents meets ja jeexyip mdsøkyiyi sam ja ttsøkyin pøn nayide'endi sam ja'ajindi. Øts meets ya tø nwi'ixy ya ñaxwiiñ ma nayide'en chøønidi pøn jade'en winmaadyip, jøts ja'agøjxp myikmi'ekyidi kumi ka'ap ja'abi winmaa'n x'ukyikyø'øñidi sam o pøn ñaxwiiñ. <sup>20</sup>Ja'myatstits sa tø nnøjmidi, jøts ku ka'ap ja tumbi ñamyøjyit sam ja wyindsøn. Tøbaats ø nyikpawidity ku ngayikupiky, nayide'ents meets idø'on myiktumit; jøts pøni xpaduujnidipts øts ja n'ixpøjkin, nayide'ents meets ja m'ixpøjkin yikpadumit. <sup>21</sup>Øts køjxp idø'on jade'en myiktu'undit ja'agøjxp ku ka' tnijawidi pøn ø xkajxp.

<sup>22</sup>Ka'ap ja jeexyip ti pøktyi, kuk øts jeexyip ngamiñ, kuk øts ja jeexyip ngaduknijawidi. Ixyam ti ñikyajpxtip jøts ja pyøky kyayiktagubatit; <sup>23</sup>ja' pøn ø xmi'ajkip, ñayi mi'ajkip ja nayide'en øts ja nDeety. <sup>24</sup>Ka'ap yø jeexyip ti pøktyi kuk øts yø jeexyip ka' ti nduk'ejxti midi ø tø nduñ yø' wyingujktyi, sam ka'ap pøn jade'en tø tyuk'ijxyidi; tø yø

t'ejxnidi, ja ti ja'ats yø myija'widip, pø xmi'ajkidipxi øts yø', jøts ñayi myi'ajkidip yø nayide'en ja Dios Teety. <sup>25</sup>Ja'agøjxpts ya'at jade'en yjaty kumi ka'pxy jade'en yjatt sa ya'at kajpxy ayuujk wya'añ, midi jap køxja'ay yø' kyutujkjøtptyi: "Nadøki øts yø xmi'ekyidi."

<sup>26</sup>'Paty øts ja Dios Teety xukaxt ja Espíritu Santo jøts øts ja nja' xkajpxiyit, pøn pudøjkíp kajpxjot'amøjkíp, pøn nayide'en tmøøt'ajtp ja tyiibyí yjanchpi. <sup>27</sup>Jøts mee nayide'en ja nja' xkajpxmiyit, pø tøxi meets ja x'ixy sa jaty y'ejxi tyiyi, sa jaty tø ngajpxwa'lkxto'ondaajkyim østi ixyambaat.

**16** 'Jade'en'ampy jade'en nnojmidí jøts kidi nugo winmayjimbetti winmay'adøjti. <sup>2</sup>Myikwojpidso'ømp myikajxpidsø'ømp meets jap tsaptøjkjøtpty, østi yja'at paat ja xøøw ku ja jaa'y wya'andit jøts ku Dios yja' ja tpaduujnidi ku meets ja myik'oogiyit. <sup>3</sup>Ja'agøjxp ja jade'en y'adø'øtstit ku ja nijuuni tkanijawidinim pøni pøn ja Dios Teety, jøts pøni pøn øts. <sup>4</sup>Jøts ja'agøjxp ya'at jade'en ndukmadowdi ku wyinaty jade'en yjatwa'añ, jøts xja'myatstit jøts ku yø tø ndukmadoonidi.

### Ti dø'øn ja Espíritu Santo tyumpy ya naxwiiñ

'Ka' meets yø jade'en patki'jyi ndukmadøøy, kumi ja'ajt øts kø'øm.

<sup>5</sup>Ixyamts ø nnojkwani tsinaabyi ma ja jap midi ø xkajxp; jøts øts ja nmøøtsinaamyit jøts nipøn tamts mee nidu'ugin tkayiktiy

pøni ma øts idø'øn nniykxy.

<sup>6</sup>Jotmay mee ne'egi jinaxy tø mjaaktyimdyatøkiyi, ja'agøjxp ku yø jade'en tø ndukmadowdi.

<sup>7</sup>Janch idø'øn nnojmidí jøts ku ne'egi jade'en m'øy'ajtxidit jøts ku nnojxxt. Ku ø nganøjxt, nijuunits ja kyamiñ midi mbudøkiyidip midi mgajpxjot'amøjkiyidip. Ku nnojxt, kø'ømts øts ja ngaxt. <sup>8</sup>Jøts ku dø'øn ja nøjcx myiñ, ja' ja tyu'ump jøts ja naxwii'ñit jaa'y ja ttukjawit ja pyøky jøts ku yjanchpojkipitumbijaa'yidi, jøts ku ja tu'ugyi ja winmaa'ñ sudso tyø'ødit sudso tyuda'aktit, jøts ku Dios ja pyayø'øyidit. <sup>9</sup>Ja'agøjxp pyojkipitumbijaa'y'atti ku ø ka' xjanchjawidi; <sup>10</sup>ñija'widipts nøjcx sa y'ejxi tyiyi midí'ibi øy midí'ibi paat'ajtidip, kumi jam ø nniykxy ma Dios Teety, jøts ka' mee x'uk'ejxnit, <sup>11</sup>jaanimts tja'gyukidit ja Dios pyayø'øyin jøts ku tyiy'ajtingøjxp yikutuky, pø tøxi wyinaty ja tiy'ajtin tyaky, jøts ja miku' yikastigimo'ot midí møj y'ity ya naxwiiñ.

<sup>12</sup>'Jap øts may ja madya'aky njajagyepy midí ndukmadoowandip, ka' inet xja'gyukidit ixyamyi.

<sup>13</sup>Kunim mye'ent ja Espíritu Santo, ja'ats ja tuki'iyi mduk'ixpøjkøxidip sudso tyiyi yjanchi; ka'axi kyø'øm ja' ja tyiktu'unt pøni sa jaty ja wya'añ, ja' ja kyajpxp pøni sa jaty pøni ti jaty ja myadøøpy, jøts ja mdukmadowidit ti jaty tunwajnipnim. <sup>14</sup>Jade'en'ampyts øts ja winja'win windsø'jkin nbaatt, kuts ja ngajpxy ja n'ayuujk xpadu'undit sa mduknijawiyidi ja Espíritu Santo. Øts ja ngajpxmyo'op.

<sup>15</sup>Nayide'ents ja Dios Teety kyajpxy ja y'ayuujk sam øts nja'ajin, paty øts jade'en nwa'añ jøts ku nayide'ents nmo'ot ja ngajpxy ja n'ayuujk, nayide'ents yø mduknijawiyidit.

**Xondaajkin ja nøjkk wyimbidsimy  
ku njotmay'o'jkindit**

<sup>16</sup>'Ka' y'ukjajknit ku mee ka' x'uk'ejxnit, ku wyinaty waani tø ñaxy ja tiempi jaanimts ø x'ejxtit jadigojk, pø jamxi ø nniikxy ma jam Dios Teety.

<sup>17</sup>Winets ja pyabøjkpitøjk winaagin nixem niyam ñawyajnidøø:

—¿Ti yø jade'en tyijpy ku yø xnimaal'yin jøts ku ka' y'ukjajknit, ku yø ka' n'uk'ejxna'ant, jøts ku waani ñaxt winetnimts ja n'ejxindit jadigojk ja'agøjxp ku ñiikxy jam ma ja Dios Teety? <sup>18</sup>¿Ti dø'øn yø jade'en tyijpy jøts ku “ka' y'ukjajknit”? Ni kyayikja'gyuki niwine'en pøni ti dø'øn yø jade'en tyijpy.

<sup>19</sup>Jøts ja nwindson'ajtim Jesús ojts ja t'ixy jøts ku ja pyabøjkpitøjk yjawi tyiibyøkwa'añiyi, jøts ja tnimaay:

—Tøxi nnøjmidi jøts ku ka' y'ukjajknit ku mee ka' x'uk'ejxnit, kuts wyinaty waani tø ñaxy ja tiempi jaanimts ø x'ejxtit jadigojk. ¿Kidi yø'øjip meets ixja mnayiktøøjiyidip? <sup>20</sup>Jøts tiy janch øts idø'øn nwa'añ ku mee nnøjmi, jøts ku nøjkk ja yajxin x'ejxti, ku nøjkk ja jotmay'o'jkin xpaatti yam ja naaxwii'ñit jaa'y xyonda'akti. Jøts ka'ats yjade'eni, øy mee mabaat mjantyimyjajotmay'øøky, xondaajkin ja nøjkk wyimbidsimy

ku jade'en mjotmay'ookti. <sup>21</sup>Jade'en idø'øn ñamyayi yjaty sam ja tø'øxyøjk ku ja kya'axwa'añ, janch winmay jotmay yjaty ku tø tpaaty ja tiempi ku ja y'u'nk pyøjkjø'økni; ku tø tminawya'kxniyi ja maxu'nk nika'ap ja t'ukja'myajtsni jøts ku y'u'nk ja tø pyiky, ja'agøjxp ku ja xyonda'aky ku ja tø tyikaxi'iky tu'uk maxu'nk ya naaxwii'ñ.

<sup>22</sup>Nayide'ents meets idø'øn mjaajtnimi, mjanchjotmay'ootkip ixyam; wimbetp øts jøts mee nminabyaadit jadigojk, winetnimts ja xondaajkin xpaattit yikxon, jøts nipøn ja mgapøjkxiyidit.

<sup>23</sup>Jøts ja'abi xøøw ka' ø ti x'ukyiktøønidit. Janch meets idø'øn nnøjmidi, jøts ku ja Dios Teety tuki'iyi mmo'ojidit pøni ti jaty ja m'amidoodip øts køjxp. <sup>24</sup>Østi ixyambaat ka'anim ti x'amidowdi øts køjxp; amidowdi pøktsowdi, mbaattip ja' jøts jade'en mxonjattit.

**Tøts ja Jesucristo tmimajada'aky  
midi ja naaxwii'ñit jaa'y  
yikwindigøøpy**

<sup>25</sup>Madya'akyøjxp ya'at yam nugo tø ndukmadowdi jøts xamimadoodowidit; ja'atp ja xøøw ku ka'ap jade'en nøjkk n'ukmigajpxnidi abiky madya'akyøjxp, wa'ats meets ja ndyimdyukmadoonit nøjkk pøni sa ja Dios Teety y'ejxi tyiyi. <sup>26</sup>Jøts ja'abi xøøwts øts køjxp ja Dios Teety x'amido'odit xpøkts'o'odit ja øy'ajtin; jøts nika'ap øts yam ndyimwya'añ jøts ku øts n'amido'ot ja Dios Teety jøts mee nni'amidowit. Ka'ap chøkyi jøts kø'øm n'amido'ot, <sup>27</sup>pø mdsojkip meets ja Dios Teety.

Jade'engøjxpts ja mdsøkyidi kumi xtsojpk meets nayide'en, jøts tøts xjanchjawidi jøts ku øts Dios Teety xkexy. <sup>28</sup>Jam ø tø ndsøøn ma Dios Teety jøts øts ya tø nmiñ ya naxwiiñ, ixyamts øts inet nmajstutu'utwangojmi ja naxwii'ñit, jøts ø n'awimbeti'wya'lañ jadigojk ja Dios Teety.

<sup>29</sup>Xjats ja pyabøjkpitøjk wyandøø: —Ixyamnim inet tiy janchwa'ats xnigajpxñim, ka' x'ukyiktuni ja abiky myadya'aky midì kayiktamimadodøø'wip. <sup>30</sup>Ixyamnimts øøts inet njanch'ixy njanchnijawi jøts ku tuki'iyi xnija'wigyixy, jøts ku ka' chøkyi jøts ku øy pøn kuwani mdyimdyiibyøkiyit. Ja'agøjxp øø njanchjawidi jøts ku jam mdsøøn ma Dios Teety.

<sup>31</sup>Jøts nwindson'ajtim Jesús yide'en t'adsøø: —¿Jøts xjanchja'wiñidip øts ixyam? <sup>32</sup>Ja wyingøñ jøts tø yja'aty ja xøow ja jumøjt, jøts tyimñay'ixyamyi, ku meets inet m'agakpaktit pø ma pønjabøn ñøjkxt, jøts øts inet nadyu'uk xnika'aktit. Ka'ap ø nadyu'ugi, jats ja Dios Teety xmøø'tity. <sup>33</sup>Ndukmodoogøjtíp ya'at yam tuki'iyi, jøts ja øy'ajtin jotkujk'ajtin xpaattit ku ø x'ajot'attit. M'ayo'ombaattip ya naxwiiñ; jotmøkts mnabyikta'agidit, tøts øts inet nmimajada'aky midì ya naxwiiñ yikwindigøøpy.

**Ku ja Jesús tni'amidowi  
tnibøktsowi ja pyabøjkpitøjk, jøts  
ja ttukmadøy ja Dios Teety**

**17** Xjats ku ja nwindson'ajtim  
Jesús jade'en

wyan'abajtiyii'ñ, jøts ja ojts jam tsajpwemp pyat'ixy, winets ja wyaañ:

—Dios Teety, tø ja hori kya'pxy. Yikmøjtøjkikts øts, kunuu'kxyja'wikts øts, jøts me nayide'en nyikmøjtøkit, jøts me nayide'en myikunuu'kxyjawit. <sup>2</sup>Metsxi tø xmøø'y ja kutujk jøts øts naxwii'ñit jaa'y ja ni'ijtyi nda'ana'amdit, jøts ja tpaattit ja jujky'ajtin xemikøjxp pøn jaty me tø xkømøø'y. <sup>3</sup>Jøts jade'en'ampy yikpaaty ja jujky'ajtin xemikøjxp ku tu'ugyi mets Dios Teety myikjanchjawidi, sam nayide'en ja Jesucristo, pøn mets ya tø xkexy naxwiiñ.

<sup>4</sup>Tø øts ja ndunguixy jade'en midì me tø xa'ane'emy, jade'engøjxpts myikmøjawidi myikunuu'kxyjawidi ya naxwiiñ. <sup>5</sup>Møøkyts øts jam mwingujky nay ja'abi møk'ajtin midì øts y'ijty nmøø'tajtpy møøt mets ku ka'anìm wyinaty naxwii'ñit y'øyinim.

<sup>6</sup>Jøts ja jaa'dyi midì me kø'øm tø xwiwich ya naxwiiñ midì me tø xagødøki, tøts øts ja nduknija'wigyøxti pøni pøn mets. Jøts mets ja y'ijty mjaa'y'ajtpy, jøts mets ja tø xagødøki. Tøts ja tpadundi mets ja m'øgyajpxy mets ja m'ø'yayujk. <sup>7</sup>Ñija'winidip ja ixyam wa'ats ti jaty me tø xmøø'y jøts ku mets ja xja'aji. <sup>8</sup>Tøts øts ja ndukmadowdi ja øgyajpxy ja ømyadya'aky midì me tø xukmadøy, jøts tøts ja tkupøkti, tøts ja tnijawidi jøts ku ja yjanchi jøts ku øts jam ndsøøn ma mets jam. Tø ja tjanchjawidi jøts ku me tø xkexy.

<sup>9</sup>Yøøts ø nni'amidoo'widip pøn jaty me tø xmøø'y ja'agøjxp

ku ja xja'aji; jøts nigidi ja'abi nni'amidoo'wip pøn øts tø xkabadundi. <sup>10</sup>Midi jaty ø nja'ajtpy, nayi mets mja' ja', jøts nay ja'ats ø nja'ajtmip; jøts nayi øts nmøk'ajtin nay øts ngunuu'kxin ja xyiktuujnidip.

<sup>11</sup>Øts, ka'ap øts n'lukya'a'ajtnit ya naxwiiñ; yø'øts ja tandip, jøts me nninøjkxnit møøtsinaabyi. Kunuu'kxy Dios Teety, agø'øduk axajtuk mmøk'ajtingøjxp pøn jaty ø tø xagødøki jøts ni'amuki ni'aga'pxi y'ettit, kyanamyajtstu'udidit nayide'en sam adømin. <sup>12</sup>Ku øts yø ya y'lity nmøøt'etti ya naxwiiñ, n'ejx'ejttip øts yø', ja møk'ajtin ø nyiktumpy midi me tø xmø'øy, ja'ats øts yø nda'agø'ødujktip nda'axajtuajktip. Ni tu'ugin yø tø kyawindigøydi, ja'ayim idø'on jade'en tø yjaty midiyim y'ijty windigøy'ejtnip, jøts jade'en ka'pxy tpaaty sa ja mgajpxy sa ja m'ayuujk xyiktaañ.

<sup>13</sup>Ixyamts me nninøjkxnit ma mets jam; jøts ku njaaknaya'a'aty ya naxwiiñ, ja'agøjxp øts jade'en nwa'añ jøts ja mja' yjotkujk'attit sam ø njotkujk'atyin. <sup>14</sup>Tø øts ja ndukmadoogøxti ja m'øgyajpxy ja m'øy'ayuujk, ja'ats mmi'ajkiyidip pøn ja ka'øwyinmaa'n tjagyajp. Ja' yiktami'ajkidip ku ja yjade'embí winmaa'n tka'ukyiktunidi, nayide'ents øts ka' nyiktuñ ja yja'adi. <sup>15</sup>Kaja'ajipts ø n'amidøopy jøts xwaabidsø'ømt ya naxwiiñ, ja' n'amidøopy jøts xkuwa'ant xkubokt, jøts miku' yja' kidi myajada'aky. <sup>16</sup>Nayide'en ja'adi sam øts, ka' nyiktuñ ja kya'øwyinmaa'n. <sup>17</sup>Pøkjø'økts

ejxjø'økts mdiy'ajtingøjxp mjanch'ajtingøjxp; pø tiy janchxi ja mgajpxy ja m'ayuujk. <sup>18</sup>Nayide'ents sam me tø xaniguexy ja naxwiiñit jaa'y, nayide'ents øts ja yam ndanipøkti ndani'ejxti pøn ya naxwiiñ ja ka'øwyinmaa'n tjagyajtpnim. <sup>19</sup>Amumjoojt øts njaaktyimñadyamiyoxiyit yø'øgøjxpti, nayide'ents ja ñadyamiyoxiyidit ku ja mgajpxy ja m'ayuujk ttu'undit midi tiy midi janch.

<sup>20</sup>Kidi ja'ayip ø nugo ndyimñi'amido'owidip, nayide'en ja'amidip pøn ø xjanchjawiwandipnim ku ja myigu'uk ja tmadoojidit ja øgyajpxy ja ømyadya'aky. <sup>21</sup>Jøts ja' øts yam n'amidøopy jøts tu'ugyi ja wyinmaa'n tyik'ettit; jøts tu'ugyi y'ettit møøt adøm, nayide'en Dios Teety sam mets xmøøt'ity jøts sam me nmøøt'ity. Jøts wan tu'ugyi ja wyinmaa'n tpikta'akti jøts jade'en ttukjanchjawidit ku me tø xkexy, pøn ja ka'øwyinmaa'n tjagyajtpip. <sup>22</sup>Tø øts ja nmo'odi nay ja'abi møk'ajtin midi me tø xmø'øy, jøts tu'ugyi wyinma'adyit nayide'en sam adøm nja'. Tu'ugyi nayide'en mets mja', jøts nayide'ents øts nja'amí. <sup>23</sup>Øts ja møøt nnamyayidit, jøts mets xmøøtnamya'a'yimiyit jøts ja tu'ugyi y'ettit, jøts jade'en ja naxwiiñit jaa'y t'ejxtit tnijawidit jøts ku me tø xkexy, jøts ku mets ja xjanchøky sam me xtsøkyin.

<sup>24</sup>Dios Teety, metsxi ja tø xagødøki, jøts ja'ats ø ndsøjky jøts ja yjap'attit ma øts jap ndsinaawya'añ, jøts t'ejxtit ja møk'ajtin ja øy'ajtin midi me

tø xmø'øy; jaayim me xtsøky ku ka'anim wyinaty naxwii'nit y'øyinim. <sup>25</sup>Mets Dios Teety tiy'ajtin janch'ajtin mmøot, jøts ka'ats ja naxwii'nit jaa'y mnijawiyi; jøts øts, nnija'wip mets; jøts yø pabøjkpitøjk, ñija'winidip yø' jøts ku me tø xjanchkexy. <sup>26</sup>Tø øts ja ndukmadowdi mbøn mets jøts njaaktukmadoowandipnim øts. Jade'ents sa mets xpa'ayøyin, nayide'ents ttaba'ayoomidit ja myigu'uktøjk. Nmøot'etpyim øts yø' y'agujkpti jade'en.

**Ku ja Jesús ojts yikmach**

**18** Xjats ku ja nwindson'ajtim Jesús jade'en wyinaty tø wya'añ, winets ja tmøøtsøø'n ja pyabøjkpitøjk, jøts ja ñøjkxwa'andi jam jaduktamajñ ku ja ttanaxtit ja nøø midi yiktejp Cedron. Jam tu'uk ja kam ma y'ity øy ti tsa'am, jamts ja nwindson'ajtim Jesús tmøøtkuyø'yiyi'n ja pyabøjkpitøjk. <sup>2</sup>Jøts ja Judas, pøn ja wyinaty ixam ka'ødyunwajnip, wa'ats ja t'ijxy'aty ja'abi et, pø jamxi ja nwindson'ajtim Jesús wyinaty kawinaak ojk tø ñamyukyidi møot ja pyabøjkpitøjk. <sup>3</sup>Jade'en'ampyts ja Judas jam ojts tmøøtja'aty tukpiky ja soldaditøjk møot ja jaa'dyi midi t'ejx'ejttip ja tsaptøjk, ja teetywindsøndøjk ja fariseotøjk ja kajxidip, tumda'o'jk møot ja jam yja'ttøø kunø'øky. <sup>4</sup>Ñija'wiñip ja nwindson'ajtim Jesús ja wyinaty sa jaty ja yjatwa'añ kyubatwa'añ, winets ja twinguwa'jkii'n, jøts ja tyiktiy:

—¿Pøn dø'on m'ixaadyip?

<sup>5</sup>Jøts ja ojts yide'en y'adsowdi:

—Ja Jesús øø n'ixaapy, ja Nazaretit jaa'y.

Jøts ja nwindson'ajtim Jesús ja t'adsøoy:

—Øtsimts ja'.

Jøts ja Judas midi ka'øy'adøtsp, ixam ja tmøødi ja mayjaa'y. <sup>6</sup>Jøts ku ja nwindson'ajtim Jesús wya'añ: “Øtsimts ja'”, winets ja jadi'iñi y'ixnøjkxtøø jøts ja kya'tsjimbejtøø. <sup>7</sup>Winets ja nwindson'ajtim Jesús ja jadigojk tyiibyøjkidøø, jøts ja ñimaajyidøø:

—¿Pøn dø'on m'ixaadyip?

Jøts ja wyandøø:

—Ja Jesús, ja Nazaretit jaa'y.

<sup>8</sup>Jøts ja nwindson'ajtim Jesús ja tnimaay:

—Tøxi nnigajpxy jøts ku ja y'øtsi. Pøni øts tam x'ixaadyip, majtstu'uttits øts yø nbaøjkpitøjk.

<sup>9</sup>Jade'en'ampy ja jade'en yjaty, jøts ja jade'en ka'pxy tyimyjaty ku ja nwindson'ajtim Jesús wyinaty yide'en kø'øm tø wya'añ: “Pøn jaty øts ja Dios Teety tø xagøðøki, ni tu'ugin ja tø kyawindigøydi.” <sup>10</sup>Jøts ja Simón Pedro jam wyinaty tø tnixaji tu'uk ja tsujx, ja'ats ja ojts tjuuty, jøts ja ttaxikpo'otuujty ja jaa'y midi txøow'ajtp Malco, ojts y'aga'ndyatsk ja tyimgyajtspo'jtiiyi, ja teetywindsøndøjk idø'on ja tyumbi jade'en jajtp.

<sup>11</sup>Yide'en ja nwindson'ajtim Jesús tnimaay ja Pedro:

—Pikta'ak yø mdsujx nay jap ma tø xjuuty. ¿Sa me mwinmay, uk ja øts idø'on xijy ngagupøkt ja ayø'on midi øts ja Dios Teety tø xanibiktaagi?

**Ku Jesús yiknajtswaa'wiyi'n jam ma teetywindsøn**

<sup>12</sup>Xjats ja soldaditøjk, møot ja' pøn tnigubajk'ajtp jøts møot ja tsaptajk,



ojts tmatsti ja nwindson'ajtim Jesús, jøts ja ojts tkowøondi tkøxojtsti.

<sup>13</sup>Jøts ja tyiknøjkxtøø mā ja Anás jam tyøjk midi ja Caifás tyeety myø'jtíp, midi jam wyinaty ja'abi jumøjt teetywindsøn'ajtp. <sup>14</sup>Nayi Caifás idø'on wyinaty yide'en tø tnøjmi ja israelit jaa'y, jøts ku ne'egi jade'en tyimy'øy'att jøts tu'ugyi ja jaa'y tku'oogit ja kajp.

**Ku ja Pedro tku'iiñ jøts ku ja ka' t'ijxy'aty ja Jesús**

<sup>15</sup>Jøts ja Simón Pedro møøt jadu'uk ja myibabøjkpi tpanøjkxti ja nwindson'ajtim Jesús. Jøts yik'ijxy'ajtp ja' ja yjadu'ukpi, ijxy'ajtip ja teetywindsøn ja', ja'ats jap tyimyøøtøjkimyya ja nwindson'ajtim Jesús jap windsøn tyøjk'agui'py; <sup>16</sup>jøts ja Pedro jap tyaañ mā yiknidøki ja tøj. Ja'ats ja yjadu'ukpi jap ñibidsøøm midi ijxy'ajtp ja teetywindsøn, jøts ja ojts tminagyajpxyi ja tø'øxyøjk midi jap tøj'adinaapy, jøts ja tyiktøjkiyi'ñ ja Pedro. <sup>17</sup>Winets ja tø'øxyøjk midi tøj'adinaapy, y'amidoojøø ja Pedro: —¿Kidi metsip yø jaa'y mbabøjkpi'ajtpy?

Jøts ja Pedro t'adsøø yide'en:

—Ka', ka'axi ja y'øtsi.

<sup>18</sup>Jøts kumi xujxpts wyinaty, jøts ja tumbitøjk jøts ja tsaptøjktajk jap ja wyinaty tø tyikmøjidi ja jøøn, ja'ats ja jap wyindanaadyip jøts ja jap xyamdi. Jøts ja Pedro ixam idø'on ja tmøøtxami.

**Ku ja teetywindsøn tyiktøøbinaxwa'aky ja Jesús**

<sup>19</sup>Xjats ja teetywindsøn tyiktøøbinaxwaajky ja

nwindson'ajtim Jesús pøn jaty idø'on pyabøjkpitøjk'ajtpy, jøts ti dø'on ja ñanky'ixpøjkíp. <sup>20</sup>Jøts ja nwindson'ajtim Jesús ja t'adsøøy:

—Tø ø ngajpxy mayjaa'y'agujky øy madsoo; ejtp ø nyik'ixpiky mā jaty tsaptøjk, jøts nayide'en mā ja møj tsaptøjkmi mā israelit jaa'y ñamyukyidi, jøts ka'ap øts øy ti n'amaa'tsk'aty ku ø ti nnigajpxy. <sup>21</sup>¿Tigøjxp ku øts ja xyiktty? Ja' mets ja myiktø'øp pøn jaty ø tø xmadooji, jøts wan ja tnigajpxti pøni sa jaty øts idø'on ja tø nnøjmidi. Ja' ja tñija'widip pøni sa jaty øts ja tø nnøjmidi.

<sup>22</sup>Xjats ku ja nwindson'ajtim Jesús jade'en wyaañ, jøts nidu'ugin ja tsaptajk ja ojts wyingugoxiyi, jøts ja ñii'mxyiyi:

—¿Jade'en yø m'aaw xa'adsøø jøts jade'en xnøjmit yø teetywindsøn?

<sup>23</sup>Jøts ja nwindson'ajtim Jesús ja yide'en t'adsøøy:

—Pøni tødam ø ngajpxigøø, nigajpxts midi'ibi dø'on mga'ømyadøøpy; jøts pøni øydam jade'en sa ø tø nwa'añ, ¿tits ku øts xkøxy?

<sup>24</sup>Winets ja Anás ja ojts kyexyi wiñ ke'kxy, jøts ja jam ñjøkxt mā ja Caifás, midi teetywindsøn'ajtp.

**Ku Pedro jadigojk wya'añ ku ja ka'ap t'ejxi ja Jesús**

<sup>25</sup>Íxajp idø'on ja Pedro tyani, yjoo'kxpiky jap jøn'ajpy, ku ja yiknimaaay:

—¿Kidi metsip yø jaa'y mbabøjkpi'ajtpy?

Jøts ja Pedro ja ka' tkupiky, yide'en ja wyangojmi:

—Ka', ka'axi ja y'øtsi.

<sup>26</sup>Winets ja yiktøoji tu'uk ja teetywindsøn tyumbi midi ja jaa'y myigu'uk'ajtpy, midi ja Pedro wyinaty tø txiktsajtstu'uty jøts ja tyatsk tyimiyikwinajkiyøø, ja'ats waan:

—¿Kidi metsip jap tø n'ixy jøts ku mets ja jap y'lity xmøødi jap tsa'amgamjøtpy?

<sup>27</sup>Jøts ja Pedro ja jadigojk ka' tkupøjkojmi, winets nay jatyi y'ayaajxy tu'uk tsapni'aaw.

### Ku Jesús twinguwa'jkiyii'n ja Pilato

<sup>28</sup>Jøts ja nwindson'ajtim Jesús ojts yikwaadsøøn jam Caifás tyøjkjotp, jøts ja yikwaanijkxy ma ja møj windsøn kyutujktaajk jam. Xiijñiwyani, jøts ja israelit jaa'y nika'ap tyøjkidøø jap kutujktaajkjøtpy, jøts ja ka'ap tyiktigøøwya'andi ja kyostumbri, pøky idø'on ja' ku ja jade'en y'adø'østtit, ka'ap ja t'ukaañidit ja paski xøgaaky ja paski xø'uuky ku ja a'ux ja tyiknaxtit. <sup>29</sup>Ja'agøjxp ja møj windsøn Pilato jam ojts pyidsimy jøts ja myigajpxwa'añidi, yide'en ja ojts ñii'mxyidi:

—¿Ti yø jaa'y mdani'øø'nidip?

<sup>30</sup>Jøts ja y'adsoodøø:

—Ku yø jeexyip kyapøkyjaa'yi ka' mets yø jeexyip ya tø myiktagødøki.

<sup>31</sup>Winets ja Pilato ja ñimaajyidøø:

—Møødidi, jøts xiidyu'undit jade'en pøni sà ja mgutujk wya'andi.

Jøts ja israelit jaa'y y'adsoodøø:

—Øøts, ka'ap øøts xpaat'aty jøts øøts øy pøn nyik'ookt.

<sup>32</sup>Jade'en ja ojts ka'pxy yjaty sà ja nwindson'ajtim Jesús ja wyinaty tø tñigajpxy jøts ku ja jade'en y'ookt. <sup>33</sup>Xjats ja Pilato jap jadigojk

tyøjkiyii'n jap kyutujktaajkjøtpy, jøts ja ojts tyajxi ja nwindson'ajtim Jesús, jøts ja t'amidøøy:

—¿Mets idø'on israelit jaa'y mjanchwindsøn'ajtip?

<sup>34</sup>Jøts nwindson'ajtim Jesús ja tñimaay:

—¿Kø'øm mets jade'en mwinmay jøts mets jade'en xyiktiy, uk pøn jade'en tø mdamimadya'agyi jøts ku ø nja'aji?

<sup>35</sup>Jøts ja Pilato ja y'adsooøø:

—¿Ti israelit jaa'yimts øts?

Kø'ømxi yø mmigugajp jøts yø teetywindsøndøjk ya myikmiñiyi jøts mets ya nyiktagødøki. ¿Ti dø'on tø xuñ?

<sup>36</sup>Jøts nwindson'ajtim Jesús ja yide'en t'adsøøy:

—Windsøn'ajtp øts, ka' øts nja' yjade'eni sam pøn yja' ya naxwiin. Ku jeexyip jade'en, tø øts nbabøjkpitøjk jeexyip xnitseptunidi, jøts øts jeexyip ngayiktagødøki ja israelit jaa'y. Kayaa'ip øts ngutujk.

<sup>37</sup>Winets ja Pilato ja ojts ñii'mxyiyi:

—¿Jøts mjanchwindsøn mets idø'on?

Jøts nwindson'ajtim Jesús ja t'adsøøy:

—Ja' øts sà ixa mwa'añ, windsøn øts. Tø ø ngaxi'iky ku øts ya naxwiin tø nmiñ jøts ø nnigajpxt ti tiy'ajtin'ajtp, ti janch'ajtin'ajtp. Pøn jatyi ja xmimadoodip, xmadojidipts øts nja' ja' sà jatyi ø nwa'añ.

<sup>38</sup>Jøts ja Pilato ja ojts ñii'mxyi:

—¿Jøts ti dø'on tiy'ajtin'ajtp janch'ajtin'ajtp?

### Ku Jesús ñidujkiyii'n jøts ja y'ookt

Jøts ku ja Pilato jade'en t'ukyiktiy, jøts ja ojts pyidsimy jøts

ja tminagyajpxwa'añi ja israelit  
jaa'dyi, jøts ja tnimaay:

—Ka' øts yø jaa'y nbøky'ixy.

<sup>39</sup>Jade'ents mee xkostumbri'aty jøts øts nidu'ugin nyik'awa'atspidsø'omt ja pøkyjaa'y, ku meets ja x'amidøy ku paski xøøw: ¿jøts mdsojktip jøts wan øts yø mwindsøn tnajtsmatsi jadi'iñi?

<sup>40</sup>Winets ja niduki'iyi møk wyandøø:

—iKa' yø' xyik'awa'atspidsø'omt!  
iYø Barrabás  
myik'awa'atspidsø'omp!

Jøts møj maa'tspi dø'on ja Barrabás.

**19** Xjats ja Pilato ojts tnankmyachi ja nwindsøn'ajtim Jesús, jøts ja ojts tnankwyøpyi. <sup>2</sup>Jøts ja soldadi ja ojts ttagujandi tu'uk ja windsøn kujan, jøts tum kujp awiity, jøts tsuu'nk wet ja ojts ttaxoxti. <sup>3</sup>Jøts ja ojts wingon twingunøjkxidi, jøts ja ojts tnøjmidi:

—iMøj mets, pøn ja israelit jaa'y wyindsøn ukmayip!

Jøts ja ojts twingoxti tjøpkoxti wyemp y'am.

<sup>4</sup>Winets ja Pilato ojts jadigojk pyidsimy, jøts ja ojts ñii'mxyidi:

—Ejxti nijawidi, nyikpidsimpy øts yø ya jøts xnijawidit jøts ku øts yø niti ngadapøky'ixy.

<sup>5</sup>Jøts ja nwindsøn'ajtim Jesús pyidsiimy, ixam tkujan'aty ja kujp awiity jøts ja tsuu'nk wet ja twet'aty. Jøts ja Pilato ja ojts ñimaagyojmiyidi:

—iXya dø'on ja jaa'y!

<sup>6</sup>Xjats ku ja teetywindsøndøjk ja t'ejxtøø jøts ja tsaptajk, winets ja tjanchtayajxidøø møk'ampy:

—iYikruspat! iYikruspat!

Jøts ja Pilato ja tnimaay:

—Wawdi jøts mee xyikruspat, kumi ka'ap øts yø ti pøky ndapøky'ixy.

<sup>7</sup>Yide'en ja israelit jaa'y ja y'adsoojiyøø:

—Jap øøts tu'uk ja kutujk nmøødi, jøts jade'en ja tyikutuky jøts wan t'øøky, ja'agøjxp ku yø tø ñabyikta'agyi Dios U'ngin.

<sup>8</sup>Xjats ku ja Pilato ja ojts jade'en tmadøy, jøts ja jade'en yjaaktyimyik'adsø'jkii'ñ. <sup>9</sup>Jøts ja jap kyutujktaajkjøtpy tyøjkii'ñ jadigojk, jøts ja ttiibyijky ja nwindsøn'ajtim Jesús:

—¿Mets, ma mdsøøñ?

Jøts ja nwindsøn'ajtim Jesús niwine'enin ja tkidyimy'adsøøy.

<sup>10</sup>Winets ja Pilato ja ojts ñii'mxyiyi:  
—¿Jøts ø ka'ap x'adsøy? ¿Ti ka' xnijawi jøts ku øts kutujk njagyepy, jøts me nyikruspatt uk jøts me nyik'awa'atspidsø'omt?

<sup>11</sup>Jøts nwindsøn'ajtim Jesús ja t'adsøøy:

—Ti kutujk mets jeexyip mdsaaachjagyepy ku Dios Teety ja jeexyip jade'en tkayikjaty; paty ja' møj pøky tyimdyaja'adyi pøn øts ya tø xkøyaky jøts me tø nyiktagødøki, waani mets mja' mdaja'adyi.

<sup>12</sup>Winets ja Pilato nay jatyi tja'ixaay ja taay, jøts ja t'ixmatst jadi'iñi ja nwindsøn'ajtim Jesús; xjats ja israelit jaa'y ja møkta'aky ñimaajiyi:

—iPøni myik'awa'atspidsimpy inet, ka' xmigu'ugi wyinaty ja møj windsøn César jam Roma! iPøn jade'en namyøjpiktaajkip, myidsep'atpyts ja César!

<sup>13</sup>Xjats ku ja Pilato jade'en tmadøø, winets ja ojts tnankyikpidsimyi ja nwindson'ajtim Jesús jøts ja y'ixaajky jam kyutujktaajkjøp'am midy yiktejp Gabata ku hebreit ayuujk, jade'en ja tijy ma tsaba'kxy. <sup>14</sup>Jaa dø'on ja xøow wyinaty kujky ku wyinaty tyimbyatni ja paski. Winets ja Pilato tnimaay ja yjaa'y midy jamdi: —iXyaadi ja mwindsøn!

<sup>15</sup>Yide'en ja møk wyandøø: —iWan tpa'øøky! iWan tpa'øøky! iYikruspat!

Jøts ja Pilato ja tnimaay: —¿Øts ndejin ja mwindsøn nyikruspatp?

Ja teetywindsøndøjk ja yide'en y'adsoojiyøø:

—Ka'ap øts pøn jadu'uk nwindson midy øø nwindson'ajtpy, ja'ayi tu'ugyi ja møj windsøn César.

<sup>16</sup>Ku ja Pilato jade'eni yiknimaay, jøts ja ojts tkøyaky ja nwindson'ajtim Jesús jøts ja tyikruspattit, winets ja tyiktso'ondøø.

### Ku ja Jesús kyiruspejty

<sup>17</sup>Xjats ja nwindson'ajtim Jesús tyiktso'ondøø, jøts ja ttukapti ja kyirus, jøts ja jam nijkxy ma ja et yiktijy Oo'kpi Kyubajk Pajk, midy yiktejp hebreit ayuujk Gólgota.

<sup>18</sup>Jamts ja ojts tyikruspattit møøt namajtsk pøkyjaa'y, tu'uk jaty ja yikpiktaktøø adsow aduuk, jøts ja nwindson'ajtim Jesús agujk'ajpy. <sup>19</sup>Jøts ja Pilato jam ojts tnankpyikta'agy ja letri kruskøjxp midy nømp: “Jesús, Nazaretit jaa'y, israelit jaa'y wyindsøn.” <sup>20</sup>Jøts may jaa'y ojts

t'ejxti ja letri, pø kajpwingonxi ja jam ma ja nwindson'ajtim Jesús ojts kyiruspejty, jøts ja letri jade'en ja kyøxja'ayi hebreit ayuujk, jøts griegit ayuujk, jøts latin. <sup>21</sup>Paty ja israelit teetywindsøndøjk tnimaydi ja Pilato:

—Kidi jade'en xja'ay “Israelit jaa'y wyindsøn”; ne'egi jade'en xpikta'akt “Kø'øm ñadyijiyi jøts ku israelit jaa'y twindsøni.”

<sup>22</sup>Yide'en ja Pilato ja ojts y'adsøyidi:

—iMidi tø nja'ay, jade'en yø tya'ant!

<sup>23</sup>Xjats ku ja soldaditøjk wyinaty tø tyikruspattit ja nwindson'ajtim Jesús, winets ja ojts twejtsjøjkidi ja wyet, jøts ja ojts ñadyanipaadyidi jøts ja ñawya'kxit maktaxkpiky, kitu'uk ja soldadi ja tpøktit. Jøts nayide'en tnixajidyøø ja nijan, jøts kumi ka'ats ja y'axuumyuky, ja'ayi ja amuum tyimdyukojkubety, <sup>24</sup>xjats ja soldadi nixem niyam ñawyajnidøø:

—Ka' yø ndakø'øtsa'ant; ne'egi yø nniguyajtint, jøts n'ejxint pøn jadyimy'uktaja'adip yø wet.

Jøts jade'en ojts ka'pxy yjaty sam jap jaabyety nøkyijxpy: “Tø øts nwet ja xwejtswa'kxidi, tø ja tniguyatti.” Jade'ents idø'on ja soldaditøjk y'adøstøø.

<sup>25</sup>Jøts ma ja nwindson'ajtim kyirus jam, ixam ja tyaak ja', jøts nayi ixamts ja'ami midy ja tyaak y'uchip, jøts ja Cleofas ñidø'øxy midy María'ajtp, jøts nay jam ja María Magdalenimi. <sup>26</sup>Xjats ku ja nwindson'ajtim Jesús ojts t'ixy ja tyaak, jøts ku ja pyabøjkpi nay jam tyanaamyi midy ja

jantyimiyinamyaaajyip, winets ja  
tnimaay ja tyaak:

—Taak, ixa ja m'u'nk.

<sup>27</sup>Jøts ja pyabøjkpi ja tnimaamyi:

—Ixa ja mdaak.

Jøts nay jatyi ja'abi pabøjkpi  
ttaakpijky midi ja nwindson'ajtim  
Jesús tyaagip, jøts ja jade'en  
yikjagyepy sam kyø'omdaagin.

#### Ku ja Jesús y'ø'jky

<sup>28</sup>Xjats ku ja jade'en wyinaty  
tø y'ukjaty, jøts kumi ñija'wipts  
ja nwindson'ajtim Jesús ja wa'ats  
jøts ku wyinaty jade'en tuki'iyi  
tø kya'pxy, jøts idø'on ja jade'en  
tyimyjatt sam jap jaabyety  
nøkyijxpy, winets ja wyaan:

—Jantyimdyøjtšip øts.

<sup>29</sup>Jamts wyinaty tukmøjnajts'øø  
ja vino midi jeky tø pyu'uch; ja'ats  
ojts yiktabadsiiich ja tanimuu'kpi,  
jøts ja yikpiktaajky jam hisopo kipy  
awaj jøp'am, jøts ja yikta'ayøjkxyi  
ja nwindson'ajtim Jesús. <sup>30</sup>Xjats ja  
twixil'jch ja tanimuu'kpi jøts ja vino  
ka'øybi jade'en t'uuky, winets ja  
wyaan:

—Tø tuki'iyi yikpaduñ ka'pxy.

Jøts ja kyubajk ja jadi'iñi  
kyuwojtsnajxy, jøts ja jade'en  
y'ø'jky.

#### Ku ja Jesús yikuummy kyachpuki'jy

<sup>31</sup>Jøts tyimbyaatwanipts ku  
ja paski xøøw kyujajy, jøts ja' ja  
israelit jaa'y kyatsojktip jøts ja  
oo'kpi jam y'awejxtit kruskøjxp  
ku poo'kxin xøøw, jøts yats idø'on  
ja'abi xøøw jaaktyimyojxøowni.  
Ja'agøjxpts ja tnimaydi ja Pilato,  
jøts wan ja tñankpyakwojptøjkixyi  
pøn jaty jam wyinaty tø kyiruspatti,

jøts wan ja tñankyikwinajkixyi  
jam ja oo'kpi ñine'kx. <sup>32</sup>Winets  
ja soldadi ñøjkxtø, jøts ja ojts  
tjanchpakwojptøjkøxti midi ja  
nwindson'ajtim Jesús jam wyinaty  
møøt tø kyiruspety. Ojts ja  
yjawyeembi tyimykpakwojptøjkøjy,  
jøts ja yjadu'ukpi nayide'en midi  
jam jaduktamajñ. <sup>33</sup>Xjats ku ja  
twingunøjkxidøø ja nwindson'ajtim  
Jesús, jøts ja t'ejxpattøø jøts  
kudam ja tø y'oo'kni, patyts ja ka'  
nayide'en t'uktunidøø.

<sup>34</sup>¿Ja ti winets ja ñajxy? Ojts ja  
soldadi ja nidu'ugin tyakumyi ja  
takuu'm jøts ja tyimy'awajch ja  
kyachpuki'jy, jøts nay jatyi ja ni'jpy  
pyidsiimy møøt nøø. <sup>35</sup>Ja'ats midi  
ixyam njaadyampy, tø øts idø'on  
jade'en n'ixy nnijawi midi'ibi tiy  
janch, jøts mee nayide'en xiyyawit  
xjanchjawit. <sup>36</sup>Jade'enxi dø'on ja  
yjajty jøts jade'en ka'pxy tyimyjaty  
sam jap jaabyety nøkyijxpy: “Ni  
tu'ugin pyajk ja kyatøjt kyamoott.”  
<sup>37</sup>Jøts jap abiky wyami: “Y'ejxtip ja  
kø'øm ku tyiktsaachidit.”

#### Ku ja Jesús ñine'kx yikpiktaajky jap møj tsaajutjøtpy

<sup>38</sup>Xjats ku dø'on ja jade'en  
wyinaty tø yjaty, jøts ja José midi  
kugajp'ajtp jam Arimatea, pyabijky  
ja' nwindson'ajtim Jesús øy idø'on  
ja ka'ap øy pøn tjadyimdyuknijawi,  
ja'agøjxp ku ja ttsø'øgi ja myi'israelit  
jaa'y. Ja'ats idø'on t'amidoow ja  
Pilato ja may'ajt, jøts ja myo'ojyit ja  
nwindson'ajtim Jesús ñine'kx. Xjats ja  
Pilato yikjajt ja jade'en, winets ja José  
ojts ñijkxy jøts ja ojts tyikts'oniyi.  
<sup>39</sup>Jøts ja Nicodemomi midi wyinaty  
jekyip tø tmøøtmadya'aky ja

nwindsøn'ajtim Jesús koots, ja'ats jam tmija'jt ee'px majk kilin jaabya'ak midi pa'akxuu'kp, majtsk jøøjp ja', ja mirra tø t'abøjkmuky møøt ja áloes. <sup>40</sup> Jøts idø'on ja José jade'en møøt ja Nicodemo nixajiyidøø ja nwindsøn'ajtim Jesús ñine'kx, jøts ja tta'abejtøø ja wet midi ja wyinaty tø tpiktaajkidi ja'abi pa'akxuu'kpi midi jade'en abøjkmuky. Jade'en ja ttundøø sam idø'on ja israelit jaaly kyostumbridi ku ja y'oo'kpi ja tyiknaxøkidi. <sup>41</sup> Jøts ma ja nwindsøn'ajtim Jesús wyinaty tø kyiruspety, jam wingon tu'uk ja kam ma y'ity øy ti tsa'am. Jamts tu'uk oo'kpi jut ja'abi kamjotp midi tyimyjemy'øyipnim, ka'anim jap pøn tyimykikta'aky. <sup>42</sup> Japts ja tpiktaktøø ja nwindsøn'ajtim Jesús ñine'kx, pø wingonxi ja jam tyañ ja oo'kpi jut, jøts tyimdyøts jøts ja israelit jaaly pyoo'kxin xøøw tyimcho'ondaknit.

**Ku ja Jesús yjujkpyijky jadigojk jap møj tsaaj jutjøtpy**

**20** Xjats ku midukxøøw cho'onda'akñim ja yjadu'ukpi samaan, winets ja María Magdalena ojts jøpyi ñijkxy jam ma ja oo'kpi jut jam wyinaty, ka'anim yikxon yjajta'aky; jøts ja ojts t'ixy jøts ku ja oo'kpi jut jam tka'uk'agø'ajtni ja tsaaj midi ja wyinaty tø yikta'agi'y. <sup>2</sup> Winets ja ojts putyi ñijkxy ma ja Simón Pedro jam wyinaty møøt øts midi yø nøky tjaapy, midi ja nwindsøn'ajtim Jesús jantyimyinamyaajyip, jøts øøts xnimaay:

—Tøts ja nwindsøn'ajtim jap yjikidøjtpidsømni jap jutjøtpy, jøts

ka'ap øø nnijawi pø ma net tø yikpikta'aky.

<sup>3</sup> Xjats øts møøt ja Pedro nnijkxy ma ja oo'kpi jut jam. <sup>4</sup> Jøts øøts namajtsk janch putyi nnijkxy; jøts øts jawaani møk njantyimbyujt jøts ja Pedro nnikejky, jawyeen øts jam nja'ljty ma ja oo'kpi jut. <sup>5</sup> Jøts øts jap ngu'ejxyii'ñ, ja wetyi jap n'ejxpaajt midi ja nwindsøn'ajtim wyinaty tø yikta'abity jøts ku ja jap wyøjni, jøts nika'ap ndøjkiyii'ñ. <sup>6</sup> Jøtsnim ja Simón Pedro ix'oojknim yja'ljty, jøts ja tyøjkiyii'ñ jap oo'kpi jutjøtpy. Jøts ja nayide'en jap ojts t'ixy jøts ku ja abet jap wyøjni; <sup>7</sup> jøts ja tjaaktyimy'ejxpaapty ja wet midi ja nwindsøn'ajtim Jesús wyinaty tø yiktagupity, jøts nigidi ja jam møøt ja wet midi ja amuum yikta'abejt, axaach ja jam abiky tø yikpikta'aky. <sup>8</sup> Winets øts ndøjkyimyaaj ma dø'on ja oo'kpi jut jam, jøts n'ijxy jøts kudam ja wyinaty jade'en tø jyaty, xjats ja njanchja'wiyii'ñ. <sup>9</sup> Jøts ka'anims idø'on øøts wyinaty nja'gyuki midi jap nøkyixpy jaabyety wya'añ, jøts ku ja nwindsøn'ajtim Jesús yjujkpyøkt jadigojk jap oo'kpi y'agujkp. <sup>10</sup> Jøts øøts jade'en namajtsk nwimbejtnaaj jøts nnøjkxnaaj jam ndøjkwindump.

**Ku ja Jesús ñanky'ejxøø jadigojk ma ja María Magdalena jam wyinaty**

<sup>11</sup> Jøts ja María jamyi jut'agø'øm tyañ, ñiyaxni ja jam kyu'ejxyii'ñ ma ja jut, <sup>12</sup> winets ja ojts t'ixy namajtsk ja ankilis, tum amuum poop ja xyøxyidi, jøts ja jam chøøniidi ma ja nwindsøn'ajtim Jesús wyinaty tø y'ukyikpikta'aky ja ñine'kx; tu'uk jam chøøni

agubajkp, jøts jadu'uk teky'ok'am.

<sup>13</sup> Jøts ja ankilis ja ñimaajyøø, ja tø'øxyøjk yiknimaapy:

—¿Ti mjajtip, tiku mya'axy?

Jøts ja tnimaay:

—Ja'agøjxp ø nya'axy ku øts ja nwindson'ajtim ya tø yikwejtspidsømni, jøts øts ja ka' nnijawi pø ma ja tø yikpikta'aky.

<sup>14</sup> Ja'ayi ja jade'en wyaañ, jøts ku ja y'ejxjimbijty winets ja t'ejxpaajty jøts kudam ja nwindson'ajtim Jesús jam tyani; jøts ka'ap ja tyimwya'añ jøts ku ja yja'aji. <sup>15</sup> Winets ja ojts kø'øm ñii'mxyi, jøts ja tø'øxyøjk yiktiibyiky:

—¿Tiku mya'axy? ¿Pøn m'ixaapy?

Jøts ja tø'øxyøjk jade'en ja wyinmay, ja tsa'am kam ejx'ejtpik idø'on ja tijy, jøts ja tnimaay:

—Teety, pøni mets ja tø xyikpidsimy, tukmadookts øts ma tø xpikta'aky jøts øts ja n'atsyiktsoont.

<sup>16</sup> Winets ja ñimaajyøø ja nwindson'ajtim Jesús:

—iMaría!

Xjats ja y'ejxjimbijty jøts ja tnimaay hebreit ayuujk:

—iRaboni! —midi tyijpy yik'ixpøjkpi.

<sup>17</sup> Jøts ja nwindson'ajtim Jesús ja ñimaajyøø:

—Kidi ø xøñ, majtstutk øts, pø ka'anímxi ø nnijkxy jam ma ja nDeety jam. Nøjkxts x'atstukmadø pøn jaty øts nja' xpabøjkidip, jøts ku øts jap nnijkxy ma øts ja nDeety jap, midi mee mDios Teety'ajtpy.

<sup>18</sup> Winets ja María Magdalena ojts ñijkxy, jøts ja ojts t'atstukmadoji ja nwindson'ajtim Jesús pyabøjkpitøjk jøts ku ja wyinaty tø t'ixy ja

nwindson'ajtim, jøts ku ja wyinaty jade'en tø ñii'mxyiyi.

**Ku ja Jesús ñanky'ejxøø jadigojk ma ja pyabøjkpitøjk jam wyinaty**

<sup>19</sup> Jøts nay ja'abi xøøw ku midukxøøw cho'ondā'akñim ja yjadu'ukpi samaan, nay ja'abi ux ku ja pabøjkpitøjk jam wyinaty tø ñamyukyidi jøts ja wyinaty tø ñañ'agiibyetyidi, ja israelit jaa'y ja chø'jkidip. Winets ja nwindson'ajtim Jesús tyøjkiyi'ñ jøts ja jam y'agujk'am wya'k'øyyii'ñ, jøts ja ojts yide'en kyajpxpøø'kxyidi:

—Øy'atti jotkujk'atti.

<sup>20</sup> Xjats ku ja jade'en y'ukwaañ, jøts ja ojts tyuk'ijxyidi ja kyø' jøts nayide'en ja kyachpuki'jyit tsaachi. Jøts ja pabøjkpitøjk yjantymxyondaktøø ku ja t'ejxtøø ja nwindson'ajtim. <sup>21</sup> Jøts ja nwindson'ajtim Jesús ja jadigojk ñimaajyidøø:

—Øy'atti jotkujk'atti. Nayide'en sam øts ja Dios Teety tø xkexyin, jøts nayide'en meets yam nguexy.

<sup>22</sup> Xjats ja tnibixujyiyi'ñ ja pyabøjkpitøjk jøts ja tnimaay:

—Wan ja Dios y'Espíritu Santo mdatøkiyidi. <sup>23</sup> Jøts pøni mgajpxwa'kxtpip jøts ku ja yikpojkpimee'kxy pøn nabyøkyja'wiyidip, jøts øts nja' ja xpabøjkiyidit; uk pøni ka'ats, mdukmodo'opts meets ja nayide'en jøts ku ja pyøky ja ka'ap mibaat yikmee'kxy, pøni ka'ap ja ñabyøkyjawiyidi niwine'en.

**Ku Tomás ojts t'ixy ja Jesús ku tø yujkpyiky**

<sup>24</sup> Jøts tu'uk ja nwindson'ajtim pyabøjkpi midi Tomás'ajtp, midi

yiktejp xeeñu'nk, ja' wyinaty ka'ejtp ma ja jamdi ku ja nwindson'ajtim Jesús wyinaty tō ñanky'ijxyi.

<sup>25</sup>Xjats ja oojknim ttukmadowdi ja nwindson'ajtim Jesús pyabøjkpitøjk, jøts ja tnimaadyi:

—Tō øøts ja nwindson'ajtim n'ixy.

Ja Tomás yide'en ja ojts ñii'mxyidi:

—Ka' øts ja njanchjawit pøni ka' øts kyø' ja n'ejxi jøts ku ja klabis ja tō yiktsaachiyi; ku øts ngøtsa'jx jap kø'øm ka' ndyimgyudejit ma ja klabis ja tō yiktsaachiyi, pøni ka' øts jap nguxaji ma ja kyachpuki'jy tō chaachi, ka'ats øts ja njanchjawit.

<sup>26</sup>Xjats ku kyiduktujkxøw'ajty, winets ja pabøjkpitøjk ñamyujkidøø jadigojk jam tøjktotp, jøts ja Tomás ixjam ja wyinaty tmøødidi. Winets jadyimja'aduky ja tøjkwynaty yikxon ku ja nwindson'ajtim Jesús tyøjkiyi'ñ, jøts ja jam agujk'am tyanay'øiyii'ñ. Jamts ja ojts kyajpxpøø'kxyidi, yide'en ja ñii'mxyidi:

—Øy'atti jotkujk'atti.

<sup>27</sup>Jøts ja Tomás nay jatyi yiknimaay:

—Kudeji yø mgøtsa'jx yap, jøts øts yø ngø' x'ejxit; jøts yak yø mgø' jøts yap mguxajit øts ngachpuki'jy. Jøts kidi nugo xkuwinmayi, janchjawi dø'øn.

<sup>28</sup>Xjats ja Tomás y'adsøø y jøts ja wyaañ:

—iMets nwindson'ajtpy ndios'ajtpy!

<sup>29</sup>Jøts nwindson'ajtim Jesús ñimaajyøø:

—Tomás, ja'agøjxp yam xjanchjawinim ku ø tō xtyimwyemp'ijxñim. Jotkujk'atyim

ja'adi pøn tmibøjktp pøn tjanchja'widip jadi'iñi, øy øts ja xjaga'ejxti.

Ya'at nigajpxp ja tiy'ajtin  
midi yø nøky myøøt'ajtpy

<sup>30</sup>Jøts may ja nwindson'ajtim Jesús ojts tpikta'aky ja ejxpajt, ku ja ojts ttuñ ja milagri jam pyabøjkpitøjk wyingujkp midi ka' kyøxja'ayi ya'at nøkyjøtpy.

<sup>31</sup>Ja'agøjxp ya'at jap jade'en tō yikujayi, jøts xiyjawidit xjanchjawidit jøts ku ja' yiknitsø'øky, jøts ku ja' Cristo ja nwindson'ajtim Jesús, ja Dios U'nk. Jøts ku ja xjanchjawidit, mbaatpts meets ja jujky'ajtin xemikøjxp sam pyaat'atyidi pøn tjanchja'wiyidip.

Ku Jesús ñanky'ejxyi niwixujk  
pyabøjkpi windump

**21** Xjats ku dø'øn ja wyinaty jade'en tō y'ukjaty, winets ja nwindson'ajtim Jesús ñanky'ejxi jadigojk jam ma ja pyabøjkpitøjk, jam mejy'am midi yiktejp Tiberias. Yide'en idø'øn ja y'ejxi tyiyi: <sup>2</sup>Ja Simón Pedro jam wyinaty møøt ja Tomás midi yiktejp xeeñu'nk, jøts ja Natanael midi jam kugajp'ajtp Caná midi Galileit etjotp, jøts ja Zebedeo y'una'jk, jøts møøt abiky janamajtsk nay ja nwindson'ajtim Jesús pyabøjkpi. <sup>3</sup>Ja'ats ja Simón Pedro ñimaay:

—Nijkxy øts t'ats'ajkxma'aky.

Jøts ja wyandøø:

—Pø tsoomp øø nayide'en.

Xjats idø'øn ja ñøjktøø, jøts ja ojts ttatøkidi tu'uk ja barki, ni tu'ugin ja ajkx ja tkamaktøø ja'abi koots. <sup>4</sup>Jøts ku



wyinaty xyiijñiwyani, winets ja nwindson'ajtim Jesús jam meyj'am wya'kaxi'jky, ja pyabøjkpitøjk ka'ap ja twinmaydi jøts ku ja yja'aji. <sup>5</sup>Jøts ja ñimaajyidøø:

—Mixy, čtø dø'on ja ajkx iij xmatsti uk tyimgya'aním?

Jøts ja yide'en t'adsoodøø:

—Ni tu'uk.

<sup>6</sup>Xjats ja nwindson'ajtim Jesús ja ojts ñii'mxyidi:

—Niwøjpatti yø mda'ajkxmajk ixa barki puki'jy aga'ñ'ampy, jøts ja ajkx inet jap xpaattit.

Jøts ja ojts jade'en ttundi, jaanimts idø'on ja tiy ka'ap ja tya'ajkxmajk y'ukmaa'yniyidi jøts ja jap nøøjotpy tjuuttit, ja'agøjxp ku ja ajkx jap janch'ujts'abøki. <sup>7</sup>Winets øts midi ja nwindson'ajtim Jesús yjanchminamyaajyip tnimaay ja Pedro:

—iJa nwindson'ajtimts yø'!

Ja'ayi ja Simón Pedro ja jade'en tnimiyadøøy jøts ku ja yja'aji ja nwindson'ajtim, winets ja ñikijxyit nijan ja ttatøjkiyii'ñ (pø tøxi ja wyinaty tjeñ) jøts ja ñidøjkiyii'ñ.

<sup>8</sup>Jøts øøts jam meyj'am ja barki nyikja'jty, jøts ja nda'ajkxmajk ja nbajidity janch ujts abøki ja ajkx, pø jadukmagø'pxy xajkxi dø'on ja jam wyinaty yjaaka'ity jøts øøts nbaatnit ja naajx. <sup>9</sup>Xjats ku øøts jam nwinajky, jøts øøts nbaajty ja jøndsabajk yikxon tø kya'kxy, jøts ja ajkx tu'uk tø yikjingtoni, jøts tsapkaaky abiky. <sup>10</sup>Winets øøts xnimaay ja nwindson'ajtim Jesús:

—Yikmendi tu'uk majtsk ajkx midi ixjaním tø xjuutti.

<sup>11</sup>Jøts ja Simón Pedro pvejty jam barkijotp jøts ja tjidøjtpidsiimy ja

ta'ajkxmajk, janch ujts abøki tum ja møjaty ajkx, tukmagø'pxy ja wixijxmyaktigøøk; jøts nika'ap ja xuumy yjapøøjty øy idø'on ja tyimyjajadine'eni. <sup>12</sup>Jøts ja nwindson'ajtim Jesús wyaañ:

—Men m'ajop'atti.

Jøts ja pabøjkpitøjk ni tu'ugin ja sa kyawa'andi pøni pøn idø'on ja', pø tøxi ja wyinaty tnijawidi jøts ku ja yja'aji ja nwindson'ajtim. <sup>13</sup>Winets ja nwindson'ajtim Jesús ja wingon ñimejnidøø, jøts ja tnixajyiyi'ñ ja tsapkaaky, jøts ja ojts myø'øiyidi møøt ja ajkx.

<sup>14</sup>Ya'at idø'on møøt myidigøøk ojk yjaty ku ja nwindson'ajtim Jesús ñanky'ijxyi ma ja pyabøjkpitøjk jam, ku ja wyinaty tø yjukpyiky jadigøjk.

#### Ku Jesús møøt ñagyajpxyi ja Simón Pedro

<sup>15</sup>Xjats ku ja y'ajop'ajt'abajtidøø, winets ja nwindson'ajtim Jesús tnimaay ja Simón Pedro midi ja Jonás myajnkíp:

—Simón, čtsojpk øts jawaani sam øts ya'at xtsoktin?

Jøts ja Pedro ja t'adsøøy:

—Ndsøjkpy me nwindson'ajtim, wa'ats mets ja xnijawi jøts ku me ndsøky.

Winets ja nwindson'ajtim Jesús ja ñimaajyøø:

—Winets ø xnøø'møøjyit xuu'møøjyit ja nbabøjkpitøjk.

<sup>16</sup>Jøts ja mimajtsk ojk kujk yiktiibyiky ja Jonás myajnk, yide'en ja yiknimaay:

—Simón, čtsojpk øts?

Jøts ja Pedro ja t'adsøøy:

—Ndsøjkpy nwindson'ajtim, wa'ats mets ja xnijawi.

Jøts ja ojts ñii'mxyi ja nwindson'ajtim Jesús:

—Winets ø xnøø'møøjyit xuu'møøjyit ja nja'.

<sup>17</sup> Jøts ja midigøøk ojk yiknimaay ja Jonás myajnk:

—Simón, çtsojokp øts?

Winetnimts ja Pedro yjotmay'oo'kpijky, ku ja midigøøk ojk yide'en yiktøøji ja nwindson'ajtim pøni chøjkpy ja', jøts ja tnimaay:

—Windsøn'ajtim, mets tuki'iyi mnija'wip. Mnija'wipxi wa'ats jøts ku ndsøky.

Jøts ja nwindson'ajtim Jesús wyaañ, jøts ja ñimaajyøø:

—Mets ndanipijky amuum, jøts xnøø'møøjyit xuu'møøjyit ja nbabøjkpitøjk. <sup>18</sup> Janch idø'on nnøjmi, jøts ku y'ijty mjaak'una'jk'atynim, yikxon y'ijty mjaaknaxyøxyi jøts mnijkxy pøni mā køøm xtsøky; kuts ja møjaa'y'ajtin xpatnit, jøts mxajtøønit, wyenkpits mets ja mwet mmo'ojyiyip jøts ja myiknøjkxit mā me ka'ap mjanøjkxwa'añ.

<sup>19</sup> Ku ja nwindson'ajtim Jesús jade'en wyaañ, ja' idø'on ja yjatijpy sa ja Pedro ja o'jkin tpaatt ku yikøyakt, jøts ja Dios jade'en yikmøjawit yikunuu'kxyjawit. Jøts ja ojts ñii'mxyi:

—iPduujnik øts yø nja', kidi øts xmajtstu'uty!

**Ja Jesús pyabøjkpi midi janchminamyaajyip**

<sup>20</sup> Xjats ku ja Pedro y'ejxjimbijty, jøts ja ojts t'ixy jøts ku øts

nbamiñ midi ja nwindson'ajtim Jesús janchminamyaajyip. Øts ja nwindson'ajtim Jesús jam wyinaty nbutsinaapy ku øøts wyinaty xøjøøjty n'a'ux'aty, jøts øts wyinaty nwindson'ajtim n'amidøøy: “Windsøn'ajtim, çpøn idø'on mga'ødyunwajnip?” <sup>21</sup> Jøts ku dø'on ja Pedro ja ojts y'ijxyi, winets ja Pedro tnimaay ja nwindson'ajtim Jesús:

—Windsøn'ajtim, jøts yø', çsats yø yjatt?

<sup>22</sup> Jøts ja nwindson'ajtim Jesús ja ojts yide'en y'adsøyi:

—çTi mets yø xunk'aty, njadyimyjayikjujky'aty øts yø' nay jaa ku ø nme'ent jadigojk? Tujnik øts yø nja' tu'ugyi.

<sup>23</sup> Xjats ja ayuujk yø'øgyøjy, jøts ja jade'en tnimadow'atti pøn jaty ja nwindson'ajtim Jesús yja' pabøjkpi, jøts ku ja'abi pabøjkpi ka' y'ookt. Kajade'enipts ja nwindson'ajtim Jesús wyinaty tø tnøjmi ja Pedro jøts ku ja'abi pabøjkpi ka' y'ookt, pø yide'enxi ja wyaañ jøts ku ka' ttunk'attit pøni sa ja yjatt.

<sup>24</sup> Øts idø'on Juan, midi'its idø'on ya'at ayuujk njaadyampy, pø tiy janchxi dø'on yø'. N'ejx nnija'wiyii'ñ øøts ku jade'en yjajty.

<sup>25</sup> Jaanim yø may ti jaty ja nwindson'ajtim Jesús tyuun, ku ja jeexyiy jade'en tø tyimyikja'ay piy køn, mayts nøky jeexyiy chøkyi jøts yikjaagyøxt sam yjajty kyubejty. Jade'en idø'on ja yjajty.